

JESUCRISTO JIYARAMIQUISHANO PUEYA MIISHANO

**“Pueyaso Sohuanu niaacua
jiyarosaanutaniya”**

1 ¹Quiocuara naajionu pacuteroahuania, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijosano coteequiaari mijiriani. Puetunu na miishanojuanaa naajiota-quiaarinijia, mariyata na niishitiojosano na coteenujiniji, jaara tacanishaaquiaariuhua jiyocuacaanu na Queta na quiniuhua. ²Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. ³Jesu cusonu nuhuaji, nojuajaari muetaquiaariuhua na saquiriojosano pueyacu. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminiyo quia. Nojoritia pocoojoquiaariiri taa Pueyaso jiitianutaniya na muerasuni.

⁴Nojoritia na pocoojosacari tamonu juuca, Jesuuri nojori numotequiaari maja ritia nojori quianuhua Jerusalén tiacajiniji. Nojori sequequiaariiri:

—Nia sashirijaara cua Que cuaara niqutioorajaara na Sohuanu niajaniya. Nojuajaari cua sequequiaari na niqutio-nutaniya niajaniyana, taa cua

caminiujuquiaari tari niaaracuajani.

⁵Naa sequequiaari niajanianyacuajanijia:

“Tiuquinijiona Juanri nia tiuquinijio-quiaari moojinia, Pueyaso tojijiara nia jatasacari. Pueyasoori saniniuujia na Sohuanu nioojiajinia tiuquinijionutaniya, seetanujuanaa Pueyaso tojijiara nia quiniuria”. Quera niaacua tiuquiniutianiyacuajaari. Naaratej, nia sashiri.

Jesu tacasacariuhua jiyocuacaanu

⁶Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijiaara jiyatesaanutaniya quiarijia Israel pueyara, maninia pa quiniuhua tama pa jiyaniijiatajaaja, taa pa supuetanaa quiquiaaricuaani?

⁷Jesuuri nojori riuquaree:

—Nio cutaraari maja nia niishishocoriquiano, taacari Israel pueya jiyaniijiaara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. ⁸Naajaa, niaari Pueyaso cumaaca masenutaniyacua-ja, Pueyaso Sohuanu jaara nioojiajinia tiuquiri. Niaari janiyajiniji pohuatanutaniya pueya niqiuara Jerusalén tiacajinia, puetunu Judea jiyajiniajanaanio, Samaria jiyajiniajuhuaj. Naa pohuataasaanutaniya-jaariuhua puetunu jiyacajiniajanaa, socua tucuaacaanu jiya puequeetujinianio.

⁹Jesu puecasacari pocuanu, nojuajaari tacanishaaquiaari na pueya shootiasacari-

jia nojuaja. Cohuajajinia shaajemaari pueya niquiyaquiniuucujaji nojuaja.

¹⁰Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nujuatuquiaari. Nojori toqueeri jiyanoehua cohuajaque quiriquiaa. Nojoriiri jiyocuacaanujinio Pueyaso seya quiquiaari. ¹¹Nojoriiri Jesu pueya sequeeree:

—Galilea jiyajinijinio pueyanaa, ¿casaara nia mautaa jiyocuacaanuni? Taa nia niquirii tacaanocujani, niaari naa na niqiniutianiya tacatehuanohuajuhuj.

¹²Nojoriiri jiyacari Olivo nacuhua tuhuananuucua quiriquiaa. Pueyaso seya nuhuaji, Jesu pueyari Jerusalén tiacajinio-hua tacatequiaari. Cuniqiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuaaanu nojori rucuanenura samaatenu* juuca. ¹³Nojori tiuquijiosacari Jerusalén tiacajinia, nojoriiri nojori quijia tijajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucujani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujani. Quiquiaarijiaariuhua Simón, cante tari quiquiaari Romano pueya jatanu panijiacujani. Mariyata quiriqiaari Judas, Santiago tarajanu. ¹⁴Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Maríata, Jesu tapueyocuatania.

Pueya saquiriojosacari Matías Judas niti

¹⁵Nojori sashishacari Pueyaso Sohuanu tii, tamonu juuca, Pedroori nujuaquiaari pueya niqiara na sequenura nojori. Naa naasucuatuhuj ciento veinte pueyari tii quiriquiaa puetunjuanaa. Naa nojori sequeeree:

¹⁶—Cua tapueyocuaanaa, Pueyaso Sohuanu sequesanoori maja na naata naajaa tajiniu. Seetanujuaanaa tari tohuateerucuaari Judasjiniji na pohuata-nishano pa supuetanaa jiyaniijia David. Naacuajitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niquitiosaacanu cumaneeca, naa nojori na niishitiniucua Jesu quiasaanura.

¹⁷Nojuacuajaari parta Jesu saquiriojosano pueyano quiquiaarijihuaj. Nojuajaari mariyata Jesu jiyaramiquishano quiriquiaa juhua pajaniyajuuhuj. ¹⁸Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuacaanuji tiquianu na nacaraari. Na saracaari cocuaretasee. ¹⁹Jerusalén tiacajinia quiniaa jaara na niishiquianu, nojoriiri cuno cuhuariquia sesojoree “Acéldama”. Acéldamaari pueyano rupaaajinia sequeya “Nanaca samitia masesano cuhuariquia”. ²⁰Judasjinijiiri naa naajiotasaaquiaarijuhua tariucuaaanu supuetana David jaaquequejojuajinia. Naa sequeyari:

“Na quiquio cuaara quiiria shaaco. Cuaara quiiria sanaaca, camaruuju”.

Sequeyajaariuhuj:

“Tamonu pueyano cuaara jiyatesaaria na poonijosano miiriquiano na niti”.

²¹Cuarta Jesu saquiriojosano pueyanaa, niya quiyacuaja pueya, canapuetucujaja pa tarajaquiaarini pueyaracaanu pa Jiyaniijia Jesu quishacari pata. ²²Nojoriiri Juan niquiquiaarijihuaj Jesu tiuquiniyano moojinia, Jesu tacasacariuhua jiyocuacaanunio. Canapuetucujaja puetunu nio niquiquiaarijianaani, niquiriyatu nojorijinijinio cuaara jiyatesaaria Jesu jiyaramiquishanora, pata na quiniuria, Jesu samiitianujiniji na pohuatanurajuuhuj.

²³Naaratej, pueyari caapiqui pueya saquiriojoquiaari. Cuniqui quiriquireaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquireaajuhuj, Matías. ²⁴Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocori-quiano na quiniuria, Judas niti poonijioriquiano. ²⁵Judasri quia niquitiosano poonijiosanojiniji catecanu sesa na miiniuucua, naquiya miishaqui na quianura, sesa mijia na quiniuucua.

²⁶Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matíasri Jesu saquiriojosano pueyanora quiquiaarijiuhuj. Naacuajitij Jesu saquiriojosano pueyari juhua juhuanoraja quiquiaariuhua doce.

Pueyaso Sohuanu tiuquishacari

2 ¹Pentecostés juuca jaara quiquiaari, puetunu Jesuucua tiuuniaajanaari rerejono quiquiaari tamonu tiajinia Jerusalén tiacajinia. ²iCanashiyaquiji, paratuuri tojishaquiaari jiyocuaaanuji, juhua paratu pocuaano jiyanhua cojuata! Jiyanhua tojishaareeri cuno tiajinia tee Jesu pueya cajitiuriquiaacuajani. ³Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimianacuriquiaari juhua mani. ⁴Jiyacaritij, Pueyaso Sohuanuuri puetunu tiajinia quiniia jiuujiajinijanaa tiuquirri. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocoteeree puetunujuanaa tamaatia rupaaca.

⁵Cuno quishacari, queraatia Judiocuaca puetunu jiyacajinijiniojuanaari camuee-

nujuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojitiajaca quiquiaari. ⁶Nojori tojishacari cuno cojuatunenu, nojoriiri cuqueree tee Jesu pueya pocooriquiaa tamaatia rupaacuajani. Nojori tojishacari naatej, nojoriiri jiyanhua cushitirii. Naatej, puetunu rucoonaajanaari tama na jiyajinijinio rupaacajaaja tojitiariquiaa, cuno pojori pocoosacari. Nojoriiri maja na niishiniu quiquiaari casaara naa nojori miiriini. ⁷Nojoriiri jiyanhua jiuujiatecoree. Tama sequetoo-reejaarijia:

—iJuhuej! ¿Cuno pojoriti maja Galilea jiyajinijinio pueyacuaja naa pocoyaniquitij? ⁸¿Taa nojori pocuaa puetunu coteenu pa rupaacajanaani? Pajaniyacuajaari queraatia tamaatia jiyacajinijinioni, puetunu tamaatia rupaaca pocuajacajanaa.

⁹Seetanujuanaari. Cuno pojoriiri Partiya jiyajinijinio nijono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinionio. ¹⁰Quiquiaarijiaariuhuj Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucuaji quiquiaari. Roma tiacajinijinio pueyari tii quiquiaarijiuhuj, canapuate Jerusalén tiacajinia pacunaa quiquiaaricuajani. Puetunu cuno pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatiuuquia co miatejosaaquiaari Judiocuacara na quiniuria, Pueyaso tojijiacara nojori quiniu panishacari. ¹¹Creta jiyajinijinio pueyari tii quiriquireaajuhuj, Arabia jiyajinijinionio. Puetunu cuno jiyacajinijianaa tamaatia rupaaca pocuajaca

quiquiaari. Nojoriiri socua naa sequetoo-quiaari:

—¿Taateni? iPuetunu pajaniyajanaari cuno Galilea pueya tojtiaani Pueyaso cutara miishano pohuataano, tama pa coteenu rupaajiniajaaja!

¹²Puetunu nojorijianaari jiuujiateri-quiaa nojori jiyajenenuta. Tama nojorijiaarjia nequesoreetooquiaari nojori tacaaniutia:

—¿Casaa na miitiuyajaaranononi?

¹³Tamasaca nojorijiniinioori saaja Jesu pueya macaatirii. Tama nojorijiaarjia tama sequetoooreejaacujua:

—Cuno pojoriqui mashaasequenuya shocuanacuhuata.

Pedro pohuatasano pueya niquiara

¹⁴Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequeereeri:

—Cuarta Judiocuacanaa, maninia nia tojtitiare casaa cua sequenutaniya niajaniyani. Puetunu Jerusalén tiacajinia quiniaajanaa cuaara niishiiria cua pohuatasano. ¹⁵Niaari canaa jiyaniya mashaasequenuyano. Pananucuaajaari shusha taqueejiya. Maja canaa mashaasequenuunu. ¹⁶Niaari canaa tojtiaa tamaatia rupaaca pocuaano. Niocuajaari tariucuacaanu Pueyaso sequesano caminiujiunia Joel pohuatasano. Cuno niaa na niquiyani, cunocuaajaari na sequesano, shusha tohuateyani. Nojuajaa-ri naa sequequiaaritij:

¹⁷“Pueyasoori naa sequeyaquij: ‘Quera jiya puequesacari, janiyari cua Sohuanu niquitionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niquitiniutianiya mashiquiori

juhua na maquenujinia. Cua niishishano niishitiojonutaniya saaquiapue na maquenujiniajaariuhuj. ¹⁸Cuno quishacari, janiyacua cua Sohuanu niquitiore puetunu cua tojtianaajanaani, canuu, maajipohuanio. Nojoriiri janiyaji-niji pohuatanutaniya pueya niquiara. ¹⁹Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniyajuhuj, pueya na numootenura. Nanacaari niquishaanutaniya, mani, jiyano-hua najacanio. ²⁰Pananuuri ninishiquiria quiniutianiya. Racaa-ri juhua nanacara quiniutianiyajuhuj. Naa coteenutaniyari jiya puequenura. Na nuhuaji, Jiyaniijajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhuj. Jiyano-hua shano-hua quiniutianiyari na rosesacari. ²¹Puetunu Jiyaniijia secojonaa pueyajanaari jiyanooshaanutaniya Pueyaso pueya nojori quiniuria’”.

‘Supuetana Joelri naa naajiotaquiaari Pueyaso sequesano tarijiatej. ²²Naaratej, socua cua tojtitiare cuarta Israel pueyanaa. Jesujiniji nia pohuatanutaniyanijia, Nazaret tiacajiniinjo pueyano. Pueyasocuaajaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijio-quiaari pa niquiara jiyano-hua jiyajeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajani-yacuajaari maninia niishiya puetunu

maninia na miishanojuanaa. ²³Saniniuujia, Jesu jaara niquitiosaarucuaa niajaniya, niaari na quiarucuaa juhua sesa miijia. Na nuhuaji, niaari Pueyaso tojiyashijiaca pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutaniyari Jesu. ²⁴Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura. ²⁵Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquia-notej:

“Cua shuriucua niquiquiaa Jiyaniijia-nijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. ²⁶Naaratej, coojaari timirii. Cua niti taquiriocuateree cua shuquiri-niutianijia. ²⁷Naajuhuj, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miijiaja cua quishacari quia niquiara. ²⁸Quiaari cua niishitiojoree maninia cua miiniuria, pueyaracaanu quijiaara cua quiniuria. Quiaari jiyanhua cua shuquiritiniutianiya quiata cua quishacari pueyaracaanu”.

²⁹“Cua pueyanaa, paacuaajaari niishiya-ni, pa supuetanaa jiyaniijia Davidri jamosaaquiaari na cusosacari. Na jamaari niya quiyajaa Jerusalén tiacajinia.

³⁰Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supuenutaniya quiajanijajiniji,

jiyanohua quia nuhuaji. Cuno pueyanoori Jiyaniijiaara cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujuanaa naa quiniutianiari Davidnaa. Maja cua sapojonu”.

“Pueyanaa, paacuaajaari niishiya-ni Davidri Pueyaso sequesano caminiuijia quiquiaari. ³¹Naacuajitij, Davidri Cristojiniji pohuatariquiaa jiyanhua tariucuaaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiari”. ³²Pueyasoori nio Jesu samiitianiriohuacuaa. Na samiitianu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. ³³Cutara na cumaacata, Pueyasoori na tacaniriohua na miaquetajara cajiriquiano, Jiyaniijiajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarijia canaa na niquitioree. Naaratej, niaari canaa niquirii tamaatia rupaaca pocuaano. ³⁴Majaari David tacanu quiquiaari jiyocuacaanu cutara. Nojuacuajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: ³⁵“Cua miaquetajara quia cajishiiijaara, janiya cuaara quia paraa shocotarejaatijia”.

³⁶Cunora, puetunu nijaniyajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijiajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano

Jiyaniijia. Majaari canaa pohuatasano-jiniji nia taacanuunu pueyanaa.

³⁷Pueya tojishacari naa Pedro pohuata-sanotej, nojoriiri tetecatuquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸Pedroori nojori riucuaquiaari:

—Nioojia nia tacatore sesa nia miiniujiniji. Nijaniya cuara moojinia tiuquinijiosaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niqutiore na Sohuanu.

³⁹Pueyaso sequesacari nojuaja na Sohuanu niqutionutaniya pueya, cunoori niaaranocua, nia niquiohuanonio, tucuaaanu quijiacarajuhuj. Pueyaso Sohuanucuaari puetunu pueyajanaa niqutiosaanutaniya, cana pa Jiyaniijia Pueyaso sequeya na muerasura na quiniuracuajani.

⁴⁰Pedroori jiyacari pueya pohuataree queraatia socua Jesujiniji na niishishano. Jiyanhua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejoonu mani quiquiojinia.

⁴¹Pedro pohuatasanoocua tiuuniaari tiuquinijiosaquiaari. Cuno juuca, tres mil pueya naasucuaari coteenu Jesu tojtianaa rupeuenaara quiquiaari. Pueyaso pueyari naa canequiaaritij.

⁴²Puetunu nojorijianaari maninia tojtiaquiaari pueyaracaanu Jesu jiyaramiquishano pueya niishitiojosano. Nojoriiri jatiqui quijia maninia. Majaari nojori juayonuujutano quijia. Nojoriiri pueyaracaanu rerejojua neecaru serotanura Jesu cusunu niishiniuria. Mariyata Pueyaso secojonuujua pueyara-caanuuri.

Panitioojuaca Jesu tojtianaa quishacari juhua tapueyocucata

⁴³Jesu jiyaramiquishano pueyari jiyajeneta miishano mijioriquiaa Pueyaso cumaacata. Naacujitij, puetunu pueyajanaari puereturiquiaa. Pueyari shiriqitiurii. ⁴⁴Puetunu Jesuucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niqutiojoquiaari nareja casamijiuniucua pueya. ⁴⁵Tamasa-caari na jiitiasano casami niqutioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasaca niqutioquiaarijuhuj, casamijiuniucua jiitianura puetunu nojori panishanojuanaajuhuj. Tamasaca pueyari na cuhuariquia niqutioquiaari nojori jiitianura na cumaneeca, tamasaca na naacunurajuhuj. ⁴⁶Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniajaaja nojoriiri rerejojua, neecaru neecasenura Jiyaniijia Jesu cusunu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia jiuujiaraca quiquiaari. Nojoriiri maja tamonu pueya shocotanu panijia quiquiaari. ⁴⁷Nojoriiri pueyara-caanu Pueyaso maniniuhuaquetariquiaa nojori shuquiriniutia. Puetunu Jesuucua tiuyashijia pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

Sesarunocua pueyano jeeacasacari

3 ¹Tamonu juuca, Pedroori Juinta tacatariquiaa Pueyaso Secojoua tiajinia. Tari quiquiaari pananu piriushacari. Nojoriiri jiyacari quiojonu jiitiquiaari Pueyaso secojonura Secojoua tiajinia.

²Jiyacaritij, tamonu sesarunocua pueyanoori tii cajitiariquiaa Secojojua tia tohuateyaji. Nojuajaari naa rasanojuhuanaa quiquiaari. Pueyaracaanu patoojotasaquiaariiri Pueyaso Secojojuaajiniara, pueya na mashini-quiniuria cumaneeca nojori tiuquitiasacari. Na cajitiasaqui tohuateya sesa quiquiaari “Tohuateya Maniniu”. ³Sesarunocua pueyano jaara niquiquiaari Pedro, Juannio, nojori tiuquitianu panishacari Secojojua tiajinia, nojori maseree juucua na cumaneecaari. ⁴Pedroori Juanta na shootiaree tacuriitia. Jiyacaritij, Pedroori na sequeeree:

—Canaa quia niquiri.

⁵Sesarunocuaari juucua shootiariquiaa nojori. Cumaneeca niquitiosaariquiano jiyaniriquiaa juucuaari. ⁶Pedroori na sequequiaari:

—Shaaqui cua cumaneeca. Shaaqui tojetaarucuaajanaa. Naajaa, cua jiitiasano-ta quia naacureera quiarijia. Quia sequeya Jesucristo sesajinianijia: “Quia sanere. Quia rucuanerejuhuaj”.

⁷Pedroori na juaashiquiajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maniniujiaacara quiquiijuhuaaj.

⁸Sesarunocuaari juhuacatecara rucuanequiaari. Nojoritia tiuquiquiaari Pueyaso Secojojua tiajiniaari. Maninia rucuaneriquiaari. Jaacuatariquiaari. Pueyaso maniniuhuaqueetariquiaajaariuhuaaj.

⁹Puetunu pueyajanaari na niquiquiaari rucuaneyano, Pueyaso maniniuhuaqueetaa-nojuhuaj. ¹⁰Puetunu pueyajanaari na niishiquiaari nojuajaari sesarunocuacuaaj, Secojojua tiajinia tohuateya Maniniujinia cumaneeca mashiniquijiojuatej. Pueyari cunora jiuujiatequiaari. Jiyanhua shiriqiu-tiuquiaariiri.

**Pedro pohuatasacari Pueyaso
rupaa pueya niquiara**

¹¹Sesarunocuaari Pedro juaashiquia carteyaquiquiaari, Juan juaashiquiano.

Nojoriiri Pueyaso Secojojuaajinia nujuatuariquiaa tamocora. Nojori nujuatusaquiiri pueya jiyaniquishano tariucuaaanu jiyaniijia Salomón canujuucojojua quiquiaari. Puetunu pueyajanaari nocua netecuatiquiaari na shiriqiniutia. ¹²Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini? ¿Casaara nia niquitiaa canaani? ¿Niaate jiyaniya canaa na niohuaca jeecareeni? Maja canaa. Majaari canaa cumaacata na jeequenu quirii. Niaa naasucuaari jiyaniya canaari nio miiriini socua maninia miiijia canaa quiniucua Pueyaso niquiara tamasa pueyajiniji. ¡Maja! ¹³¡Jesucuaajaari na jecarohua! Nojuacuajaari na Que Pueyaso jiyatesano Jiyaniijiajanaa na quiniuria. Jiyaniijiajanaara na jiyatencuaajaari Pueyaso, cante nio pojori pa supuetanaa jiyaniijia quiquiaaricuaajani: Abraham Jiyaniijia, Isaac Jiyaniijiano, Jacobo Jiyaniijiajuhuaj. Tama pa supuetanaa Jiyaniijia Pueyasocuaajaari Neyanu Jesu jiyatequiaari Jiyaniijiajanaa na quiniuria. Niaa cutaraari Pueyaso Niyanu niquitocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. ¹⁴Niaa maara maninia pueyanoocuaaji tacucanu saniya cutara, niaari pueyano puecoojuacua shiriqitiuri saaja Pilato cartenura jiyano sesoriquia pueyano seque. ¹⁵Niaari naa motecanu pueyano samiitianijiacua-jatej. Naajaa, Pueyasoori na samiitianiquianuhua macujiniji. Canaari na niquiquianuni. Naacujitij, canaari nojuajiniji nia pohuataani. ¹⁶Nio sesarunocua pueyanoori Jesucuaa tiuuri. Naacujiti jeequerohuari. Nojuacuajaari sesarunocua quiquiaari taa nia niquiquiaaricuaajanoj. Jesucuaa na tiuushacari, na cuaqueya cumaquiriiri.

Na cuaqueyari seetanujuanaa jeequero-hua maninia, taa nia niquiyacuajanoj.

¹⁷Cuarta Israel pueyanaa, quiarjia niishiyanjia, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuaj. Niaari Pueyaso Jiyarosano mocanu nia niishiyaquishacari cante nojuaja quiquianuni. ¹⁸Naacuajitij, Pueyasoori na sequesano tohuateecanu, tarijia na niishitishano na rupaa caminiujuninaa. Seetanujuanaa, puetunu Pueyaso sequesano caminiujuninaajanaari pa supuetanaa niquiara poojotaquiaari: “Pueyaso Jiyarosanooroori naquiya miishaanuta-niya”. Jesuuri naa miishaacanu taritij. ¹⁹Naaratej, nioojia nia tacatore sesa nia miishanojiniji. Pueyasocua nia tacatero-hua sesa nia miiniu tuujusaanura.

²⁰Naacuajitij, pa Jiyaniijia Pueyasoori na naata juhua maniniushiquiariria jiyatenu-hua pajaniyara, shuquiriaatia pa quiniuhua mijiria na jiyarosacariuhua Jesu. Pueyasoori tarijia na sequequiaari pa Jiyaniijia nia quiniuria. ²¹Nojuajaari jiyocuacaanu quiniutianiya na Que shuriucua, Pueyaso cuara tucutarejaatia puetunu tariucuaaanu na pohuatanishanojuanaa na sequenu panishano caminiujuninaa. ²²Moisés-cua-jaari naa sequequiaari pa supuetanaatej:

“Jiyaniijia Pueyasocuaajaari niaacua jiyaronutaniya nojuajiniji pohuata-na tama nia niquiohuacuajinio supuenojuaaja, taa na jiyaroquiaari janiyacuaani. Nojuaja jaara supue-re, niocua puetunu na sequesanojuanaa tojiri. ²³Canapue-te cuno pueyano pohuatasano ruuretanutaniyani, nojoriiri Pueya-saquiriojosano pueya tajiniji shaajasaanutaniya puetunurajanaa”.

²⁴Pueyanaa, puetunu Pueyaso sequesano caminiujuninaajanaari Moisés nuhuaji

naa Jesujiniji pohuatanuuquiaarijuhuaj. Naacuajitij, Samueli Jesucristojiniji pohuataquiaari taa na niniutianiyani. Naajuhua, Samuel nuhuaji, puetunu Pueyaso sequesano caminiujuninaajanaari naa pohuatanuuquiaarijuhuaj. ²⁵Puetunu Pueyaso sequesano Jesujinijianaani, cunoori quiarjia pajaniyara, taa Pueyaso pohuataniquiaari tariucuaaanu na sequenu panishano caminiujuninaacua-jani. Nojoriiri pa supuetanaa quiquiaari. Pajaniyaranojaarijuhuaj Pueyaso sequesano pa supuetana Abraham. Pueyasoori naa sequequiaari pa supuetana Abraham:

“Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajinijanaacuaajani”.

²⁶Pueyaso jaara na tojijia Niyanu samiitiani-quianu, coteenu na jiyaroree pocuaari poojia tacatoriquiano, sesa pa miiniu pa cartenura, shuquiriaatia quijia pa quiniuria.

Pedroori naa pohuataquiaari pueya niquiaratej.

Judiocuaca camarucua nequesoreesacari Pedro, Juannio

4 ¹Pedro pohuatasacarijia pueya niquiara, nocua nijioquiaariiri pueyacuara secojonaa, Pueyaso Secojoua tia cojuanaata, Saduceocuatatanio. ²Nojoriiri Pedro tojiquiaari pueya niishitiojiyano. Nojuajaari pueya niishitiojoriquiaa macunucuaari sanecuatunutaniuhua na jamacajiniji, naatej taa Jesu samiitiarohuacuaani. Cuno jiyaniijianucua jaara naa tojiquiaari sequeshiyanotej, nocuaji jiyanhua juaaquoquiaariiri, na ruuretasacari Pedro sequesano. ³Cuno juaaquiyoanoori Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiaariiri. Nojoriiri

tii juhuaquequiaari nujuatejojuajinia.

⁴Naajaa, queraatia pueyari Jesuucua tiuququiaari Pedro pohuatasacari Jesujini-ji. Quera cinco mil saaja canuuri tari Jesuucua tiuuniaa quiquiaari. Maajipo-huari serojosoo quiquiaari.

⁵Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatania. Nojoriiri Jerusalén tiacajinia rerejoquiaari Jesujiniji pohuatanaa nojori nequesoreenura. ⁶Anásri tii quiriquiaajuhua. Nojuajaari pueyacuara secojonaa jiyaniijia quiquiaari. Caifásri tii quiriquiaajuhua, tamonu Juannio, Alejandronio, mariyata puetunu secojonaa jiyaniijia tapueyocuanio. ⁷Pedro, Juannio, nojoriiri nujuatejojuajiniji tohuatejosaaquiaari. Nujuatejosaaaree jiyaniijianucua tajiniaari. Pedro shocua, Juan shocua cajitiuniaari nojori nequesoreere:

—¿Taa nia miiriucaa noonijia, sesarunocuatej? ¿Cana cumaacata nia jeecarohuacuaanoj? ¿Cante nia sequecanu naa nia miiniuriani?

⁸Jiyacaritij, Pueyaso Sohuanuuri Pedro jiuujia cumaquiquiaari Pueyaso niishitijata na pocuanura. Naacuajitij, Pedroori naa nojori riucuaquiaari:

⁹—Canaa camarucuaanaa, nia pohuatareera sesarunocujiniji, taa na jeequerohuacuaani. ¹⁰Niaa canaa nequesoreetaate, nia tojitiare canaa sequesano, nia niishiniuria cua pohuatano, puetunu Israel pueyajanaa niishiniurajuhua. Nio pueyano niya nujuaani, nojuajaari Jesucristo cumaacata jeequerohuacuaa. Niaari Nazaret tiacajinijinio Jesu cusojuacanu niyacute-sanojinia. Pueyaso cutaraari na sanacanhua macujiniji, pueyaracaanu na quiniuhua. ¹¹Niajaniyari juhua saitia tijaanaa Pueyasora. Nia tiasacari, niaari maniniujiajau saajia jataquiaari,

nia jiyanishacari sesarujau naasucua. Na camaruuri saniniujia sequeya:

“Cuno nia jatasano saajiani, cunoori saniya cua maniniujiajau saajia”.

Niaari naa Jesu jataquiaari juhua saajia sesarujau. Naajaa, Pueyasoori na niaquiaariuhua socua maniniushiqui.

¹²Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

¹³Judiocuaca camarucuaari jiyano-hua na namijiaa riuniquioquiaari nojori niquishacari taa Pedro, Juan seetanujanaa cumaacata pohuatariquiaa nojori niquiarani. Nojoriiri Pedro, Juan niishiquiaari nojoriiri seetanujanaa maja puera naajionuujuaca quiquiaari. Nareja poonijionuujuaca pueyajinijinio quiquiaariiri. Naa nojori niishishacaritij, nojoriiri seetanujanaa niishiriri nojoriiri Jesu cojiniaa quiquiaari. ¹⁴Sesarunocua jeequenohuari cuniqui nojori shuriucua nujuariquiaajaacuhua. Naaratej, jiyaniijianucuaari socua sanaajetaquiaari. Saaja niishiriojonuuriquiaari. ¹⁵Camarucuaari Pedro, Juan tohuatanijioquiaari tamocora nojori tajiniji. Jiyareta camarucuaari tama pocoojoquiaariiaaja. ¹⁶Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeeCASOO. Nojoricuaajari tari maninia na niishitiuya. ¹⁷Nio pojori pa piriyojore juhuari, maja socua quiarijia nojori pohuatannura Jesujiniji pueya niquiara, nojori miishano paaquiniuria socua niya pa tiacajiniani.

¹⁸Camarucuaari socua piiquiaariuhua Pedro, Juannio. Nojori nacasuree

jiyanohuari, maja socua quenaaja nojori pohuatanura Jesujiniji pueya niquiara.

¹⁹Pedroori Juanta nojori riucuaquiaari:

—¿Canaatucua casaara Pueyaso

samiritiare canaa tojinuria niajaniani?

¿Taa nia sequeyani jiyaniijianucuaana?

²⁰Maja cutaraari canaa naata tarinitianu pohuatanu canaa niquishano, canaa tojishanonio.

²¹Camarucuaari nojori piriyojoquiaari juucuohuaj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanoinijijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii. ²²Pedro jeecasanohua sesarunocua pueyanoni, nojuajaari cuarenta marijia shocotejoquiaari tari na quishacari.

Jesu pueya secojosacari Pueyaso, na cumaquiniuria nojori

²³Pedro, Juan jaara cartesaaquiaari, nojoriiri narta Pueyaso pueyacu quiojoquiaariuhua. Nojori pohuataatureeri Judiocuaca camarucua sequesano nojori, camarucua nacasunaa sequesanojuhuaj.

²⁴Na tojishacari camarucua piriyojosano, puetunu nojorijianaari Pueyaso secojonu coteequiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipininia, jiyano. Shoniacu caminiari quia shipinishanojuhuaj. Puetunu casaajanaari quia shipinishano. Quiaari jiyanhua maninia. ²⁵Canaa supuetanaa jiyaniijia Davidri quia seru quiquiaari. Naacujitij, quia Sohuanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacu quiniaa pueya juayani? Pueyari najuhuaa sesa niishiriojoriquiaa juucua. ²⁶Jiyajiniinio jiyaniijianucuaari na juaaquiaca sanetaree. Queraatia

tiacajinijinio camarucuaari Jiyaniijia Pueyasooacara roojotooree, na jiyarosano Cristoocaranio”.

²⁷Pueyasonaa, naacuaquinatejaj.

Jiyaniijia Herodes, Poncio Pilatonio, nojoriiri nio tiacajinia rerejocanu narta taucucata, Israel pueyatanio. Quia Niyanuucua roojotoocanuuri, tama quia Jiyarosanoocarajaja. ²⁸Naa nojori miiniucuatej, nio pueyari tari quia miiniu panishano miiriucuaa, taa quia sequequiaari tariucuaananucujani: “Cua Niyanu cuaara mosaaria puetunu pueyacularajanaa”. ²⁹Canaa Pueyasonaa, quia tojishuriucuaraj. Nojoriiri quiarijia canaa miananojiya saniniujia.

Canaacuaajaari quia seyani. Canaa jiuujia quia cumaquri quiarijia, canaa pohuatanura socua quia rupaa canaa puereyaquiniutia. ³⁰Cusosuhua cuaara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuaara mijiosaaria quia cumaacata pueya niquishocoriquiano. Nojuacuajaari saa maninija.

³¹Nojori puecasacari secojonu, nojori quishaqui tiaari canashiyaquiji jiuuquiuquiaari. Pueyaso Sohuanuuri puetunu nojori jiuujiajinia tiuquiquiaari, nojori na cumaquiniuhua. Naacujitij, pueyari saaja maninia pohuatequiaari Pueyaso rupaa pueya niquiara. Majaari na pueretunu quiquiaari.

Jamueyashijiaca Jesu tojtianaa quishacari

³²Jesuucua tiuuniaari maninia juhua rupuetootesano quiquiaari puetunujuanaa. Nojoriiri juhua seetanujanaa tapueyocucataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiltasano casamiiri saniniujia puetunu narta Jesuucua tiuuniarajanaa quiquiaarijihuaj. ³³Jesu saquiriojosano pueyari Jesu samiitianujiniji poojotaquiaari

jiyanohua cumacata. Naajuhuj, Pueyasoori puetunu Jesuucua tiuuniaja-naa naacuriquiaa jiyanoahua, shuquiriaatia nojori quiniuria. ³⁴Puetunu Pueyaso pueyajanaari na panishano jiitiaquiaari puetunujuanaa. Nojorijinijinio jaara cuhuariquia jiitiaquiaari, tianio, nojoriiri na niquitioquiaari cumaneecara. ³⁵Jaara cumaneeca masequiaari na casaa sami, nojoriiri nareja na niquitioquiaari Jesu saquiriojosano pueya. Nojoriiri saniniuuja casamijiu Pueyaso pueya na serotaquiaari, nojori jiitanura na panishanojuhuaj. ³⁶Nojorijinijinio, tamonu pueyanoori quiquiaari. Na sesaari José, Levita* pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. ³⁷Bernabeeri cuhuariquia jiitiaquiaari. Na cuhuariquia niquitioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niquitioquiaari Jesu jiyaramiquishano pueya, casamijiu narta Pueyaso pueya niquitiojosaanura saniniuuja.

**Ananías, Safira sesa
miishanojiniji pohuatasano**

5 ¹Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niquitioquiaari cumaneecarajuhuj. ²Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuari. Juhua papatasoo niquitioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiriquiaa Ananías niquitiosacari nareja na cumaneeca. ³Ananías niquitiosacari na cumaneeca, Pedroori na sequeree: —Ananíasnaa, ¿casaara quia tiuquinirii Sesaaca quioojiajiniani, quia sapojonura

Pueyaso Sohuanu juucuaani? iNojuacua-jaari cua niishitiquii nio cumaneecaari maja puetunu quia masesanojuanaa quia cuhuariquia samijiniji! iQuiaacuajaari tiji queyataree! ⁴Quia cuhuariquia quia niquitioyaquishacarijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niquitioree cumaneecara, quia cuhuariquia samiiri quia casaa quiriquiaajuhuj. ¿Casaara naa sesa quia niishiriojoreerini? Naa sacuaraatia quia miishacaritij, majaari quia sapojonu quirii parta pueyano. iQuiaa cutaraari Pueyaso sapojoree juucua!

⁵Ananías tojishacari naa Pedro sequesaa-notej, imacuuri pojoquee! Puetunu pueyajanaa jaara tojinuuquiaari nocuaji, jiyanoahua shiriquitiquiaariiri. ⁶Mashiquioriiri na jiuniocoquiaari toquejinia. Na nuhuaji, na patuquiaari na jamonuraari.

⁷Jiuujianaraca hora nuhuaji, necocuaari juhuajaniya tiuquiquiaari Pedroocuajuhuj. ⁸Pedroori na nequesotaree:

—Cua sequere, ¿niojuanaate nia cuhuariquia sami quiriucaaa?

Na riucaareeri:

—Jaa, niojuanaacuaaquiniatejaj.

⁹Pedroori na sequeree:

—¿Casaara naa nia roojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijiohua. Nojoriiri quiarjia quia panutaniyajuhuj.

¹⁰Jiyacaritij, maajiiri macu pojoquee Pedro shuriucujuhuj. Mashiquiori tiuquijiosacariuhua, nojoriiri Safira niquishuhua pojianojuhuaj, tariucua macu. Nojoriiri na patuquiaarijuhuaj. Neyaca shuriucua na jamotuquiaariiri.

¹¹Puetunu Pueyaso pueyajanaa, tamasaca pueyano, nojori jaara tojinuuquiaari puetunu nio miishanojinijianaa, jiyanoahua pueretuquiaariiri.

**Queraatia mijiosacari Pueyaso
cumaacata pueya niquiara**

¹²Jesu jiyaramiquishano pueyari jiyanhua cutara casaa mijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuacaanu jiyaniijia Salomón canujucojojuajinia, Pueyaso Secojojuia tiajinia. ¹³Tamasaca pueyari nojori puerequiaari. Majaari nojori rupesaanu quijia. Na pueretujua-caari nojoriijini sequetujua:

—Cuno pojoriiri maninia pueya.

¹⁴Queraatia pueyari Jiyaniijia Pueyasocua tiuquiaari, canuu, maajipohuanio. ¹⁵Naajuhua, cusosuhuari patootasaaquiaari na maquetucujajinia nuujiniara. Pueyari naa niishiriojoquiaari, Pedro jaara cusosuhua shuriquicoo tajimia, cusosuhuari naataconutaniuhua Pedro naaqui jaara nojori caco netema. ¹⁶Queraatia Jerusalén tiaca shocua quiniaa pueyari na cusosuhua patoota-quiaarijiuhua, Jerusalén tiacajiniara. Samaruhua sesosano pueyari jaatucunuu-saaquiaarijiuhua. Puetunu pueyajanaari naatanijosaaquiaari.

**Pedro, Juan nujuatejosacari
nujuatejojuajinia**

¹⁷Naaratej, pueyacuara secojonaa jiyaniijia, nata quiniaa narta Saduceocua-canio, nojoriiri juaaquoquiaari shocotasano nojori quishacari. ¹⁸Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaaquiaariiri Judiocuaca nujuatejojuajinia. ¹⁹Pueyaso seruuri niucua jiyocuacaanuji nojoriicua rosequiaari. Nujuatejojuia tohuateya riataseeri. Na tohuatejosacari Pedro, Juannio, nojori sequereeri:

²⁰—Juhuaajaniya nia quiaarohua.

Pueyaso Secojojuia tiajinia puetunu Jesujiniijianaa nia pohuatare pueya niquiara. Nia pohuatarejuhuaj taa jatanishano pueya nia quiya quiarijiani.

²¹Nojoriiri Pueyaso seru sequesano tojiquiaari. Nojoriiri tariquicuaji quiojoquiaari Pueyaso Secojojuia tiajinia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secojonaa jiyaniijiaari nata quiniaata saniniujia quiojoquiaari pueya nequesoreesaqui. Puetunu Israel pueya camarucujananaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoreesocoriquiano. ²²Na pueya jaara tiuquitiaquiaari nujuatejojuajinia, majaari nujuatejosano na riuriatatunu quishii nujuatejojuajinia. Nojoriiri tacaretacuhua na shaacanu nuhuaji. ²³Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiootiu. Canaa riatasacari tohuateya, ishaacoori quiriquiaa!

²⁴Secojojuia tia cojuanaa camarnu, mariyata pueyacuara secojonaa jiyaniijia-nucuaari tama sequetooquiaariijiaaja nojori shiriquiniutia:

—¿Taateerini? ¿Taariquitijia socua na nuhuaji quiniutianiyatej?

²⁵Jiyacaritij, tamonu pueyanoori camarucuaacua tiuquishii. Naa nojori sequeseeeri:

—iNoo pojori, niaa na nujuatejocanu nujuatejojuajiniatej, nojoriiri juhuajaniya pueya niishitiojonuya Pueyaso Secojojuia tiajinia!

²⁶Tari nojori niishishacari tee Jesu jiyaramiquishano pueya quiriqiaani, Secojojua tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuquiaariuhua. Secojojua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuurijia. Nojoriiricuno puerequiaari. Nocujaji Jesu jiyaramiquishano pueyari jacaria jaatucunuusaquiaari. Majaari na caponeesaanu quiquiaari. ²⁷Jaara tiuquitiasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrínucua* tajiniatuhuj. Pueyacuara secojonaa jiyaniijiaari nojori sequequiaari:

²⁸—iMajaquiiri nia niishiniu tojiniu! Canaacujaari tari nia tenujucanu juucuaní maja socua cuno Jesujini nia pohuatánura pueya níquiara. ¿Niaate nia numaa shama tojiqianu canaa sequesano? Naa nia niishitiojosacaritij, ipuetunu Jerusalén tiacajinia quiniaajanaari canaacua tiutianutaniya Jesu mosaanu! Canaa sequetunutaniyari: “Cuno pojoriiri Jesu motucanu”.

²⁹Pedroori narta Jesu saquiriojosano pueyata nojori riucuaquiaari:

—Seetanujuaari, pueya cuara Pueyaso sequesano miiria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyaniijianucua sequesano cuara miishaaria. ³⁰Pueyasoori tariucuaanú pa supuetanaa Jiyaniijia quiquiaarijihuaj. Cuno Pueyasajuanaa-cujaari niyacutesanojinia nia cusojuasano samiitianiqianuhua.

³¹Pueyasoori na tacaniquianu jiyocuacaanu. Na miaquetajara na cajitiquianuuri Jiyaniijajanaa na quiniuucua, pocuaji

Tacuna na quiniuucujuhuaj. Naa miiquianuuri Israel pueya tacatonuhuaa noojia Pueyasocua, Pueyaso jiyanoonuria pajaniya sesa pa miishanojiniji.

³²Naaratej, canaari canaa tojishano pohuataani, canaa niquishanonio. Naajuhuaj, Pueyaso Sohuanuuri canaa niishitiojoquiaa maninia canaa pohuatánura pueya níquiara. Pueyasocujaari na tojitianaa niquitioquiaa na Sohuanu.

³³Naa Judiucuaa camarucua tojishacari nojori sequesantej, juaaquioreeri. Nojori puecoonu panirii juucuaari.

³⁴Jiyacaritij, tamonu pueyanoori narta camarucua tajini nujuaquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuaanú rootasano niishijia quiquiaari cutara. Naajuhuaj, nojuajaari jiyanohua narta Israel pueya tojishano pueyano quiquiaari. Gamalielri Secojojua tia cojuanaa camarnu sequequiaari Jesu jiyaramiquishano pueya na tohuatanijionura rupaquiaari. ³⁵Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. ³⁶¿Majateeri nia niishiniu taa Teudas miiquiaari quiari naatajani? Nojuajaari jiyaniijiaari quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niaquejoquiaariuhua. Naa puequequiaariiri Teudas miiniu panishano. ³⁷Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijihuaj. Puetunu na pueyajanaari niaquejoquiaariuhuj. ³⁸Naaratej, naa nia sequeyanijia:

nia tarinitiare nio canuu. Nojori niishitio-josano jaara tama nojori niishishanojuaaja quiri, shaajenutaniyari. ³⁹Saniniuujia, nojori miishano jaara seetanujanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaque-tojonuruhua, naa nojori nia miishacaritij.

⁴⁰Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaa-rohua. Camarucuaari nojori mojooree nareja. Nojori tenujutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari cartequesa-quiaariuhua. ⁴¹Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniuucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. ⁴²Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucajanaa, Pueyaso Secojoua tiajinia, mariyata puetunu Jerusalén tiacajiniaqueyajanaano.

Mashiquiopue mianuutenaara saquiriojosacari

6 ¹Jiyacaritij, Jesuucua tiuuniaa pueyari socua canequiaari. Puetunu nio pojoriinijiniojuanaani, noojiaqueyari Judio rupaa pocuanaa quiquiaari. Naajuhuaaj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquoiquaari Judio rupaa pocuanaata. Griego rupaa

pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niquitioyaquiquiaa miaquesanonijia?

²Nocuaji, Jesu jiyaramiquishano doce pueyari puetunu Jesuucua tiuuniaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. ³Cunora canaa tapueyocuaacanaa, tama niajanijiniinjo nia saquiriojore siete maninia mijiaca pueya, niishijiaca, Pueyaso Sohuanuracacutara. Nojori nia seeratare nio poonijiosano, maninia nojori mianuutenura pa mashiquiopue. ⁴Canaacua saniniuujia saa Pueyaso secojorenijia. Naajuhuaaj, majaari canaa tarinitianu quiniutianiya Jesujiniji niishitiojonu.

⁵Puetunu pueyajanaari na shuquiriniutia naa riucuaquiaari:

—Taaquiririninj, naacuaaquiniateja maninijaj.

Jiyacaritij, pueyari Esteban saquiriojoquiaari. Nojuajaari jiyanoahua Pueyasooocua tiuujia pueyano quiquiaari. Nojuajaari Pueyaso Sohuanu cumaacaraca quiquiaarijiuhuaaj. Nio pojoriiri Estebanta saquiriojosaaquiaarijiuhuaaj: Felipe, Prócoronio, Nicanornio, Timónnio, Parmenasjuhuaaj, Nicolásnio. Nicolásri tahue quiquiaari Antioquiya tiacajiniinjo. Tii rasaquiaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. ⁶Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacua. Jesu saquiriojosano pueyari cuno siete canuu nacaacua niaquiaari na juaashiquiaca. Pueyaso secojoturee nojoriicuaari Pueyaso Sohuanu cumaquiniuria nojori, miaquesano niquitiojonaa nojori quiniuria.

⁷Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijiuhuj. Queraatia Judiocuacaacuara secojonaa pueyari Jesuucua tiuquuaarijiuhuj.

Jesu ruuretajaca quiasacari Esteban

⁸Estebanri Pueyaso cumaacaraca quiquiaari jiyanhua. Pueyasoori maninia na jitiaquiaari. Naacujitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanujanaa Pueyasojiniji quiquiaari, nojori niquishacari jiyajeneta na miishano Pueyaso cumaacata. ⁹Jiyacariti, tamasaca Judiocuacaari Jerusalén tiacajinia quiriquiaa. Nojori maanuuri sesojosaaquiaari “Quioosanojiniji carteqesano pueya”. Quiquiaarijiariuhua Cirene tiacajinijinio pueya, Alejandría tiacajinijinio pueya, Cilicia jiyajinijinio pueyajuhaaj, Asia jiyajinijinio pueyano. Puetunu nojorijianaari Estebancua rerejoquiaari nata juayonuutanura.

¹⁰Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohuanu niishitiojosanota saa maninia pohuataquiaarijia nojori niquiara. ¹¹Maja socua nojori rejeretasacari Esteban pohuatasano, nojoriiri tamasaca pueya niquitioquiaari cumaneeca, najuhuana nojori cuaracashiniuria camarucua niquiara Estebancua. Cuno pueya, cumaneeca niquitiojosaaquiaari na cuaracashiniuriani, nojoriiri naa sequequiaari Judiocuaca camarucua niqiaratej:

—iTaquiriririni, canaacuaajaari cuno pueyano tojiquianu Moisés sesacaanoni, Pueyaso sesacaanojuhuaj!

¹²Naa nojori sequesacaritij, puetunu pueyajanaari juaaquioree, Judiocuaca

camarucuajuhuaj, Moisés Rootasano niishitiojonaanio. Puetunu nojorijianaari Estebancua catecanoquiaari. Na quiatureeri. Na nuhuaji, na jaatucutuchiaari pueya nequesoreesaquiriaari, Israel pueya camarucua nequesoreesocoriquiano tii nojuaja. ¹³Socua pajesaaquiaariiri tamasaca, Estebancua tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niqiaratej:

—Nio pueyanoori pueyaracaanu sesacaquiaa Pueyaso Secojoja tia. Moisés Rootasano sesacaariquihuariuhuj. ¹⁴Canaari socua naa na sequesano tojiquiaajaaniuhuj: “Nazaret tiacajinijinio Jesuni, nojuajaari Pueyaso Secojoja tia niyartanutaniya”. Naajuhuj, tariucuacaanu Moisés niishitiojosano pajaniya pa cartetenutaniyaquiniaari.

¹⁵Puetunu camarucujanaari na cajitiushaqui niquitariquiaa Esteban. Nojoriiri na jiquioco niquiquiaari shacantuaa, juhua Pueyaso seru jiquioco.

Esteban pohuatasano

7 ¹Pueyacuara secojonaa jiyaniijiaari Esteban nequesotaquiaari: —¿Seetanutejanaa taa nio pojori sequereecuajani?

²Nojuajaari na riucaaree:

—Cua panishano pueyanaa, cua camarucuanaa, cua tojitiare. Pueyasoori jiyanhua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarijia Harán tiacajinia.

³Pueyasoori jiyacari naa na sequequiaari:

“Quia tiujiaare quia jiya, quia pueyano. Niiquiji quia quiaare, janiya cuaara quia sequerejaatijia, niya quia quishii. Quiocua tii jiyojese cutara”.

⁴Abrahamri Pueyaso sequesano tojiquiaari. Quiaquiaariiri Caldeo pueya jiyajiniji.

Harán tiacajinia quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani. ⁵Jiyacaritij, Pueyasoori juhuano-juaja maja Abraham na niquitionu quiquiaari nio jiya. Naacuajitij, Abraham-ri maja quenaaja jiya na jiitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niquitionuta-niya nio jiyani. Quiaa jaara shaajeyare, quia niquiohuara quiniutianiya saniniuuriija”.

Pueyaso jaara naa sequequiaari Abraham-tej, Abrahamri jiyacari juhuanajuaja niquiohuaju quiquiaari. ⁶Pueyasoori naa pacutequiaari sequenu Abrahamtej:

“Puetunu quia jinianuucujiniao supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutianiya jiyanhua. Naa naquiya miishaanutaniyari. Tii nojori quishacari, na shoconujunutanianari cuatro ciento marijia”.

⁷Pueyasoori Abraham sequereejuhua:

“Janiyari saniniuuja cuno taucuaa naminiutianiya quicuajiniao supueno pueyacuani. Janiyari nojori saniitionutianiya saniniunijia nojori poonijiotenuucua quicuajinio supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonuujuaca quiniutianiya niya”.

⁸Pueyasoori naa Abraham rootaquiaari-jiuhua:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano niajaniya”.

Naa Pueyaso sequesanoori quiquiaari puetunu Israel pueyarajanaa. Naaratej,

Abraham niyanu Isaac jaara rasaaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuaj. Pueyasoori Jacobo sesojoquiaari “Israel”. Jacoboori naa miiquiaari necohuajuhua. Necohuari quiquiaari doce canuu. Cuno doce canuu, Jacobo niquiohuani, nojoriiri puetunu pa doce Israel pueyapue supuetanaajanaa.

⁹Pa supuetana Jacobo niquiohuajinijini, tamonuuri sesojosaaquiaari José. Tapueyocuaacari José juaajiaca quiquiaari jiyanhua, puera na que panishano José quishacari. Majaari nojori niquituniu paniniu quijia nojuaja. Na queeri socua jiyanhua José panijia quiquiaari na pueranaajiniji. Tapueyocuaacari cunora casami niquitiojona pueya niquitioquiaari cumaneecara tarajanu José. Casami niquitiojonaari José jiyataquiaari Egipto jiyajinia, saniniuuja tii na niquitiosocoriquiano serura. Naajaa, Pueyasoori Joseeta quiriquiaa.

¹⁰Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyaniijia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaariuhua.

¹¹Na nuhuaji, miaajenuuri quiquiaari puetunu Egipto jiyajiniajanaa, Canaán jiyajinianio. Pa supuetanaa quishacari Canaán jiyajinia, nojoriiri quera titiacoquiaari na miajajaara. Seetanujua-naa shaaqui quiquiaariiri nojori miasano.

¹²Jiyacaritij, Jacoboori caminiujiushaaquiaari: “Egipto jiyajinia quiaquinia trigo*”. Naaratej, necohua jiyaroreeri trigo masenura. Jiyacari nojori quiojosacari, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacua-ja. ¹³Coteenu nojori masesano jaara

puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocua sequequiaari: “Janiya nia tarajanuni”. Joseeri Faraón* niishiti- quiaari tapueyocujahuaj. Naaratej, Faraónri shusha niishiquiaari tejeno pueyanote José quiquiaarini. ¹⁴Joseeri tapueyocua sequequiaari: “Pa que Jacobo nia riquioo niyara, puetunu necohuatajanaa”. Puetunu nojorijianaari quiquiaari setenta y cinco pueya.

¹⁵Jacoboeri naa pacuquiaari Egipto jiyajiniaratej. Na nuhuaji, saaquiinoori tii shaajeseequiaari. Necohuari tii puequeseequiaarijiuhuj, tariucua saaquiapue. ¹⁶Na nuhuaji, Egipto jiyajini- ji pacusaaquiaariiri nojori nucuhua. Siquem tiacajinia nojosaaquiaariiri na supuetana Abraham raaco. Cuno raari cuhuariquaijania quijia. Abrahamri cuno cuhuariquia masequiaari tariucuaaanu pueyajiniji raa na jiitianura necocua na nijara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

¹⁷Pueyasocujajaari tariucuaaanu Abraham sequequiaari nojuajaari nio jiya na niquitionutaniya. Quera na niquitionu panishacari, Israel pueyari jiyanoohua canequiaari Egipto jiyajinia. ¹⁸Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanoohua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. ¹⁹Cuno jiyaniijiaari tاراatia miqquiaari shusha roosano pa supuetanaa niquiohua. Pa supuetanaa sequequiaariiri shusha roosano cuaara quejoosaaria moojinia. Pa supuetanaari tاراatia miqioquiaari naacuatej. ²⁰Moisésri jiyacari rasaquiaa- ri. Pueyasoori na maniniucuaquiaari. Na queyari na jiitiaquiaari rupaquijia. Jaara na shoconujuquiaari jiuujianaraca raca,

conaajaari carijiniacuma niasaaquiaari.

²¹Faraón niyatuuri na paquiaari saniniu- jia. Na canashitiquiaari juhua na mueyari. ²²Egipto pueyari Moisés niishitiojquiaari puetunu nojori niishishanojuanaa. Puetunu Moisés sequesanojuanaari jiyanoohua tojishano quiquiaari cutara. Puetunu na miishano- juanaari maninia quiquiaarijiuhuj.

²³Cuarenta marijia jaara shocojoquiaa- ri Moisés, mashaja na quishacarijia, narta Israel pueyacua rucuanenu paniquiaariiri, nojori na niquiniuria. Judiocuacacujajaari cuno pojori, naa sesojoshiya Israel pueyatani, maja tamonu. ²⁴Naacuajitij, Moisés jaara quiaquiaari narta Israel pueya niquiniucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuujia cuno Egipcio pueyanoori. ²⁵Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. ²⁶Moisésri socua tariqui quiaquiaari narta Israel pueya niquiniuuquiohuaj.

Nojuajaari saaja riuriatasee tama nojori piyotaanojuaja. Juucua nojori rupareta- nu panishiiri. Nojori sequereeri:

“¿Niaateeri tamonu, niaa jaara naa miitiotyaniquitij? ¿Casara naa nia nootujutoyani?” ²⁷Cuno narta pueyano piquiriquiaani, nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canaatej? ¿Cante quia jiyatecanu canaa nequesoree- narani? ²⁸¿Quiaateeri cua monu paniyajuhuj, naatej taa quia morucuaa cuno Egipto pueyanocuaani?” ²⁹Moisés tojishacari naa cuno pueyano sequesano- tej, ritia mashiquiaari Egipto jiyajinijiiri. Madián jiyajinia quishiiri tamonu pueya

jiyajinia. Moisés quishacari cuno jiyajinia, tii camiquiaariiri. Caapiqui canuuniyojua mueratejoquiaariiri.

³⁰Cuniqui na quishacari, na shocojo- quiaariiri cuarenta marijia socua. Tamonu juuca, Moisésri rucuanajoriquiaa cariquia jiyajinia, pueya sesojosano Sinaí tuhuananu shuriucua. Pueyaso seruuri tii nocua muetaquiaari nequeru casaja noshiyanojiniji. ³¹Moisés niquishacari mani noshiyano, nojuajaari shiriquiquiaari. Jaara nocua catecanoquiaari na niquiniuria maninia, saaja Jiyaniijia Pueyaso tojirii manijiniji pocuaanoori.

³²Pueyasoori naa na sequequiaariti:

“Janiyacuaajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhuaj, Jacobo Jiyaniijiano”.

Moisés jaara naa tojiquiaariti, tetecareeri. Majaari mani noshiyano na niquiniu paniniu quiquiaari na puerenuta.

³³Pueyasoori na sequequiaari:

“Cuniquia quia jocojore quia sapatu. Niya, quiaa tii nujuaani, nioori cua quishaqui. ³⁴Janiyacuaajaari cua pueya niquiquiaa Egipto jiyajinia quiyanoni. Egipto pueyari nojori miitiaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaariti.

³⁵Israel pueyari tarjia Moisés juaaquiaaricuaaja. Naa na sequetuquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhua?” Naajaa, Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na

jiyaroquiaariiri puetunu nojori tohuatani-jioriquianojuanaa Egipto jiyajiniji.

³⁶Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miiijioquiaari Pueyaso cumaacata cuno jiyajinia, mariyata nojori niutiasacari Naatunacu jiyanishano caminiajuhuaj. Naa miiquiaari pueyaracaanu cariquia jiyajiniajaariuhua. Cuarenta marijiaari nojori shocojoquiaari pueyaracaanu nojori rucanejosacari tii. ³⁷Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohua-tariquiano nia niquiara, taa na jiyaroquiaari janiyacuaani. Tama nia niquiohuacuajiniojuaja supue-nutaniyari. Niocua saa nojuaja tojiri cutara”.

³⁸Nio Moisésri narta Israel pueyata quiquiaari cariquia jiyajinia. Nojuajaari Pueyaso seruta pocoojoquiaari Sinaí tuhuananuucua pa supuetanaa jateesacari tuhuananu cari. Moisésri Pueyaso seru rootasano na tojishano niishitiojiquiaa-riuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

³⁹Pa supuetanaari saa na ruuretaquiaa-rijia. Majaari nojori tojinu paniniu quiquiaari Moisés. Egipto jiyajinia tacatenu paniquiaariuhua saajaari.

⁴⁰Naacuajitij, Moisés tarishishacari tuhuananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanajaj, mariqui tiuquiriohua. Nojuajaari najuhua pa mashiquiquianu Egipto jiyajiniji”. ⁴¹Naacuajitij, nojoriiri na

pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juaashiquiaata na shipinitiusano pueyasooquara. Nojoriiri jiyacari sacuaraatia timiquioriquiaa. ⁴²Pueyasoori socua nojoriicuaji pishiquiaari. Nojori tarinitiaquiaariiri jiya cajiniocua nunuco-juaa nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuacaa-nu Pueyaso sequesano caminiujiuninaa naajineejinia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariquia jiyajinia nia camarucuneetasacari cuarenta marijia cuaara nia shocojoquiaari-jiaatijia? ¿Cucuaratee? ¡Maja! ¿Canaacuara nia catijiaquiaari nia seyani? ¿Cucuaratee? ¡Maja! Niaari puetunu cuno miiquiaarijianaa tama nia jiyatesano pueyasohua-cuarajaaja. ⁴³Niaari Moloc* suhuorotu pataquiaari, shoquejiniji suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyaso’. Niaari Refam* pataquiaarijiuhuj, juhua rijia niquishano shipinishano. Niaari puetunu nio shipinijioquiaa-rijianaa nia pueyasohuara, nojori cariquimajia nia mojoquetaconura, nia shuquiritiasacari nojori. Nocua-ji, janiyari nia jiyaronutaniya tucuaaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniuucua sesa.

⁴⁴Estebanri socua pohuataquiaari naatej:

—Pa supuetanaari Pueyaso secojoju suhuorotu jiitiaquiaarijiuhuj, cariquia jiyajinia nojori quishacari. Nojoriiri tii racataquiaari Pueyaso niquitiosano

saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacua. Cuno suhuorotuiri shipinishaaquiaari taa Moisés niquitishaaquiaaricuajani Sinaí tuhuananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niquitiquianu quiajaniyacuajani”. ⁴⁵Na nuhuaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoojosacari taucucata, nojoriiri Pueyaso secojoju suhuorotu patariquiaa. Pueyasoori cuno taucucata jataquiaari nio jiyajiniji, saniniuujia pa supuetanaa jiya na quiniuria. Cuno suhuorotuiri pa supuetanaata quiquiaarijia, David jaara jiyaniijia quiquiaari. ⁴⁶Jacoboari pa supuetanaa jiyaniijia David supuetana quiquiaarijiuhuj. Davidri Pueyaso tojijia quiquiaarijiuhuj. Pueyasoori na shuquiritiaquiaari. Naaratej, Davidri Pueyaso Secojoju tiara tianu paniquiaari juucua. ⁴⁷David niyanu Salomón cutaraari Pueyasora tiaquiaari. ⁴⁸Naajaa, jiyocuaaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuninaa naa naajiotatquiaari Pueyaso sequesano nojuaja:

⁴⁹ “‘Jiyocuaaanuuri cua quiquio. Jiyari saniniuujia cua niohuaca cua niaja. ¿Taamueca tia nia tianutaniya quiriajaarani?’ Jiyaniijiaari naa sequeyauquij. ‘¿Taa nia sequeyani: na mueecujuara pa miiri, shuquiritiaata na quijia?’ Maja.

⁵⁰ ¿Majateeri puetunu nio jiyajinia niquishanojuanaa cua juaashiquiaata cua miishanocuaaja, jiyocuaaanujuhuaj?’”

⁵¹Estebanri socua nojori sequequiaari:
—iNiaari tojitiaashijianucua! iNiaari
Pueyaso sequesano ruuretaquiaa juhua
nia supuetanaa! Nioojiaari maja juhua
Pueyaso pueya jiuujia. Nia numaacaari
maja Pueyaso rupaa na tojiniu paniniu.
Niaari pueyaracaanu tojiyaquiya Pueyaso
Sohuanu niishitiojosano. Niaari Pueyaso
tojiyashijianucua juhua nia supuetanaaju-
huaj. ⁵²Nia niishiritioj, ¿nia supuetanaate
quena niquiriyatujua Pueyaso sequesano
caminiujiuniaa miitiaaquiquiaari? Nia
supuetanaari puetunu Pueyaso sequesano
caminiujiuniaajanaa miiquioquiaari
naquiya. ¿Quenaaja niquiriyatu nojoriji-
niniote miitiasoo cureequiaari? Maja.
Nojoriiri tari puecoquiaari noo pueya,
canapueete maninia mijia mijiria niriquia-
nojiniji pohuatanuquiaaricuaajani. Cuno
maninia mijia jaara tiuquiquiaari, niaari
sesa mijia pueya na niquitioicanu nojori
mosocoriquiano. iNiaari naa mocanu
Pueyaso Jiyarosanotej! iNiaari pueyara-
caanu Pueyaso ruuretaquiaa!

⁵³Naacuaajitij jiyocuaaanuji Pueyaso seya
pohuatasano Pueyaso rootasano niaarani,
majaari cuno nia tojiniu quiquiaajuhua.

Jesu ruuretajaca mosacari Esteban

⁵⁴Pueya jaara naa tojitiuquiaari
Esteban sequesano, nojoriiri jiyano-
hua juaaquioree. Na juaaniutia miaquenuuree
na quiaacaari. ⁵⁵Jiyano-
hua Sohuanu cumaquishacari Esteban jiuujia,
nojuajaari jiyocuaaanu mauquiaari.
Saaja Pueyaso shacantuuca niquiriiri.
Jesu niquirijiaariuhua na Que Pueyaso
miaquetajara nujuaano. ⁵⁶Naa na
niquishacaritij, nojori sequeeree juucuaari:
—iNia niquishurinijia! Jiyocuaanu
niquiya riatenonijia. iPueyaso Niyanu
niquianijia na Que miaquetajara
nujuaano!

⁵⁷Pueyari na numaaca mishiquiojonuu-
quiaari saaja, maja na tojitiuniuria

Esteban sequesano. Jiyano-
hua sariyocua-
tuquiaari na juaaniutiaari. Na nu-
huaji, Esteban-
cua cocuatequiaariiri. ⁵⁸Na
caponeetuquiaari Jerusalén
tiacajiniijiiri. Tiacajiniji
tohuatesaaree tamamaari. Na
tohuatesaanu nuhuaji, tii na
jacutuquiaa-
ri saitiaari. Na jacuturi-
quianoori na
toqueya cojuatequiaari
tamonu mashaja.
Nojori toqueya cojuana
sesa quiquiaari Saulo.
⁵⁹Nojori jacutusacari
saitia Esteban, Estebanri
Pueyaso secojoriquiaa
naatej:

—Jiyaniijianaa, cua
sohuanu quia riri quia
shuriucua.

⁶⁰Na nuhuaji, mo-
joquetareeri. Jiyano-
hua nacaquiaari na
nuhuajiriaari:

—iJiyaniijianaa, majaari
nio pojori saniitionu
naa nojori miiniucua
janiyatej!

Naa na sequenu
nuhuajitij, cusoqueeri.

Saulo miishacari naquiya Jesuucua tiuuniaa

8 ¹⁻²Pueyaso panijia-
ca pueyari Esteban
quete patuquiaari na
jamotusocoriquiano.
Nojoriiri Esteban
sapuequiaari. Cuno
juuca, Jerusalén
tiacajinia quiniaa
Judicuaacaari juhuacate-
cara miitianu cotee-
quiaari puetunu
Jesuucua tiuuniaa-
janaa. Nocua-
ji, puetunu nojori-
jianaari tiji
mashiquiaari. Saaja
Jesu saquiriojosano
doce pueyari tii
cureequiaari nojori
nuhuaji. Nojoriiri na
mashishacari
niyaquejoquiaari
puetunu Judea
jiyajiniajanaa,
Samaria jiyajini-
aranio. ³Jiyacari
Sauloori socua
jiyacateriquiaa
miitianu Pueyaso
pueya. Nojori
pajequiaari puetunu
tiacajiniaqueyaja-
naari Jerusalén
tiacajinia. Na
riuriatasacari, na
jayoquiaari tiaco-
jiiri, na nujuate-
josocoriquiano
nujuatejojuajinia,
maajipohua,
canuunio.

Jesujiniji pohuatasacari Samaria jiyajinia

⁴Mashiyocuatuno
pueyari puetunu na
quiasacojuanaa
Jesujiniji pohuatanu-

quiaari pueya niquiara. ⁵Nojorijinijinio quiquiaarijiuhuj Felipe. Nojuajaari mashiquiaarijiuhuj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristo-jinijiaariuhuj. ⁶Puetunu pueyajanaari Felipe pohuatasano tojiniuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuriitia, na miishacari jiyajeneta casaa Pueyaso cumaacata. ⁷Samaruhua tohuatanijioriquiaa pueyajinijiri. Samaruhua tohareetasacari pueyajiniji, sariyocumaquiaari. Queraatia cumatacuruhuana cusosuhuari naatanijiosaaquiaarijiuhuj, sesacujuanucuanio. ⁸Naaratej, puetunu cuno tiacajinia quiniaa pueyajanaari jiyanhua shuquiquiaari.

⁹Shimiacuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojoujaari jiyajeneta na mijiosanota. Naa sequeja tama na cuaqueyajaarijia: “Janiya cutaraari tojishano pueyanoni”. ¹⁰Puetunu pueyajanaari na tojjia quiquiaari, camarucua, muerasunio. Nojoriiri sequetuquiaari: “Nio pueyanoqui jiyanhua Pueyaso cumaaca jiitiaa”.

¹¹Puereeta Simón miishacari pueyaraanu, pueyari sapojosaaquiaari. Naaratej, pueyari na sequesanoocua tiuquiaari. ¹²Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinijijiuuhuj, cuno Samaria pueyari Jesuucua tiuquiaari cutara. Canuu, maajipohuajuhuj, nojoriiri tiuquinijosaaquiaari moojinia. ¹³Simónri Jesuucua tiuquiaarijiuhuj. Na tiuquinishaanu nuhuaji Felipeecua sacuaquiaariiri. Felipe shootiaquiaari tacuriitiaari Felipe mijiosacari jiyajeneta casaa Pueyaso cumaacata.

¹⁴Jerusalén tiacajinia Jesu saquiriojosa-no pueya jaara tojiquiaari taa Samaria pueya tiuuri Pueyasooocuan, nojoriiri cuniquiji jiyarotuquiaari Pedro, Juannio. ¹⁵Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujajinia Pueyaso tiuquitiniuria na Sohuanujuhuj.

¹⁶Majaari Pueyaso Sohuanu tiuquiniu quiquiaari juhuanouja nojori jiuujajinia. Nojoriiri nareja moojinia tiuquinijosano quiquiaari Jesuucua nojori tiuushacari. ¹⁷Pedro, Juan, cunora na juaashiquia niojoquiaari pueyacu, nojoriicuara na secojotusacari Pueyaso. Naa nojori miishacaritij, Pueyaso Sohuanuuri cuno pueya jiuujajinia tiuquiquiaari cutara.

¹⁸Simónri niquiriquiaa taa Pueyaso Sohuanu tiuquiquiaari pueya jiuujajinia Jesu saquiriojosano pueya niasacari na juaashiquia nojoriicuan. Naaratej nojuajaari Jesu saquiriojosano pueya niquitionu paniquiaari cumaneeca juucua, cuno cumaaca na jiitianurajuhuj. ¹⁹Simónri naa sequequiaari nojori: —Cua niquitiotureja cuno cumaaca. Janiyacua Pueyaso Sohuanu panijiacaa-cua niare cua juaashiquianijia, Pueyaso Sohuanu nojori masenurajuhuj, taa nia miyacuaani.

²⁰Pedroori na sequequiaari saaja:

—iQuia cumaneeca cuaara shaajeera quiatajuhuaj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niquitioquiaa nareja na tojtiajaca pueya.

²¹iPueyaso Sohuanu cumaacaari maja quiarano! Quioojaari jiyanhua sesa quiya Pueyaso niquiara, nocuaji maja na cumaaca niquitosaanu quiniutianiya quiajaniya. ²²Jiyanhua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji

quioojiajiniatej. ²³Niishiyacuajanijia, quiaari juhua cartesoo quiyajaa, sesa miiniuucua jiitinio quia quishacarijia. Quioojiaari puera najiquitishano quiyajaa jiyanoayashijia quia quiniuucua juhujaj.

²⁴Simónri na riucuaquiaari:

—iPueyaso nia secojorequi cucuara, mariqui cua saniitioreeri taa nia sequeya-cuajani!

²⁵Na nuhuaji, Pedroori Juanta socua pohuataquiaari Jiyaniijia Pueyaso rupaa cuno pueya niquiara. Pueya niquiara pohuatatureeri socua Samaria jiya tiacajinia, cuniqui quiniiaa tiuuniuria Jesuucua juhujaj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajiniohura.

Jesujiniji Felipe pohuatasacari

Étíope pueyano

²⁶Cuno nuhuaji, Pueyaso seruuri Felipecua rosequiaari. Na sequeseeri:

—Quia sanere Felipeana. Pananu shuucua jiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariiquia jiyacuma neteya.

²⁷Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopía jiyajinijinio pueyanotaari. Cuno pueyanoori riyacajajaaju quiquiaari Etiopía jiya jiyaniijia naacutana na quiniuucua, maaji na jiyaniijia quiniuucua. Na jiyaniijia sesa quiquiaari Candace. Cuno maajiiri cuno pueyano jiyatequiaari Etiopía jiya casami jiitiana-ra, na cumaneeca cojuariquiano nera. Nio Étíope pueyanoori Jerusalén tiacajinia quiaquiaari Pueyaso secojonuucua. Cuniquiji tacateyanoori Felipea naacuneetooquiaari nuujinia. ²⁸Nucuacoji

na tacatesacariuhua na jiyajiniohuara, caballoori na jaatiariquiohura, rucuanajo-tajarujinia cajiayano. Pueyaso rupaa serojoriquiohuari, tariucuaaanu Pueyaso sequesano caminiujiunia Isafas naajione-jiniji. ²⁹Pueyaso Sohuuanuuri jiyacari Felipe sequequiaari:

—iRitia nocua quia catecanore!

Quiocua nata quiaare.

³⁰Jaara nocua catecanoquiaari, Felipe-ri Étíope pueyano tojiquiaari Isafas naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

³¹Étíope pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequeereeri:

—Miji quia tacama. Cua shuriucua quia cajishii.

³²Étíope pueyanoori nio serojoriquiaa tariucuaaanu Pueyaso Rupaajinia:

“Juhua borrego jaatucusaquiaariiri mosocoriquiano. Naatej, taa borregocuaani sanaa niquiyari na cajaca miatejosacari, nojuajaari naa quiquiaarijuhujaj. Majaari na sariyocuanu quiquiaari quenaaja naquiya na miishacari. ³³Naquiya miishaaquiaari cararaatiaari. Nocua namiyaquishaaquiaariiri. Mashaja na quishacarijia, nojuajaari shaaja-saaquiaari nio jiyajiniji. Cunora, majaari na muetunu quiquiaari. Niquiohuajuuri mosaaquiaari”.

Étíope pueyanoori nio serojoriquiaa Pueyaso rupaajiniji.

³⁴Na nuhuaji, Étíope pueyanoori Felipe nequesotaree:

—Cua seque pueyanonaa, ¿canajiniji Isafas pohuataa niya na naajiosanojiniani? ¿Tama nojuajiniji pohuataatee? ¿Tamonujiniji soj?

³⁵Felipeeri Etíope pueyano niishitiojonu coteequiaari Jesujiniji shusha na serojosano Isafas naajiosanojiniji. Felipeeri naa na sequeeree:

—Isafas naajiosacari nio, nojuajaari juhuacarijia Jesujiniji pohuataquiaari, taa quiarjia Jesu miishaacanu taraatiacuajani.

Felipeeri socua na pohuataquiaari Jesu miishanojiniji. ³⁶Nojori quiasacari nucuaco, caminiaco shuriuquico tajitiani-quiaari. Etíope pueyano jaara caminiaco niquiquiaari, Felipe sequereeri:

—¿Majate maninia cua tiuquinishaanura niya?

³⁷Felipeeri na sequeeree:

—Quiaa jaara seetanjuanaa tiuuri Jesuucua, quia naata tiuquinishaanu.

Cuno pueyanoori na riucaaree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishiyaniia.

³⁸Etíope pueyanoori jiyamitia na seru sequeeree:

—Quia nujuaretare rucanejotaja.

Felipeta rosetamaa caminiacojiniara. Felipeeri tii na tiuquiniquiaari Jesuucua na tiuushacari. ³⁹Nojori tacatasacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etíope pueyano shuriucuaaji. Nojuajaari juucua tacareecuaquiaari na tiuquiniaciaa. Majaari socua na niquiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajinihua. ⁴⁰Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniara.

Saulo jatasacari Jesu tojinia na quiniuria

9 ¹Sauloori jiyacari pueyaracaanu Jesuucua tiuunaa miananajoriquiaase. Nojori puecoonu paniquiaari

puetunujuanaari. Naaratej, Sauloori pueyacuara secojonaa jiyaniijiaacua quiaquiaari. ²Naa na sequeeseeri:

—Damasco tiacajinia quianu paniyanijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquijionura nojori rerejojuacajinia. Jesu tojiniaa pueya morojonu paniya cuniquijinijia. Janiyari cua quioosano jaatucunutaniya niyara Jerusalén tiajinian, canuu, maajipohuanio.

³Naacuajitij, nucuaco Saulo quiasacari, tari quenaacoturiquiaa Damasco tiacajiniaraari. Jiyacaritij, ishacantuucaari canashiyaquiji nunuquiaari jiyocuacaanuji! ⁴Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—iSaulonaa, Saulonaa, cua tojiri! ¿Casaara quia miitiaa puera janiyani?

⁵Sauloori na riucaaree:

—¿Cantequia Jiyaniijianaa?

Jiyocuacaanuji nocua pocuaanoori na riucaquiaari:

—Janiya Jesuni. Quiaari puera cua miitiaajanaajataj, cucua tiuunaa quia miitiasacari puera. Naa quia miishacari puera quia juaaniutiatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijia.

⁶Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequeeree:

—Quia sanere. Naajaa quia tiuquishii Damasco tiacajinia. Quiaari tii sequesanutaniya cua panishano quia miiniuria.

⁷Saulota quiojonaari shiriquitiquiaari nojori jaara tojitiuquiaari jiyocuacaanuji pocuanu. Nojoriiri juucua na niquiniu paniquiaari. Saaja shaaquiri quiriquiaa.

⁸Na nuhuaji, Sauloori na pojosaquiji

sanerohua juucua. Majaari na naata niquiniu quiquiaari saaja. Nata quiniaari na jaatucutaquiaari Damasco tiacajiniara. ⁹Nojuajaari tii camueenujuquiaari jiuujianaraca juuca, cariojuaru na quishacari. Majaari na miaquenu quiquiaari pueyaracaanu cariojuaru na quishacari. Ratuyaquiquiaarijaariuhuj.

¹⁰Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujinia:

—iAnaníasnaa!

Nojuajaari na riucuaquiaari:

—¿Casaate cua Jiyaniijianaa?

¹¹Jiyaniijiaari na sequeeree:

—Quiarijia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajinia quiya. Judas tiaari jati tamonu nuujinia quiya. Cuno nuu sesa, Nu Maniniu. Sauloori cuno tiajinia secojiya Pueyaso. ¹²Nojuajaari juhua na maquenujinia tari niquirii quiajaniya nocua tiuquiyano. Tari quia sesa niishiya-jaariuhuj. Sauloori tari quia niquirii na maquenujinia. Quiaari quia juaashiquia niariquiaa nocua, na namijia jeequenuhuara, maninia na niquinihuara.

¹³Ananías jaara naa tojiquiaari Jiyaniijia sequeyanotej, nojuajaari sequeeree:

—iCua Jiyaniijianaa, queraatia pueyari cuno pueyanojiniji cua pohuatacanuni! iQuiocua tiuunaa pueya miitiaquiaa taraatia Jerusalén tiacajiniaari! ¹⁴Pueyacuara secojonaa jiyaniijia jiyarosanonaaari cunohuj, quiarijia niya tiuquiriini.

iNojuajanaari quia secojonaa pueya quioonutaniya, morojonucuaca canaa na jiyatasocoriquiano Jerusalén tiacajiniara!

¹⁵Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarijia cua jiyaramiquishocoriquianoni.

Nojuajaari tamasa jiyacajinia poojotanutaniya janiyajiniji taucuaca niquiara. Taucuaca jiyaniijianucua poojotanutaniya janiyajinijiaariuhuj, Israel pueyano. ¹⁶Janiyacuajaari Saulo niishitiojonutaniyani taa jiyanohua naquiya pueya miitianutaniya nojuajani, janiyajiniji na pohuatasacari.

¹⁷Naaratej, Ananíasri quiaquiaari. Judas tiajinia tiuquishiiri, tee Saulo quiriquiaacuajani. Na tiuquishacari, Sauloocua niasee na juaashiquiaari. Na sequeeree:

—Cua tarajanunaa, pa Jiyaniijia Jesu, quiocua muetarucuaa nio tiaca nuuama-ji niyara quia nishacarini, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajiniajuhuaj.

¹⁸Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquinisha-quiaari moojinia Jesuucua na tiuushacari.

¹⁹Na nuhuaji, miaquereeri, raturohuajaa-riuhuj. Noojia jatarohuari. Pasaja camueenujuquiaari Damasco tiacajiniaari Jesuucua tiuunaa pueyata.

Jesuviniji Saulo pohuatasacari Damasco tiacajinia

²⁰Sauloori juhuacatecara coteequiaari Jesuviniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niquiara na pohuatasacari sequeja:

—iJesuuri seetanujuanaa Pueyaso Niyanu!

²¹Naa nojori tojishacari Saulo pocuaa-notej, pueyari shiriquiquiaari. Na shiriquitiuniutia sequeereeri:

—Nio pueyano pocuaani, ¿majate nootej, naquiya miquiaa Jesuucua tiuunaa pueya Jerusalén tiacajiniatej?

Niyara niyareejaarihuaj, Jesuucua tiuuníaa pueya na morojonura. Nojuajaa-ri nojori jiyatanu paniriquíaa juucua Jerusalén tiacajinia secojonaa jiyaniijia-nucua na niquitiojosocoriquiano, nojori nujuatejosaanura.

²²Sauloori socua noojia cumaquiquiaari Pueyaso Sohuanuta, jiyano-hua maninia na pohuatanura puetunu juucajanaa. Nocuaij pataquiaari saaja Damasco tiacajinia quiniíaa narta Judiocuacaari. Sauloori maninia pohuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaij tacuriquiano.

Saulo mashishacari narta Judiocuacaacuaij

²³Quiniqui Saulo camueenujusacarijia pueyaracaanu, narta Judiocuacaari nocuara roojotooquiaari na motunura juucua. ²⁴Tamonuuri Sauloocua jiyanoo-quiaari. Naa na sequequiaariiri:

—¡Quíaa monu panishiya sacaj!

Judiocuacaari na sashiriquíaa tiaca tohuatheyaji, na monu paniniutia juucua Saulo. Na shanacuturiquiaari juuca, niucuanio. ²⁵Damasco tiacaari pueretuu-ca sohuacaraca quiquiaari puetunu na shocuajanaa. Jesuucua tiuuníaa pueyari saaja Saulo mashiquiquiaari niucua. Sohuacajiniji roshinitiasaquiaari jiyocuacaanuij pueretuuca canaasatuji-niaari. Sauloori naa mashiquiaaritij.

Saulo quishacarihua Jerusalén tiacajinia

²⁶Na tiuquishacarihua Jerusalén tiacajinia, Sauloori Jesuucua tiuuníaa pueya rupeenu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasoo-cua tiuujiacquinio naasucua jiyanotej.

²⁷Bernabé cutaraari maja na puere-nu quiquiaari Saulo. Nojuajaari Jesu

saquiriojosano pueyacua na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nucuamaji. Jiyaniijiaari nata pocoojocanu. Sauloori cunora juhuajaniya pohuatariquíaa Jesujiniji Damasco tiacajinia.

²⁸Sauloori narta Jesuucua tiuuníaa pueyata jiyojequiaari cuniquijia Jerusalén tiacajinia. Nojoritia rucuanajo-juaari, mariyata Jesujiniji pohuataja juhuajaniyari. ²⁹Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocoojoquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. ³⁰Jesuucua tiuuníaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquij jiyarosaaquiaari na raja Tarso tiacajiniari.

³¹Na nuhuaji, puetunu Judea jiyajinia Jesuucua tiuuníaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojitiajacara quiquiaari nojori pueretusacari nojori mariqui na tojiyashijara quiriohuari. Pueyaso Sohuanu naacusacari nojori, Pueyaso pueyari socua canequiaari queraatiara.

Pedro naatanishacari Eneas

³²Pedroori pueyaracaanu rucuanajojua Jesuucua tiuuníaa pueyacua, nojori na niishitiojonura socua Jesujiniji. Tamonu juuca nojuajaari Pueyaso pueya niquiniucua quiaquiaari Lida tiacajinia-juhuaj. ³³Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu

quijia. Tari na shocojoquiaari ocho marijia pootia na matasacari na matujinia. ³⁴Pedroori cuno cusosu sequequiaari:

—Eneasnaa, iJesucristo tari quia naatanirii! ¡Quia sanere! Quia matu quia jeeicare.

Eneasri ritia sanequiaari. ³⁵Puetunu pueyajanaa Lida tiacajinia quiniaa, mariyata Sarón tiacajinijinio pueyajuhaj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuuquiaari.

Dorcas samiitianishaanujiniji pohuatasano

³⁶Jiyacarijiuhuj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniuuja pueyano rupaajinia sequeshiyacujua “nequeru”. Cuno maajiiri Jesuucua tiuuja quiquiaari. Nojuajaari maninia mijia maaji quiquiaari. Casamii-juniucua pueya niquitiojojua nareja na jiitiasanoinijiri. ³⁷Na nuhuaji, Pedro quishacari Lida tiacajinia, Dorcasri cusoquiaari. Na cusu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. ³⁸Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuunaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹Pedroori nojoritia tacatequiaariuhua Jope tiacajiniuhua. Na tiuquishacari,

quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na nujuquetunuta. Nojoriiri Pedro niquitijioquiaari Dorcas cusupuenusano toqueya, cacojoquiyanio. Cunoori quiquiaari na cusupuenusano saminio na quishacarijia. ⁴⁰Pedroori jiyacari puetunujuanaa pueya tohuatanijioquiaari sohuacamaji. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—iDorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. ⁴¹Pedroori na juaashiquiajiniji na quiaquiaari. Na nujuatereeri. Na nuhuaji sequequiaari Jesuucua tiuunaa pueyari, mashiquiopuenio:

—Miji pueyanaa, inia nimia!

Nojori tiuquitiasacari, saaja maaji niquitiushii nujaanoori, tariucua saminio. ⁴²Pedro miishanoori puetunu Jope tiacajiniajanaa niishishaaquiaari. Queraatia pueyari cunora Jesuucua tiuuquiaari. ⁴³Pedroori na nuhuaji janiya camueenujuquiaarijaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqueya majeetejojua quiquiaari, casaara shipinishocoriquiano shoquejiniji.

Pedro quiasacari Cornelio niquiniucua

10 ¹Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaaquiaari “Italiano”. ²Cornelioori Pueyaso secojojua pueyano quiquiaari, mariyata puetunu na tiajinia quiniaatajanaano. Nojuajaari seetanujanaa Pueyaso shuquiritiniu panijia quiquiaari.

Cornelioori queraatia na cumaneecajiniji niquitiojojua quiquiaari nareyajuhaaj, casamiijiuniucua Judiocuaca niquitiojo-socoriquiano. Pueyaso secojojua pueyaracaanuuri. ³Tamonu juuca, tariucua pananu piriushacari, Cornelioori Pueyaso seru niquiquiaari juhua na maquenujinia nocua niyano na tiajinia. Na sequeseeri:

—Cornelionaa.

⁴Cornelioori saaja Pueyaso seru shootiaquiaari na shiriquiniutia. Na nuhuaji na riucuaereeri:

—¿Casaate jiyaniijianaa?

Pueyaso seruuri na sequeere:

—Pueyasoori quia secojosano tojiquiaa.

Quia timitiaari capora quia quiniucua, quia jiitiasanojiniji quia niquitiojosacari nareja casamiijiuniucua pueyara. ⁵Naaratej, quia seya quia jiyaramiquiri Jope tiacajinia. Nojori cuaara Simón masuunuucua quiaara. Na sesaari Pedrojuhuaj. ⁶Nojuajaari na sesaanucua pueyano tiajinia quia. Tia camaruuri shoqe majeetejojua piiquiajinia. Cunoori na poonijosano. Na tiaari shoniniacu caminia casaqueyaji naniya. Simón Pedroori quia sequenutaniya casaa quia miiniutianiyani Pueyaso jiyanooniuria quiajaniya.

⁷Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquiriyatu na soldadonio. Cuno soldadoori Pueyaso secojona quiquiaarijiuhuaaj. Maninia na jiyaniijia naacujua quiquiaarijiariuhuaaj. ⁸Cornelio jiyarosaacaribia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquiriri Jope tiacajiniaari.

⁹Tariqui, Cornelio seya quiasacari nucuaco, nojori quenacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa

nacasuhuojuajinia quiquiaari jiyacari.

¹⁰Nojuajaari jiyacari miaajeriquiaa.

Neraari juucua sumatusaariquiaacuaja.

Nera sumatusacaribia, Pueyasoori casaa na niquitiquiaari juhua na maquenujinia,

na quishacari tia cacojiria. ¹¹Pedro niquishacari jiyocuacaanu, saaja jiya cajiniocua niquiriri riatelyanoori. Sonaque queraque niquiriri tiji roshinitiashiyanoori, na nacatucujiniji morojotasano.

Pedroocua roshinitiasaareejanaari.

¹²Sonaque jiniacuma quiriquiaari puetunu casaajanaa: sacocua, jiyacua rucoojuacanio, jiyocuacaanu jaacuatujua-cajuhuaaj. Cuno casamiiri quiquiaari Judiocuaca pueresano casaa puetunujua-naa. Maja nojori miaquesano.

¹³Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—iPedronaa, nocua quia sanere! Quia puecoore quia miaquesocoriquiano.

¹⁴Pedroori na riucuaere:

—iMaja cua Jiyaniijianaa! ¿Janiyatucua taa miaquere sacuraatia cua miaquesooni? iCunocujaari taribia quia sequesano canaa pueresocoriquiano!

¹⁵Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

¹⁶Pueyasoori naa pacutejoquiaari sequenu Pedrotej. Na nuhuaji, sonaqueeri tacanitasaaquiaariuhua jiyocuacaanu.

¹⁷Pedro tacaashacari naa na niquiniucua juhua na maquenujinatej, jiyacari Cornelio jiyaramiquishano pueyari tia tohuateyaji tiuquijioquiaari, Simón tia na pajetunura. Cornelio pueyari nequesoreetariquiaa nucuacoji nojori tiuquiniuria Simón tiajinia. ¹⁸Nojoriiri tohuateyaji nacaquiaari:

—¿Niya quiyate Simón jiyaniishano pueyano? Na sesaari Pedrojuhuaj.

¹⁹Pedroori juhuanajuaja niishiriojori-quiaa na niquishanojiniji juhua na

maquenujinia tia cacojiria. Pueyaso Sohuanuuri jiyacari na sequere:

—Pedronaa, jiuujianaraca pueya quia pajeya. ²⁰Tariucuaja. Quia sanerohua. Nojoriicua quia roseyarohua. Quiocua nojoritia quiaarohuajuhuj. Majaari taacanuunu. Janiyacuajaari nojori jiyaramiquiriucuaa quiocuani.

²¹Pedroori Cornelio jiyarosano pueyacu rosequiaari. Nojori sequeeeri:

—Janiyacuaja nia pajesano pueyanoni. ¿Casaacua nia niyareecuarani?

²²Nojoriiri na riucuaare:

—Canaa jiyaniijiaari Romano soldado-hua jiyaniijia. Na sesa Cornelio. Nojuajaari canaa jiyarorucuaa quiocuani. Maninia miiijia pueyanoori. Jiyaniijia Pueyaso tojjijiaariuhuj. Puetunu Judiocuacajanaari maninia na miiniucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

²³Pedroori Cornelio pueya tiuquinitia-quiaari na quijia tiajinia. Nojori sequereeri:

—Niyaja nia maqueseajaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaari-jiaariuhua Jope tiacajiniinio Jesuucua tiuunaa pueya.

²⁴Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiatajanaa, queraatia na rupenaatanio. Cornelioori puetunu nio pueyajanaa masuquiaari, nojori rerejonura juhuacarijia na tiajinia Pedro tiuquiyaquishacarijia. ²⁵Pedro tiuquishacari, Cornelioori nocua tohuata-quiaari. Carijiniacuma na naacuseeri. Pedroocuara mojuquetaquiaariiri juhua Pueyasoocuara. ²⁶Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaniya.

²⁷Tiaco na tiuquitasacari, pocojori-quiaa Pedrotaari. Pedro tiuquishacari, saaja queraatia pueya niquishiiri.

²⁸Pedroori nojori sequere:

—Taucuacanaa, niaacuajaari niishiya canaari Judiocuacani. Judiocuacaari rootasaaquiaari maja canaa rupuenura taucuaca, maja quenaaja tahue* tiajinia canaa tiuquiniuriajuhuaj. Saniniuujia, Pueyasoori quiarijia cua niishitorucuaa cutara maja cua soonura tamasa. Taucuacaari maja sacuaraatia quiarijia quiria. ²⁹Naaratej, cua niishishacari niaari cua masuurucuaa niyara, janiyari ritia canujiyarucuaani cua taacanuyaquiniutia. Cua totureja, ¿casaara nia masuurucuaa janiyani?

³⁰Cornelioori na riucuaare:

—Cuatro juucaari tari shoconujiya. Janiyari jiyacari Pueyaso secojoriquiaa juucua cua tiajiniani, pananu muecosecari. Jiyacaritij, pueyanoori cucua muetarucuaa. Jiyacaricuajaari quiriQUIAA, tee pananu tiuyanijia. Cuno pueyano toqueeri shacantuque quiriQUIAA. ³¹Cua sequereeri: “Cornelionaa, Pueyasoori quia secojosano tojirii. Naajuhuj, niishiyari taa quia niquitiojoQUIAA quia casami casamijiuniucuaani. ³²Naaratej, quia seya quia jiyaramiquiri Jope tiacajinia, cuaara Simón masuunucua quiatuura. Na sesaari Pedrojuhuaj. Nojuajaari na sesaanucua tiajinia quiya, shoniniacu caminia casaqueyaji. Tia camaruuri piiquiajinia shoqueya majeetejonu poonijiojua. Simón Pedro jaara nimia quia tiajinia, quita pocojonutaniiyari”. Pueyaso seruuri naa cua sequerucuaaqui Simónnaa. ³³Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiarijiani, puetunu

pajaniyajanaari niya Pueyaso niquiara quiyani. Naa quia pohuatate canaa tojishocoriquiano quiarijia, taa Pueyaso niishitiojorucuaa quiajaniya canaa quia pohuataturacuajani.

Pedro pohuatasacari Cornelio tiajinia

³⁴Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rimiajata na niquiniu pajaniya. Majaari nia jyaniniu Pueyasoori saaja Judiocuacaacia jiaatiaa, Israel pueya nojori quiniuucua. Maja. Nojuajaari tamasaacua jiaatiaajuhuj.

³⁵Tiquiyocua jiyacajinia Pueyaso secojojuua pueya quishacari, nojoriiri Pueyaso jiyanooshano pueya quiyajuhuj, maninia mijia nojori quishacari.

³⁶Pueyasoori na rupaa pohuataniquiaari puetunu canaa Israel pueyarajanaa, jiyanooshano canaa quiniuria Jesucristocua canaa tiuushacari. Nio Jesucristoori puetunu mijiria quiniaa Camarnujuanaa. ³⁷Tiuquinijiona Juanri Pueyaso rupaa pohuataquiaari pueya tiuquinijiosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiya-cuja na miishano canaa Galilea jiyajinia, na nuhuaji na miishano puetunu Judea jiyajinijanaanio. ³⁸Niaari niishiyajuhuj, Pueyasoori na Sohanu niquitioquiaari Jesu, na cumaaca na jiitianura. Nojuajaari maninia miiquiaari pueya, tiquiyocua na rucuanesacari. Cusosuhua naatanijiojuuari. Samaruhua camarnu sesosano jeecaquiaarijiaariuhuj. Puetunu naa mijia maninijanaari na Que Pueyaso quiniuucua nata. ³⁹Canaari puetunu na miishanojuanaa niquiquiaarini, puetunu canaa Judiocuaca jiyajinijanaa, Jerusalén tiacajiniajuhuaj. Janiyari seetanujuanaa canaa niquishano pohuataani. Na nuhuaji, pueyari na

teetequiaari niyacutesanojinia. Tii na cusojuatuquiaariiri. ⁴⁰Jiuujianaraca juucajinia, Pueyasoori na samiitiani-quiaariuhua. Jiyacaritij, na saquiriojosano pueyacia na mueratereeri. ⁴¹Majaari na muetanu quiquiaari puetunu pueyacuajanaa. Saaja canaacua muetaquiaariiri, teyano Pueyaso saquirio-joquiaari coteenu tariucuaaanucuajani, Jesujiniji pohuatannuuriquiano. Na samiitasacariuhua, canaari nata miaquenuquiaari mariyatani. Canaari nata raruquiaarijiiuhuj. ⁴²Jesu jaara canaa jiyaramiquiquiaari, nojuajaari canaa sequequiaari: “Naa nia pohuatate pueya niquiara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua nequesoreeriquianojuhuaj’ ”. ⁴³Tariucuaaanu pueyara Pueyaso sequesano caminiujuniaari naa juhuacarijia sequetuquiaari Jesujinijiiuhuj: “Cante noca tiuyani, nojuajaari jiyanooshaanunatinya sesa na miishanojiniji”.

Pueyaso Sohanu tiuquishacari taucuaca jiuujiajiniajuhuaj

⁴⁴Pedro pohuatasacarijia taucuaca niquiara, Pueyaso Sohanuuri Pedro tojitianaa taucuacaacia niquiaari, nojori jiuujiajinia na tiuquiniuria. ⁴⁵Pueyasocua tiuunaa Judiocuacani, Pedroti nijioquiaari Jope tiacajinijini, nojoriiri shiriquiquiaari Pueyaso niquitiosacari cuno taucuaca na Sohanu. ⁴⁶Cuno taucuacaari nojori niquiara pocooriquiaa tamaatia rupaacajinia. Pueyaso maniniuhuaqueetaturiquiaari. ⁴⁷Naaratej, Pedroori sequequiaari:

—Nio pueyari tari jiitiaa Pueyaso Sohanu noojiajinia, taa pa jiitiaacuaani. Naaratej, nojori cuara tiuquinijiosaria quiarijia. ¿Cantucua nojori tenujare maja na tiuquinijiosaanurani?

⁴⁸Pedroori na nuhuaji sequequiaari cuno taucuaca tiuquinijiosaanura

Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujrejaara canaata. Maja senota quianuhua.

**Taucuacajiniji Pedro pohuatasacari
Jerusalén tiacajinia**

11 ¹Jesu jiyaramiquishano pueya, mariyata puetunu Jesuucua tiuunaa pueyajanaa Judea jiyajinia, nojoriiri naa pohuatasaaquiaritij: “Taucuacanaari Pueyaso rupaacua tiuuriucuaajuhua”. ²Nocuai, Pedro jaara tacatequiaariuhua Jerusalén tiacajiniohua, narta Pueyaso pueyari na juaaquiaariuhua. Na juaaniaari taucuaca cararaatiuuquia co miatejonu panijiaa quiquiaari, taucuaca quiniuria seetanujanaa Pueyaso pueya nojoriria.

³Nojoriiri naa juaaquiaari Pedro:

—¿Casaara quia quiaarucuaa cuno taucuacaacuani? Nojoriiri maja Judiocuaa juhua pajaniya. ¡Quiaanaari nojoritia miaquejocanujuhua! Quia miishanoori maja maninia taa Pueyaso rootaquiaari tariucuacaanucujani.

⁴Pedroori suraatiaja nojori pohuataquiaari puetunujanaa tahuajiniji. Coteenu pohuataree na niquishano juhua na maquenujiniaari. Naa sequereeri:

⁵—Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucujiniji morojotasano niquiriini. Jiyareta cucujanaa roshinitia-saareeri. ⁶Cua niquishacari sonaquejinia cua niishiniuria casaate mii quiriquiaani, janiyari saa puereeta casami niquirijiaani. Janiyari niquiriini jiyacu rucojuaca, sacocuajuhua, jiyocuacaanu jaacuatujucanjo. Puetunujanaari pa miaquesocoriquiano pa pueresano casaa quiriquiaa. ⁷Janiyari jiyacari jiyocuacanu rupaa tojiriini. Cua sequereeri:

“Pedronaa, nocua quia sanere. Quia puecoore quia miaquesocoriquiano”.

⁸Janiyari saaja na riucaareeni: “iMaja cua Jiyaniijiana! ¿Janiyatucua taa miaquere sacuaraatia cua miaquesooni?”

⁹Jiyocuacaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. ¹⁰Pueyasoori naa pacutejocanu sequenu juucua janiyatej. Na nuhuaji, sonaque tacanitarohua jiyocuacaanuuri.

¹¹Jiyacaritij, jiuujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya.

¹²Nojori tiuquiyaquishacarijia, Pueyaso Sohuanuuri cua sequeree: “Quiocua nojoritia quiaare. Majaari taacanuunu. Majaari tahua soonu nojori quia rupesacari”. Naa cua tojinuucuatej, janiyari cunora juhujaniya nojoritia quiaarucuaani. Nio seis parta Jesuucua tiuunaa pueyari cuata quiojiyarucuaajuhua. Canaari mariyata cuno tahua tiajinia tiuquishiini. ¹³Tia camaruuri canaa pohuatarucuaa taa na niquiquianu Pueyaso seru na tiajinia nocua nujuaano. Pueyaso serunaari na sequeree: “Jope tiacajinia quia jiyarore quia seya, nojori cuaara quiaara Simón masuunuucua. Na sesaari Pedrojuhuaj. ¹⁴Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhua”. ¹⁵Saaja cua coteesacari Pueyaso rupaa pohuatanu nojori niquiara, Pueyaso Sohuanuuri nojoricua niquianu, taa pocua coteenujanaa na niquianucujani. ¹⁶Janiyari jiyacari niishiquii pa Jiyaniijia sequesanonni. Naa na sequesano-tej: “Juanri moojinia tiuquiniijia pueya. Pueyaso cutaraari na Sohuanuuri jiyaronutaniya niaacua, nioojiajinia na tiuquiniuria”. ¹⁷Naacujitij, taucuaca tiuushacari pa Jiyaniijiaacua, Pueyasoori

na Sohuanu niquitiorucuaa nojorijiuhuaj, taa na niquitiocanu pajaniyacuaani. Cante Jesucristoocua tiuyani, Pueyasoori na Sohuanu na niquitioya. ¿Janiyatucua taa Pueyaso sequeruruhuarini: “Maja cuno nojori niquitionu quia Sohuanu”?

¹⁸Jerusalén tiacajinia quiniaa Pueyaso pueya jaara tojiquiaari naa Pedro sequesantej, nojoriiri sanaajetaquiaari. Tama nojorijiaarijia Pueyaso maniniu-huaqueetaquiaari. Naa sequetuquiaariiri:

—iPueyasojuhuanaja jiyanoohua maninia! Nojuajaari taucuaca panijahuaj nojori tacatonura noojia sesa nojori miishanojiniji, jiyanooshano nojori quiniuriājuhuaj, pueyaracaanu nojori rishiniuria Pueyasota.

Antioquiya tiacajinia Jesu pueyajiniji pohuatasano

¹⁹Esteban jaara mosaquiaaricuaa, Judiocuacaari juhuacatecara Jesuucua tiuunaa miiquiaari naquiyājuhuaj. Queraatia Jesuucua tiuunaa pueyari nocuaji mashiyocuatquiaari. Nojoriiri tiquiyocua niaquejoquiaari. Noojiaqueyari na mashiyocuatyacari tiuquijioquiaari Fenicia jiyajinia. Tamasacaari tiuquijioquiaari Chipre jiyajinia. Noojiaqueyari Antioquiya tiacajinia tiuquijioquiaarijiu-huaj. Nojoriiri tii pohuatanuquiaari Pueyaso rupaa Jesujiniji saa Judiocuacaraja, maja taucuacara. ²⁰Mashiyocuatunaa tajinia quiquiaariiri Chipre jiyajininio pueya, Cirene tiacajininio pueyājuhuaj. Nio pueya jaara tiuquijioquiaari Antioquiya tiacajinia, nojoriiri Jesujiniji pohuataquiaari Griegohua niqiarājuhuaj. ²¹Jiyaniijia Jesu cumaacaari nojoritia quiquiaarijiu-huaj. Naacuajitij, queraatia Griegohuari tariucuaacaanu tama nojori niishishanojuaja cartequiaari, Jiyaniijia Jesu tojijiaa nojori quiniuria.

²²Jerusalén tiacajinia quiniaa Pueyaso pueya jaara nio niishiquiaari, nojoriiri

Bernabé jiyarotuquiaari Antioquiya tiacajinia. ²³Bernabé jaara tiuquiquiaari nojoriicua, nojuajaari jiyanoohua shuquiriquiaari na niquishacari taa Pueyaso miiriucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyara-caanu. Majaari nocua tiuuniu nia cartenu. Suraatia na tojijiaa nia quiri.

²⁴Bernabeeri jiyanoohua maninia pueyano quiquiaari. Pueyaso Sohuanuuri noojia cumaquiquiaari jiyanoohua. Naacuajitij, na pohuatasacari Jesujiniji, queraatia pueyari Jiyaniijiaacua tiuquiquiaari.

²⁵Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiyataquiaari Antioquiya tiacajiniaari. ²⁶Nojori quishacari Pueyaso pueyata cuno tiacajinia, nojoriiri tii shocotequiaari niquiriyatu marijia. Nojoriiri queraatia Pueyaso pueya niishitiojonuquiaari. Tii Antioquiya tiacajiniani, Jesuucua tiuunaa pueyari coteenu sesojosaaquiaari “Cristiano”. Nioori pueyano rupaaajinia sequeshiya “Cristo tojiniaa pueya”.

²⁷Cuno quishacari, Jerusalén tiacajiniji Pueyaso sequenu panishano caminiujiunaa pueyari tiuquijioquiaari Antioquiya tiacajinia. ²⁸Tamonu nojorijinjinioni, na sesa quiquiaari Ágabo. Nojuajaari Jesuucua tiuunaa pueya rerejonaa tajiniji nujaquiaari pocuanura. Naa caminiujiuquiaari Pueyaso Sohuanu niishitosano nojuajaari:

—iPueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequiaariiri Ágabo. Cuno miaajenuuri quiquiaari Claudio quishacari jiyaniijiajanaa, Césartu-huaj. Nojuajaari Roma tiacajiniji jittiaquiaari puetunu jiyacajanaa. ²⁹Antioquiya tiacajinia quiniaa Pueyaso pueya

tojishacari naa Ágabo sequesantej,
nojoriiri sequequiaari:

—iJudea jiyajinia quiniaa parta
Pueyaso pueya pa naacure!

Nojoriiri naa miiquiaari. Naaratej,
cante queraatia cumaneece jiitiaquiaari-
ni, nojoriiri queraatia niqutioquiaari.
Saniniuuja, cante maja puera cumanee-
caraca quiquiaarini, nojoriiri secaya
niqutioquiaari na jiitiasanojiniji. ³⁰Na
nuhuaji, nojoriiri nareja na niqutiojosa-
no cumaneece jiyarotaquiaari
Bernabeeta, Saulotanio. Nojoriiri Pueyaso
pueya jiitianaa niqutioquiaari saniniuu-
ja Judea jiyajinia.

**Jacobo nacatasaanujiniji pohuatasano,
Pedro nujuatesaanujinijino**

12 ¹Jiyacaritij, Herodesri* jiyaniijia
quiquiaari Judea jiyajinia. Nojua-
jaari Jesuucua tiuuniaa miiquiaari
naquiya. Noojiaqueya quiootequiaari na
sanitiosocoriquiano nujuatejojuajiniaari.
²Naa Juan tarajanu Santiago motequiaa-
ricuajaari nijiniaquetucua ja mueruuta.
³Judiocuacaari shuquiriquiaari naa nojori
jiyaniijia motesacari Santiagotej.
Naaratej, Herodesri Pedro quiatequiaari
na soldadohuajuhuj, Judiocuaca
timitianura socua nojuaja. Pedroori
quiasaaquiaari Judiocuaca queranacu-
nuusacari, nojori sasacari pan na
poreetajaaju majeetesano. ⁴Pedro
quiasaanu nuhuaji, Herodesri na nujuate-
quiaari nujuatejojuajinia. Na tohuatenu
paniriquiohua juucua Pascua* nuhuajiiri,
na nequesoreesocoriquiano puetunu
quiniqui quiniaa Judiocuaca niquiaraja-
naa. Dieciséis soldadohuari Pedro
cojuariquiaa pueyaracaanu. Nocua
sanitijiootoquiaariiri; coteenu cuatro, na
nuhuaji socua cuatro. Nojoriiri naa
sanitijiootoquiaaritij. ⁵Pedroori maninia
cojuasaaquiaari nujuatejojuajinia.
Jiyacaritij, Jesuucua tiuuniaa pueyari

saniniuuja nocuara secojonuuriquiaa
jiyanohua, Pueyaso naacunura Pedro.

**Pueyaso mashiquishacari Pedro
nujuatejojuajiniji**

⁶Cuno niucujani, na juhuaqueyaqui-
shacarijia, quera Herodes tohuatesee
tariquicuaji Pedroni, na nequesoreesoco-
riquiano puetunu pueya niquiarajanaa.
Pedroori caapiqui soldadohua tajinioco-
ma maqueriquiaa, maninia saatijiotasano
cumayocuata na numatucua cajiniocua.
Tamasaca soldadohuari nujuatejoju
tohuateyaji cojuariquiaacujua. ⁷Jiyacari-
tij, Pueyaso seruuri canashiyaquiji
coretaquiaari jiyareta Pedro shuriucua ja-
naa nujuatejoju jiniacuma. Na
shacantuucaari jiyano hua cuhuataquiaari
nujuatejoju. Pueyaso seruuri Pedro
jiuquiriri na shuucua. Na niucujareeri.
Na niucuasacari, na sequereeri:

—iRitia quia sanere!

Cumayocuari tamajaaja saacarejeta-
quiaari Pedro numatucuaacujaji. ⁸Pueyaso
seruuri na sequereejuhuj:

—iQuia cajiniocua camarucujua quia
saatiri socua! iQuia sapatu quia
cushirijuhuj!

Pedro jaara naa miiquiaari puetunu na
sequesanojuanaa, Pueyaso seruuri socua
na sequerohua:

—iQuia toque quia cushiri ritia!

Majaari tarishiniu. iQuiocua cua nuhuaji
rupaashijia!

⁹Pedroori ritia Pueyaso seru nuhuaji
sacuariquiaajaa. Jiyano hua jiyajeneri-
quiaari. Majaari na niishiniu quiriquiaa
puetunu na niquishanojuanaa. Nojuajaari
jiyaniriquiaa na maquenujinia niquiya
naasucua. ¹⁰Nojoriiri coteenu shocoma
na tajoji cojuanaa soldadohua. Socua na
tajoji cojuanaa tajitumiaajaariuhuj.
Naa quenaacaturee nujuatejoju tohuate-
yajiiri. Nojuajaari Pueyaso seruta
nujuatusee jiyareta tohuateyaji. Tohuate-

yari cumueeca casaata shipinishano quiquiaari. Jiyacaritij, tohuatayari tamajaaja riatequee. Nojoriiri tohuareeta-maa carijiniacuma. Pueyaso seruuri Pedro jiyatariquiaa sapuenujuaara tiaca jiuujiaaco. Na nuhuaji, na shuriucuaji shaajequeeri. ¹¹Pedroori jiyacari shusha niishiquii. Naa sequeereeri:

—iSeetanujuaanaaqi quiriquiaa! iCua Jiyaniijiaquiiri na seru jiyaroree cucua, na mashiquiniuria janiya Herodescuaji, cuarta Judiocuacaacuajjiuhuj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

¹²Nojuajaari naa na niishiriojonuta María tijinia quiaquiaari. Nio Maríacuajaari tamonu Juan nucua. Cuno Juan sesaari Marcojuhuaj. Cuno tijinia, queraatia Pueyaso pueyari Pedroocuara tii secojonuuriquiaa jiyacari. ¹³Pedroori jiyacari piquiquiaari carijiniacuma mataka tohuatayaji. Tiaco seruuri na tojiquiaari piquiyano. Nio seru sesaari quiquiaari Rode, niyacoo. Nojuajaari juucua catecanoquiaari tohuatayaji, na niquiniuria cante quiriquiaani. ¹⁴Nojuajaari saaja Pedro tojishii tia camaru jiyaniquiyano, na tiotiu na riatanura nocuaji. Niyacoo tojishacari seetanujuaana Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenu-raari. Nojori sequesuhuari:

—iPedrocuajaqui nooj, tohuatayaji nujuaatej!

¹⁵Pueyari saa niyacoo riucuaquiaarijia: —¿Quiaate paateya? Teyano Pedrote nujuatesaarucuaacuajani.

Niyacoori nojori sequenu pacutequiaa-riuhua:

—iTaaquiriirinij! iPedrocuaaquiniate-jaj, nooj nujuaatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuajaja.

¹⁶Nojori nacojosacari tiaco, Pedroori tohuatayaji piquijioriquiaajaa. Tiotiu jaara socua riatasaaquiaari, nojuacuajaari quiriquiaa. Pueyari na niquishacari shiriqitiuquiaari. ¹⁷Pedroori nojori sanaajaree jiyacari na juaashiquiata. Cuniqui quiniaa pohuatareeri taa Pueyaso tohuaterohua nojuaja nujuatejojuajinijini. Pedroori naa sequequiaari nojoritij:

—Niocua naa pohuatare Santiagojuhuaj, parta Jesuucua tiuuniaano.

Na nuhuaji, Pedroori tiji tohuatacuhua. Tamaqui quiaareeri.

¹⁸Jaara juhuaquequiaari, nujuatejojuajinia cojuanaa soldadohuari jiyanohua shiriqitiuquiaari. Majaari nojori niishiniu quiquiaari taa Pedro miirii nujuatejojuajiniji nojori tajinijini. Tama nojorijiaarijia na sequetuquiaari na puerenuta:

—iPa jiyaniijia Herodesri quiarijia pa puecoonutaniya, maninia pa cojuaaquiniucua Pedro!

¹⁹Herodes niishishacari, na shuriucua nujuatunaa soldadohua jiyaroquiaariiri nujuatejojuajinia nojori pajenura Pedro. Nojori jaara na riuriataaquiquiaari, Herodesri nujuatejojuajinia Pedro cojuanaa soldadohua nequesoreequiaari na juaaniutia, na niishiniuria juucua taa Pedro juurequeree nojori shuriucuajini. Na nuhuaji, Herodesri jiyanohua na juaaniutia na shuriucua nujuatunaa soldadohua sequequiaari, nojori puecoonura narta soldadohua, nojori cojuaaquiniucua maninia Pedro nujuatejojuajinia. Naa na miiniu nuhuajitij, Herodesri Judea jiyajiniji pacuquiaari. Cesareya tiacajinia quishiiri.

Herodes shaajenujiniji pohuatasano

²⁰Jiyacaritij, Herodesri jiyanohua juaariquiaa Tiro tiacajinia quiniaa pueyata, Sidón tiacajinia quiniaatanio. Nio caapiqui tiacajinijinio pueyari

jiyaniijia Herodes tiajinia quiojoquiaari nata nojori pocoojonura juucua. Majaari cuno juuca nojori pocoojonu quirii jiyaniijia Herodesta. Nocuai, nojoriiri Herodes seru sequeeree:

—Quiocua quia jiyaniijia sequere, canaa nata jiyanootoonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaarijaariuhua. Tiro tiacajiniji pueya, mariyata Sidón tiacajinijinio, nojoriiri na cumaneecata masetujua na mialesocoriquiano jiyaniijia Herodes jiitiasano pueyajiniji. Nojoriiri jiyamitia jeecatoonu paniriquiaa cuno jiyaniijia, maninia nojori quiniuhua nata, Herodes niquitiojotenuhuara na jiitiasano pueya na miajajaura Sidón tiacajinijinio pueya, Tiro tiacajinijinio pueyano.

²¹Herodes seruuri nojori sequequiaariuhua:

—Niocuana tamonu juuca nimia, jiyaniijia nia pocoojonura.

Na nuhuaji, cuno pueyari na sequesano juucajinia niquiaariuhua. Jiyaniijia Herodesri nojoriicuaji maniniushiquiaari. Na maniniuqui toque cushiquiaariiri. Jiyaniijiaacuajinio shipinishano cajitujinia cajiriohuari. Tiji pocuaquiaari cuno pueyacuaari. ²²Puetunu cuniqui quiniaa pueya tojishacari naa maninia Herodes pocuaano nojori niquiaratej, nojoriiri nacoonu coteequiaari. Naa sequetuquiaari na nacoosacariiri:

—iNio pueyano pocuaani, majaari nareja pueyano! iNojuajaqui Pueyaso!

²³Pueya sequesacari naa Herodestej, nojuajaari juhua shuquiuriosaaquiaari saajaruhua. Majaari quenaaja cuno pueya na sequenu quirii: “Maja naa cua sequetunutej. Janiya maja Pueyasoni”. Nocuai, Pueyaso seruuri canashiyaquiji na tojetequiaari. Na pocuasacariija cusomaari. Na sarapiyari na jiniacuma

miaquequiaari. Naa cusotaquiaari tama na sarapiyajaarija.

²⁴Pueyaso rupaari saniniuuja socua niyacasaquiaari, tiquiyocua pohuatasacari puetunu pueya niquiarajanaa. Naacuajitij, Pueyasoocua tiuninia pueyari socua queraatiara canequiaarijuhua. ²⁵Bernabé, Saulonio, nojori jaara niquitioquiaari cumaneeca Jerusalén tiacajinia Pueyaso pueya jiitianaa, nojoriiri ritia quiojoquiaariuhua Antioquiya tiacajiniohua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijuhua Marco.

Saulo Bernabeeta rucanejonu coteesacari Jesujiniji pohuatanura tiquiyocua

13 ¹Antioquiya tiacajinia Jesuucua tiuninia pueyajinijionni, nojiaqueyari quiquiaari Pueyaso sequenu panishano Pueyaso pueyara caminiujunina. Quiquiaarijaariuhua Pueyaso Rupaa niishitiojonaa. Noiori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijaariuhua Manaén. Nojuajaari mariyata Galilea jiyajinia jiyaniijiarano Herodesta canashitijosaaquiaari. Quiquiaarijaariuhua Saulo. ²Tamonu juuca, puetunu nojorijianaari Pueyaso secojonuuriquiaa. Cuno juucajuhuaj, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequesquiaari tariucuaanucujani.

³Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanoahuari. Na secojonuunu nuhuaji, nojoriiri Bernabé nacaacua, mariyata Saulo nacaacua

niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanhua Pueyaso Sohuanu cumaacata.

Jesujiniji pohuatasacari Chipre jiyajinia

⁴Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijiaara nucuaco Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuuca buquejinia Chipre jiyanishano jiyajiniara. Chipre jiyari jiya tucuaatiaja, shoniniacu caminia jiuujajinia. ⁵Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tiajiniaqueyajanaari. Juanri nojoritia quiriquiaajuhua, nojori naacuri-quiano. ⁶Naa nojori rucoojosacari Pueyaso rupaa pohuatanura Chipre jiya tucuaatiajaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacua-ja Pueyaso sequenu panishano caminiujunina pajaniyarani”.

⁷Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanhua niishijia quiquiaari. Nojuajaari Bernabé masuuquiaari Saulonio, nojori pohuatanura Pueyaso rupaa nojuaja. ⁸Cuno shimiacu sesaari Griego rupaajinia sequesaaquiaari Elimas. Nojuajaari saaja cuno jiyaniijia niquiara cuaracashitiquiaari Pueyaso rupaa. Naa sequeeree cuno jiyaniijiaari:

—Maja cuno pojori tojinu. Jiyanhua sesaari nojori pohuatasano. Quia sapojotiyano.

⁹Saulo sesaari Pablo quiquiaarijiihuaj. Jiyacari, Pueyaso Sohuanu cumaquishacari nojuaja, Pabloori jiyanhua shitimia shimiacu jiquioco shootiaree naa na sequesacari nojuaja:

¹⁰—iSesaaca niyanu sequenaa! iManinia miijiaca paracaajianaa! ¿Casaa-ra pueya quia tenujiya Pueyasooquajini?

¹¹iCua Jiyaniijiaari quiarijia quia saniitio-nutaniya! iQuiaari cariyojuarura quiniutianiya seetanujuanaa! iQuiaari pasaja tarishiniutianiya cariyojuaru quia quishacari!

Jiyacaritij, juhua niniquiaari na namijiajinia cajimias. Cariyojuarura quiquiiri. Juhua ninishiqui quiaquejo-quiaari puetunu cunocojuanaari, na juaashiquiaajiniji na jaatucusaanura juucua. ¹²Cuno jiyaniijia jaara naa niquiquiaaritij, Pueyasooqua tiuuriiri na niquiara nojori pohuatasacari shanhua Jiyaniijia Jesujiniji.

Pablo, Bernabé quishacari Antioquiya tiacajinia, Pisidia jiyajinia

¹³Pabloori na cojiniaata Pafos tiacajiniji quiaquiaari buquejinia Perge tiacajiniara, Panfilia jiyajinia. Juanri Perge tiacajinia cateseequiaari nojoriicuaaji. Tiji riujiuquiaariuhua Jerusalén tiacajiniohuari. ¹⁴Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisidia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujua tiajinia. Na tiuquishacari, cajitiushiiri. ¹⁵Jiyacaritij, tariucuaacaanu Moisés Rootasanoori serojosaaquiaari. Tariucuaacaanu Pueyaso sequesano caminiujuninaa naajiotasanoori serojosaaquiaarijiihuaj. Na nuhuaji, rerejoja tia camarnuuri naa sequequiaari Pablo, Bernabeenio:

—Cuarta Judiocuacanaa, niaa jaara Pueyasojiniji nia niishishano casaa

sequenu paniri, nia niishitiojore quiarijia niya quiniaa niqiuara.

¹⁶Pabloori sanequiaari. Na juaashiquia-ta sanaajaree pueyari. Naa nojori sequeereiri:

—Nia tojitiare cuarta Israel pueyanaa, niajanijahuaj, canapute Pueyaso tojitiajacacuajani tamasaca pueyapuejini-jinio. ¹⁷Paari sequequiaani: “Pueyasoori pa Jiyaniijia, Israel pueya pa quiniuu-cua”. Seetanujanaa, paacujajari Pueyaso saquiriojosano pueyacuajinion. Tariucuaaanu, Pueyasoori maniniushi-quiar pa supuetanaa saquiriojoquiaari na pueyara quiriquiano. Na nuhuaji, jiyanhua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiqui-quiaari cuno jiyajiniji na cumaacata. ¹⁸Cuarenta marijiaari pa supuetanaa shoconujuquiaari pueyaracaanu nojori rucoojosacari najuhuaa carliquia jiyajinia. Pueyasoori jiyacari nojori rejeretaquiaari na tojitiaaquishacari nojuaja. ¹⁹Na nuhuaji, Pueyaso cumaaca-ta, siete tamaatiuucua rupaa pocuajaca taucuaacari puecoosaaquiaari Canaán* jiyajiniji, saniniujia cuno jiya na niquitiosocoriquiano pa supuetanaa. ²⁰Pa supuetanaa jaara Canaán jiya camaruhua quiquiaari tari, socua cuatrociento cincuenta marijiaari nojori shoconuju-quiaari saaja nequesoreenaa jiitiasacari nojori. Na nuhuaji Samuelri nojori nequesoreenara jiyatesaaquiaarijiuhuj. Nojuajaari Pueyaso sequesano caminiujunia quiquiaarijiuhuj. ²¹Samuel quishacarijia, pa supuetanaari Pueyaso secojonuuquiaari na panitushacari jiyaniijia, nojori jiitiariquiano nequesoreenaa niti. Naacuajitij, Pueyasoori nojori jiyaniijia jiyatequiaari Saúl, Cis nianu, supuetana Benjamín niquiohuacuajinio supueno pueyano. Saúlri nareja cuarenta marijia shocotejoquiaari pa supuetanaa

jiyaniijia na quishacari. ²²Na nuhuaji, Pueyasoori Saúl soojotaquiaariuhua Saúl tojiyaquiniuucua nojuaja. Saúl niti David jiyatequiaariuhua Israel pueya jiyaniijia-ra saniniuurijia. Pueyasoori naa sequequiaari Davidjiniji, na timitiasacari nojuaja:

“Isaí niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miinitia-niyajanaa”.

²³Quiari naataja, Pueyasoori na sequesano tohuateequiaari na mueratesacari pocuaji Tacuna. Nojuajaari Jesu, David niquiohuacuajinio supuenoni. Pueyasoori na seerataquiaari Israel pueyacuaji Tacuna quiriquiano, taa na sequequiaari tariucuaaanucujani. ²⁴Jesu coteyaquishacarijia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niquiarajanaa. Tiuquinijiona Juanri nojori sequequiaari noojia nojori tacatonuhua Pueyasoo-cua, naajuhuj, moojinia nojori tiuquinijiosaanura, Pueyaso tojjijara nojori quiniuria. ²⁵Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosanoni taa nia jiyaniquiaa najuhua-na janiyacujani. Na Jiyarosano cutaraari cua nuhuaji niniutianiya. Nojuajaari seetanujanaa Jiyaniijiajanaa cutara. Janiya maara jiyanhua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

²⁶Cuarta pueyanaa, niajanিয়া cante Abraham niquiohuacuajinio pueyacuajani, cua tojitiare, niajanijahuaj taucuaacanaa, canapute Pueyaso tojjijiacacuajani. Niaaranoori nio maninia rupaa Pueyasojiniji, nia jiyanooshaanura

sesa nia miishanojiniji. ²⁷Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiuniu quiquiaarijiuhuaq Pueyaso sequesano caminiujiuniaa naajiotasano tariucuacaanu. Cunoori najuhuaa nojori serojonuusano puetunu samaatenu juucajanaa. Naacuajitij, nojori jaara moquiaari Jesu, maninia tohuateequiaariiri Pueyaso sequesano caminiujiuniaa naajiotasano, taa Jesujiniji sequesaaquiaari tariucuacaanucujani. ²⁸Jesuuri seetanujanaa maja na miiniu quiquiaari sesa. Tama nojorijiaarijia juhua sesa mijiara na jiyatequiaari cutara. Naacuajitij, Pilato sequetuquiaariiri cuaara na moteeranoj. ²⁹Nojori jaara tari miquiaari taa nojuajiniji naajiotasano quiya tariucuacaanu Pueyaso Rupaajiniaacuajani, na roshinitiuquiaari niyacutesanojinijiiri. Raaco na niatureeri. ³⁰Naajaa, macu na quishacari, Pueyasoori saaja na samiitianiQUIARIUHUA. ³¹Na samiitianu nuhuaji, Jesuuri sequeyarucua na pueyacia mueranacujuquiaari, noo pojoriicua canapute na tarajaquiaari na quiasacari Galilea jiyajiniji Jerusalén tiacajiniaracuajani. Nojoricuajaari quiarijia nojuajiniji poojotaniuhua puetunu pueya niQUIARAJANA.

³²Canaari timiyani canaa pohuatasacari niajaniya, iPueyaso pohuatasano pa supuetanaari tari tohuateecanu! iPocujaji Tacunacuajaari tari miquianu puetunu pa jiyanooshaanurajanaa! ³³Seetanujanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacuajinio pa quiniucua. Pueyasoori tari tohuateecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia* na sequesano quiyacuajani. Naa naajiotasano quiyari segundo Salmojinia:

“Quiaari cua Niyanucujaja. Janiyari quiarijia quia samiitianiriini”.

³⁴Pueyasocujajaari sequequiaari, nojuacuajaari na samiitianiniutianihua na moqueyaquiniucujaji na raaco. Nioori naajiotasano quiyajuhuaq tariucuacaanu Pueyaso Rupaajinia. Naa sequeyari:

“Janiyari maninia niaara miiniutiani-yani taa cua sequequiaari Davidcuajani”.

³⁵Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

³⁶Pueyanaa, paari seetanujanaa niishiyan Davidri puetunu Pueyaso panishano na miiniu nuhuajijianaa shaajequiaari.

Nojuajaari na supuetanaa rupuequiaari macunucua quiquiojinia. Na cuaqueyari seetanujanaa moquequiaari cutara.

³⁷Noo Jesu saniniujia, Pueyaso cutaraari na samiitianiQUIARIUHUA. Majaari na moquenu quiquiaari cutara. ³⁸Cuarta

Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji jiyanooshaanutaniya. ³⁹Moisés Rootasanojinia, paari tariucuacaanu niishitiojosaaQUIARIINI pa

seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniujia. Majaari seetanujanaa pa jiyanooshaanu quiquiaari naa pa miishacariitij. Quiarijia cutara, canapute Jesuucua tiuya saniniunijia, nojoriiri puetunu sesa na

miishanojinijijianaa jiyanooshiya. ⁴⁰Niaa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaa saniitionutaniya taa tariucuacaanu Pueyaso sequesano caminiujiuniaa sequequiaaricuajani. Naa sequetuquiaariiri:

41 “Nia tojitiare, rerequetejacanaa.

Niaari jiuujiatenutaniya najuhua-naj. Na nuhuaji, niaari shaajasaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyani. Tamasaca jaara nia pohuatate, niaari saaja na cuaracashitiniutia-niya”.

42 Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriquiaajuhuj. Nio taucuacaari Judiocuacaacua pacunaa quiquiaari, Judiocuaca nojori quiniuriajuhuaj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

—Niocua tamonu sábadó canaa pohuatateeruhuj, socua canaa tojiniuria Jesujiniji.

43 Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucuacajinjinio Judiocuacaacua pacunaanio. Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasocua tiuujia nia quiri. Majaari nocuaji taacanunuu. Nojuacuajaari pa cumaquijia.

44 Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniucua rerejoquiaari. 45 Judiocuaca secojojua tia camarucua jaara niquiquiaari queraatia pueya na rerejojuajinia mishiyano, Pablo pohuatasano na tojitianura, nojoriiri juaaquioquiaari. Nojoriiri tama sequetooquiaarijiaaja:

—Puetunu pueyajanaari cuno pojori tojitiajacara quiniutianiya. Pa tojiyaquiniutianiya saniniurijia.

Naa sequeturiquiaa pueya niquiara Pablojinijiaariuhuj:

—iPabloori maja maninia na niishiniu Pueyaso rupaa! iNajuhuaana sesa pohuataano! iNojuajaari niishiyashijia!

46 Pabloori saaja Bernabeeta sequequiaari na puereyaquiniutia:

—Maniniacuajaqui, cuarta Judiocuacanaa. Canaacujaari naa panitijaja niajanijatej, Pueyaso rupaa canaa coteetanura pohuatanu niajanija, Pueyaso saquiriojosano Judiocuaca nia quiniucua. Niaacuajaari saa na ruuretareejaa. iMajaquiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniujia taucuacaacua quianutaniyani, Pueyaso rupaa canaa pohuatanura nojori niquiara.

47 Canaa Jiyaniijia jaara canaa jiyaramiquiquiaari, nojuajaari naa canaa sequequiaariti: “Quia jiyatequiaari mijiria cuhuatariquianonijia. Quia pohuatasano janyajiniiri caminiujishaanutaniya taucuaca niquiara puetunu jiya puequeetujinijanaa, Pueyaso jiyanooniuria nojorijihuhuj”.

48 Cuniqi quiniaa taucuaca jaara naa tojiquiaari sequeshiyanotej, nojoriiri shuquiriquiaari. Pueyaso rupaa maniniu-huaqueetareeri. Sequetureeri:

—iJiyano hua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriquianocujani, pueyaracaanu nata rishiniuriacuajani, jiyacariti, nojoriiri Jesuucua tiuquiquiaari. 49 Jiyaniijia rupaari pohuatasaaquiaari puetunu cuno jiyajinijanaa. 50 Judiocuacaari na juaaniutia Pueyaso panijia maajipohua shiniujiquiaari na cojituniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucujaariuhuj, mariyata cuno jiyajiniji nojori taanuunura Pablo,

Bernabeenio. ⁵¹Naaratej, na nuhuajiria, Pablo, Bernabeenio, nojoriiri na niohuacajiniji seseeca rapijionuutaquiaari. Naacuajitij, Antioquiya tiacajinia quiniaa pueyari niishiquiaari, Pueyaso saniitosacari nojori, majaari nojori Pabloocua, Bernabeecua na tiuutianu quiniutianiya Pueyaso jiyanoaquisacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. ⁵²Jesuucua tiuuniaa pueyari saniniuujia shuquiriaatia jateequiaari Antioquiya tiacajinia, nojori jiitiasacari Pueyaso Sohuanu.

Pablo, Bernabé quishacari Iconio tiacajinia

14 ¹Pablo, Bernabeeta naa miiquiaa-rijihua Iconio tiacajinia. Nojoriiri narta Judiocuaca rerejojua tijinia tiuquitiaquiaari. Nojoriiri tii pohuataquiaari Jesujiniji puetunu nojori niqiarajanaa. Queraatia pueyari Jesuucua tiuquiaari, Judiocuaca, taucuacano. ²Noojiaqueya Judiocuacajinijinoori maja na tojinu paniniu quiquiaari Jesujiniji pohuatasano. Cuno pojoriiri taucuaca shiniujuquiaari nojori juaaniuria Jesuucua tiuuniaa pueya. ³Pabloori, Bernabeeta cunora socua jiyojequiaari pueyaracaanu cuniqui, Jesuucua tiuuniaa nojori cumaquiniuria. Nojoriiri maja na puerenu quiquiaari Jiyaniijajiniji nojori pohuatasacari. Seetanujuanaa, Jiyaniijaari nojori naacuquiaari jiyanoa cutara maninia miishano nojori miiniuria, pueya naatani-jionurajuhua. Jiyaniijaari nojori naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano. ⁴Cuno tiacajinia quiniaa pueyari raquitiquiaari. Noojiaqueyari tama narta Judiocuaca tojiquaarijiaja. Saniniuujia, tamasaacari Jesu jiyaramiquishano pueya tojijia quiquiaari. Nojoriiri naa quiquiaari cuno

tiacajinia. ⁵Naa nojori quishacaritij, Judiocuacaari taucuacata rojotooquiaari cuno tiacajinia jiyaniijianucuata. Naa rojotooquiaariiri nojori sesacanura Pablo, Bernabeenio, na jacutunura saitiajuhuaj. ⁶Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatu-quiaariiri Licaonia jiyajiniara. Nojoriiri Litra tiacajinia quiojoquiaari, Derbe tiacajinariano, cuno caapiqui tiaca shocua quijiaa tiacajiniajuhuaj. ⁷Nojoriiri tii poojotaquiaari Jesujiniji nojori niishishano.

Litra tiacajinia pueya jacutusacari Pablo saitia

⁸Litra tiacajinia quiquiaariiri sesaruno-cua pueyano. Majaari na rucuanenu quijia. Nojuajaari na rasaaquiaarijuhua-najaj. Majaari na pooniniu quijia na cajituijiniji. ⁹Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujuanaa tiuuriquiaa na pohuatasanoocua. Naa Jesuucua na tiuuniuucuatej, Pabloori niishirii cuno pueyano na naata na cashacu jeequenu-hua. ¹⁰Pabloori jiyamitia jiyanoa na sequeree:

—iManinia quia nujuare! iMaja porequetanu!

Cuno pueyanoori ritia sanequee. Rucuanenu saniriiri. ¹¹Cuno Licaonia pueya jaara niquitiuquiaari naa Pablo miishanotej, nojoriiri tama na rupaajinia-jaaja sequetquiaari:

—iCumaacaraca quijiaacari juhua pueyasohua pocua rosetareeni, juhua pueya niquishano!

¹²Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaajinia-jaaja. Cuno pueyari Bernabé sesojoree Júpiterta, juhua nojori pueyaso sesa.

Pabloori sesojosaareecujua Mercurio, jiyanoehua pocuanu niishijia na quiniucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiitiasano juhua na pueyasohuara cuno jiyajinia. ¹³Júpiter secojojua tiaari Listra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca jaatucunuquiaari, Pabloocuara nojori puecosocoriquiano Bernabeecuaranio, juhua nojori pueyasohuacuara. Maniniushitajara naana shuucua shiyosano patootaquiaarijiaarihuaj. Cuno pueyanoori puetunu pueyatajanaa Pablo, Bernabé shuquiritanu paniriquiaa juucua, juyaca na puecosacari nojoriicuara juhua Pueyasoochuara. ¹⁴Pablo, Bernabé jaara niquiquiaari na cuno pueya miiniu paniano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaari nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

¹⁵—¡Pueyanaa! ¿Casaara naa nia miya canaani? ¡Canaari nareja pueyani taa niajanayacuani! ¡Canaari naacua niyarucuaa niaacuatej canaa sequenura niajanaya, puetunu nio najuhuana nia miishanojuanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. ¹⁶Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuaja. ¹⁷Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocori-

quiano pa jiitianura queraatia, shuquiriaatia pa quiniurajuhua.

¹⁸Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuara na puecoonu panishano juyaca.

¹⁹Jiyacaritij, Antioquia tiacajinijinio Judiocuacaari tii tiuquijioseequiaari, Iconio tiacajinijinionio. Nojoriiri cuniqui quiniaa nasojosee Pabloocuara, Bernabeecuaranio. Cuniqui jacutree saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. ²⁰Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

²¹Jaara Jesujiniji pohuataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajiniji riujiuutiaquiaariuhua. Tiuquijioquiaariuhuari Listra tiacajinia, Iconio tiacajinia, Antioquia tiacajinianio. ²²Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapute Pueyaso shuriucua quiriqianoni, nojoriiri naquiya miiniutianiya mijiria.

²³Nojoriiri maninia Pueyaso tojijiaca pueya saquiriojotuchiaari, nojori jiyatesocoriquiano Pueyaso pueya jiitariquiano. Naa miituchiaari puetunu cuno tiacajinijanaari, Pueyaso pueya jiitianura tama nojori nacasunaajaaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocuara:

—Canaa Jiyaniijanaa, nio pueya quiocua tiuuijacani, nojori quia naacure quiocua tiuuniaa narta pueya nojori jiitanura maninia.

Pablo tacatesacarihua Bernabeeta Siria jiyajinia Antioquiya tiacajiniara

²⁴Nojori riujiuuniuhua Antioquiya tiacajinihuara, Pisidia jiya shocotomohuari. Na nuhuaji, tiuquijioquiaariuhua Panfilia jiyajiniaari. ²⁵Tii Pueyaso rupaa pohuatatuquiaari Perge tiacajiniaari cuno pueya niquiara. Nojori pohuatanu nuhuaji, Atalia tiacajinia quiojoquiaarijiaariuhua. ²⁶Cuniquiji, buquejinia jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuacaanu nojori quiojonura Pueyaso rupaa nojori pohuatanu taucuaca. Cunoori quiquiaari shushajanaa nojori coteenu panishacari rucuanefonu tamaquicua. Naacuaajitij, nojori tohuateenu nuhuaji puetunu Pueyaso panishanojuanaa, jiyacari shusha tiuquijioriquiohuari. ²⁷Antioquiya tiacajinia nojori quishacari tari, nojoriiri puetunu Jesuucua tiuunia pueya masuunujuquiaarijianaa. Cuniqui pohuataturee puetunu nojori niquiarajanaari, taa Pueyaso naacucanu maninia nojori pohuatasacari Jesujiniini. Pohuatanu quiaarijiaariuhua taa Pueyaso taraajetequiaari taucuaca jiuujiani, Jesuucua nojori tiuuniurijuhua. ²⁸Pabloori, Bernabeeta cuniqui tarishiquiaarijiaara narta Jesuucua tiuuniaata.

Jesuucua tiuuniaa jiitianaa nacoosacari Jerusalén tiacajinia

15 ¹Jiyacaritij, Judea jiyajiniini pueyari Antioquiya tiacajinia quiojoquiaari. Nojoriiri tii sesa niishitio-

jonu coteequiaari cuniqui quiniaa Jesuucua tiuuniaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—iPueyanaa, Jesuucua tiuuniaa pueya cuaara na cararaatiuquia co miatejoteera, taa Moisés niishitiojoquiaaricuajani! iJaara miatesoo quiri, majaari Pueyaso jiyanoonu quiniutianiya jiyanotej, na pueya nojori quiniuria!

²Pablo, Bernabeenio, nojori jaara tojiquiaari naa cuno pojori niishitiojosa-notej, nojoriiri cuno pojoritia nacojoquiaari jiyanoohua. Naacuaajitij, Antioquiya tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniquijinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuuniaa pueya jiitianaanio. Nojoriiri jiyaramiquishaaree cuno pojori nequesotasaanura, ¿seetanutejanaa naa miishiyatena, taa cuno Judea jiyajiniini nijiono pueya niishitiojiya canaacuajani?

³Naacuaajitij, Pabloori Bernabeeta jiyarosaaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaariiri, Samaria jiyacumano. Nojoriiri cuno jiyacajinia Pueyaso pueya pohuatanu maquiaari taa taucuaca cartequiaari tama sesa nojori miishanojuajani, Pueyaso tojijiara nojori quiniuria. Jesuucua tiuuniaa pueya jaara naa tojiquiaaritij, nojoriiri jiyanoohua shuquiriquiaari.

⁴Nojori tiuquijiosacari Jerusalén tiacajinia, puetunu Jesuucua tiuuniaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pohuataquiaari puetunujuanaa, naajuhua, taa Pueyaso naacuquiaari maninia nojorini, nojori pohuatasacari

taucuaca Jesujiniji. ⁵Cuniqui quiriquiaa-jaariuhua Fariseocuaca, tariucua Jesuucua tiujujia. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuuniaani, na cararaatiuquia co cuaara miatejosaa-ria Judiocuaca nojori quiaquishacari. Na nuhuaji, nojori cuaara Moisés niishitiojoso tojjijara quiiria, taa Moisés rootaquiaari tariucuaaanucujani.

⁶Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuuniaa narta pueya jiitianaata. Nojoriiri maninia niishiriojonuquiaari taa na miiniutiani-yani. ⁷Naa pueyaracaanu nojori pocoojosacaritij, Pedroori socua nojori tajiniji nujaquiaari. Naa nojori sequeree-ri:

—Pueyanaa cua tojitiare. Niaacuajaari niishiya, pa Jiyaniijiaari cua saquiriojo-quiaari na rupaa pohuatariquiano taucuaca tojishocoriquiano, nojori tiuuniuria Pueyasocujahuaj. ⁸Pueyasocujaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuaj, na Sohuanu na niqutiosacari nojori, taa na niqutio-quiaari pajaniyacuaani. ⁹Majaari nia jiyaniniu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya panijajanaa. Cuno taucuaca jaara nocua tiuquiaari, nojuajaari nojori jiuujia jeequereejuhuaj saaja Jesuucua nojori tiushacari. ¹⁰Naa nia tamacasacari taucacajinijinio parta Pueyaso pueyatej, niaari Pueyaso miishano soojotaaruhua. ¿Casaara nia tamacaa Pueyaso miishano-ni? Niaari quiarjia Moisés niishitiojosano tojitiniu paniya Jesuucua tiuuniaa pueya, juhua pa tojishanocuaa. Saniniujuja, majaari quenaaja pa supuetanaa na naata na miiniu quiquiaari puetunujuanaa, taa

Moisés niishitiojoquiaaricujani. ¹¹Paari niishiyani pa Jiyaniijia Jesuuri pa jiyanoojia. Naaratej, pa jiyanooquiaari, na pueya pa quiniuria. Mariyata naa miiquianu cuno taucuacajariuhuaj. Majaari seetanujanaa maninia pa miiniu quiquiaari pa jiyanooshaanura.

¹²Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pohuata-quiaari taa Pueyaso na cumaacata miitiquiaari maninia taucuaca niquiarani, naajuhuaj, taa nojori naatanijioquiaari cusosuhuanuahuaj. ¹³Naa nojori pohuatanu nuhuajitij, Santiagoori sequequiaarijuhuaj:

—Cuarta Pueyaso muerasunaa, cua tojitiare. ¹⁴Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocujaari nojorijini-jinio jiyateya seetanujanaa na pueyara, nojori maniniuhuaqueetanura nojuaja.

¹⁵Seetanujanaari nio. Naajuhuaj, tariucuaaanu Pueyaso sequenu panishano caminiujiuniaacuajaari naa naajionuutaquiaari Pueyaso sequesantej:

¹⁶“‘Janiyari David niqiohuacuajinio mueratenutaniya tamonu pueyano-ni. Davidcuajaari na supuetanarano. Nojuajaari Jiyaniijiajanaa quiriquiano puetunu pueyapuerajanaa, taa David quiquiaari Israel pueya jiyaniijia-cuaani. ¹⁷Naacuajitij, puetunu taucacajanaari cua pajenuunuta-niya, noo pojori teyano cua saquiriojoquiaari tariucuaaanucujani, nojori jiyatesocoriquiano na Jiyaniijiaari janiya’. ¹⁸Jiyaniijiaari naa sequeyaquij. Nojuajaari tariucuaaanu pueya toquiaari nio”.

¹⁹Naaratej pueyanaa, janiyari nia sequeyani, nareja nia niqiri cuno

taucuaca, Jiyaniijia Jesuucua tiuuniaani. Majaari nojori najiquitiniu Pueyasocua-ji, nia tojitiniu panishacari nojori tariucuacaanu Moisés niishitiojosano.

²⁰Nareja nojoriicuaa pa naajiore. Pocua pa naajioneerinia sequere nojorini, maja tari nojori miaquenuunura shipinishano pueyasocuaa na puecootusano casaa, juunu, borregonio. Cuaara quituuuua saa necocuataja, maja tamonu na numuetucunura socua. Jaara shu miaquetunu paniri, cuaara na miaqueera puetunu na nanaca caatinijiasanojuanaa, naajuhua, maja na miaquenuunura casami nanaca.

²¹Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajiniaqueya naa serojosaaquiaa Moisés naajioneeriniji puetunu samaatenu juucajananaa, puetunu tiqiyocua tiacajiniajanaa.

²²Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuuniaa pueyajanaano, nojori jiitianaajuhua, puetunu nojorijianaari mariyata niishiriojonuuquiaari. Naacuajitij, nojoriiri narta Pueyaso pueya saquiriojotuquiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijiuhua. Cuno pojoriiri Jesuucua tiuuniaa pueya tojishano quijia cutara, cuniqui Jerusalén tiacajiniani.

²³Nojoritia jiyarotasaquiaariiri naajioneer. Cuno naajioneeriniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuuniaa jiitianaano, Jerusalén tiacajinia niarta Jesuucua tiuuniaa pueyajuhua. Canaari nia saruhuataani pueyanaa. Taucuaca nia quishacari, naajaa. Jesuucua tiuuniaa nia quishacari, niaari canaa tapueyocuaajuhua, tiqiyocua

Antioquiya tiacajinia quijiaa, Siria jiyajinia quiniaanio, Cilicia jiyajinia quiniaajuhua. ²⁴Canaari niajanijajiniji pohuatasaarucuaani, niiquiji pueyanaari niaacua quiacanu. Canaa nia jiyanoori. Majaari canaa jiyaronu quiquianu nojori. Cuno pojoriniaari nia taajetecanu tamaatia nojori niishitiojosacari niajanija. Naajuhua, nia cushitioicanuuri nojori sequesacari nia cararaatuuquia co nia miatejonura taa Moisés niishitioj-quiaaricuajani. Nojoriniaari nia shiniujiuquianu nia tojitianura socua Moisés Rootasanojuhua. Quiarijia maja naate pueyanaa. ²⁵Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua

jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. ²⁶Canaa panishano pueya Pablo, Bernabeenio, nojoriiri tama na cuaqueya panitiaquiaarijiaa Jesujiniji nojori pohuatasacari tiqiyocua. ²⁷Quiarijiani, canaari niaacua jiyaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutaniyani, naatej, taa canaa pocoojoree canaa rerejosacaricuajani.

²⁸Canaa niishiriojosanoori maninia quiya Pueyaso Sohuanura. Canaari na shuquiritiaajuhua. Majaari canaa cushiononu paniniu niajanija puera canaa supuetanaa niishitiojosanota najuhuanaj.

²⁹Canaari saaja nio nia sequenu paniani pueyanaa. Nia tojitiare. Majaari socua nia miaquenu shipinijosano pueyasohuacua-ra puecoosano casaa. Majaari nanaca miaquenu. Naajuhua, niaa jaara shu miaquenu paniri, nia miaquere maninia na nanaca caatinijiasano. Naajuhua, saaja nia niquiocohuata nia quiriquia. Majaari socua tamonu numuetucunu.

Niaa jaara nio tojjia quiri, niaari maninia miyacuaja. Tariucuaja pueyanaa”.

³⁰Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Jesuucua tiuunaa pueyajanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niquitosaa-quiaariiri cuno naajionee puetunu nojori niquiarajanaa serojosocoriquiano.

³¹Naajionee jaara serojosaaquiaari, puetunu Jesuucua tiuunaa taucacajanaari shuquiriquiaari jiyanoehua. Naacuajitij, nojoriiri noojia cajitiquiaa-riuhua tacaquioyano juucua. ³²Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiitiaquiaari, Pueyaso sequenu panishano nojori caminiujiuniuria. Naacuajitij, nojoriiri Jesuucua tiuunaa pueya cumanjiaquiaari jiyanoehua. Na rootatuquiaariiri maja nojori tarinitianura Jesuucua tiuuniu. ³³Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniuhua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhuajaniya nia quiaarohuaqui.

³⁴Silasri saaja na cojiniaacuaji jateequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajiniuhua. ³⁵Pablo, Bernabeeri Antioquiya tiacajinia camueenujuquiaarijiuhua. Nojoriiri cuniqui Jesuucua tiuunaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhua. Puetunu nojorijianaari Jiyaniijia Jesujiniji pohuataquiaari tamasa niquiarajuhua.

Pablo pacutenu panishacariuhua quianu Pueyaso pueya na niquiniuhua

³⁶Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocua socua niquiniuhua, paa tii pohuatacanu Jiyaniijia rupaatej. Naa pa miiri pa niishiniuria taa parta Jesuucua tiuunaa pueya quiyani.

³⁷Bernabeeri na riucaaree:

—Jajaa. Juan pa riyarecurarajaj, pa tarajariquiano.

Juan sesaari Marco quiquiaarijiuhua.

³⁸Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco saajaananiuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucuaa? Naacuajaa.

³⁹Saa nojorijiaari socua juayonuataquiaari Juan Marcoocua. Nocuaji Bernabeeri jiyacari Pabloocuaji rupatequiaari. Na rupatesacari na rupuen Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarijia buquejinia quiaquiaari Chipre jiyajiniara. ⁴⁰Pabloori saniniujia Silas saquiriojoquiaari na tarajariquiano. Nojori quiaaquishacarijia, Jesuucua tiuunaa pueyari nocuara Pueyaso secojotujuiaari. Naa na miitiumi nuhuajitij, Pablo, Silasno, nojoriiri panaatia quiaquiaari cutara Pueyaso rupaa pohuatanura.

⁴¹Nojori quiasacari Jesuucua tiuunaa pueya shiniujiuniuucua, Siria jiyacuma tajitiumiaquiaariiri, Cilicia jiyacumanio. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuunaa pueyari.

Timoteo cojishacari Pablo, Silasno

16 ¹Pabloori Silasta tiuquijioquiaari Derbe tiacajinia, Listra tiacajinia-nio. Tii riuriatatuquiaari Timoteo

jiyanishano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuunijuhuj. Timoteo queeri tahue quiquiaari cutara. ²Listra tiacajinia Jesuucua tiuunaa pueyari Timoteo maniniucuatujua. Naa sequetujuaari nojori: “Timoteori jiyanhua maninia pueyano”. Iconio tiacajiniinio Jesuucua tiuunaa pueyari naa sequetujajuhuj. ³Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuuquia co matietequiaariiri, cuno jiyajinia quiniaa Judiocuaca soojotanuucuaaji nojuaja. Puetunu pueyajanaari na niishijia, na queeri seetanujanaa tahue quijia. Nocuaaji naa miishaareeri. Na nuhuaji, Timoteo cutaraari Pablo cojiquiaari. ⁴Pabloori Jesuucua tiuunaa taucuaca niquiquiaari puetunu tiacajinijanaa. Nojori niquiara caminiujuquiaari Jerusalén tiacajiniji Jesu jiyaramiquisha-no pueya sequesano nojoriraaari, mariyata Jesuucua tiuunaa pueya jiitianaa sequesanojuhuaj. ⁵Naa Pablo caminiujushacaritij, puetunu Jesuucua tiuunaa pueyajanaari socua noojia cumaquiquiaari jiyanhua. Tamasacaari socua Jesuucua tiuquiaarijuhuaj. Jesuucua tiuunaa pueyari naa canequiaari socua. Naa caneriquiaa puetunu juucajanaari.

Pueyaso Sohuanu tosacari Pablo, Macedonia jiyajiniara na quianura

⁶Na nuhuaji, Pueyaso Sohuanuuri Pablo tenujuquiaari maja nojori pohuata-nura Jesujiniji Asia jiyajinia. Naacujitij, nojoriiri Frigia jiyacuma quiojoquiaari, Galacia jiyacumano. ⁷Naa tiuquijioseequiaari Misia jiya shuriucuaari. Nojoriiri cuniquiji quianu paniquiaari Bitinia jiyajinia juucua. Naajuhuj, majaari Pueyaso Sohuanu paniniu quiquiaari tii

nojori quianura. ⁸Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shoniniacu caminia casaqueyaji quiya. Tiiri buque tiuutiacojua. ⁹Pabloori cuno niucua juhua na maquenujinia niquiquiaari Macedonia jiyajiniinio pueyano nocua nujuaano. Cuno pueyanoori Pablo sequequiaari: “iMiji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. ¹⁰Naa Pablo niquiniu nuhuaji juhua na maquenujinatej, canaari jiyacari ritia pajequiaarini taa canaa quianutaniya cuniquijini. Canaari sequereeni:

—iPa quiaarequij! Pueyasocuaajaari pa panitiaa Jesujiniji pa pohuatanura cuno pueya niquiarajuhuj.

Pablo quishacari Filipino tiacajinia Silasta

¹¹Canaari Troas tiacajiniji quiaquiaari buquejiniani. Canaari Samotracia jiya tucuaatiajaacua tiuquishiini. Canaari cuniquiji sanequiaari tariquiniuhuj, tiuquishiiri Neápolis tiacajinia. ¹²Canaari cuniquiji quiaamaa Filipino tiacajiniani. Filipino tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajiniinio pueyari tii pacuquiaari tarijia. Nojoriiri cuno Filipino tiaca jiyatequiaari nojori quiquiora. Canaari tii camueenujuquiaari rupaquijiani. ¹³Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiitiquiaari Pueyaso secojonura. Canaari tii narejashiquijia cajitiquiaari mariyatani. Jiyacaritij, maajipohuari cuniqui rerejoquiaari na secojonunura juucua. Canaari saaja nojori niquiara pohuateree Jesujiniji. ¹⁴Cuniqui maajipohua rerejosaquini, nojori tajinia quiquiaarijiaariuhua tamonu maaji. Na sesa quiquiaari

Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niquitiojowa quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua noojia riatareeri seetanujuanaa Pablo pohuatasano na tojiniuria maninia. Jesuucua tiuuriiri. ¹⁵Na nuhuaji, Lidiaari puetunu na tijinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquri, miji, nia quishii cua tijinia. Janiyari pa Jiyaniijia tojijiajuhuaj.

Nojuajaari seetanujuanaa canaa panitiaquiaari na tijinia canaa quiniuria. Naacuajitij, canaari na tijinia camueenujuquiaarini.

¹⁶Tamonu juuca, socua canaa pacutesacari quianu pueya secojonuujaajiniara, canaari samaruraca niyacoo niquiquiaarini. Cuno niyacoori camaruhuaraca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhua maseja queraatia cumaneecaari. ¹⁷Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—iNio canuu cutaraari jiyocuaanuji Jiyaniijiajiniji pohuatanaa! Nia niishitiojiyari Pueyaso jiyanooshano nia quiniuria, pueyaracaanu nia rishiniuria nata.

¹⁸Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacooinia quijia samaru sequereeri:

—iJaniyari Jesucristo sesajinia quia jiyaroyani! iCuno maajijiniji quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacooinijiiiri.

¹⁹Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuuquiaari tiaca jiuujiajinia curotasano pueya cajitucuaajiniaraari. Tiaca jiyaniijianucuaari tii quijiaa pueyaracaanu, nojori jiitianura pueya. ²⁰Niyacoo camaruhuari Pablo, Silas nujuatejoquiaari tiaca jiyaniijianucua tacoji, cuniqui na nequesoreesaanura. Jiyaniijianucua sequetureeri:

—iNio canuuri Judiocuaca! Nojoriiri niya pa tiacajinia quiniaa pueya juaatijiosee. ²¹Nojoriiri tamaatia niishishano niishitiojonuya. Maja cumaati pa tojiniunioj. iPaari Romano pueyani!

²²Naacuajitij, puetunu cuno pueyajaanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jiyanohua, na jocojosacari nojorijiniji. Na nuhuaji, tamasaari seeratasaaeree nojori na mojoonura macata. ²³Jiyanohua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojua tia camarnu seeratasaaereeri maninia na cojuatenura nojori nujuatejojuajinia. ²⁴Naacuajitij, cuno nujuatejojua tia camarnuuri Pablo, Silas nujuatejoquiaari socua mij, nujuatejojua cariquimiatej. Cuniqui nujuatejosaaquiaariiri tii na cojuasaanura maninia, na mashiyocuatunuucuaaji. Nojori cashacucuaari suruhuatuneeca quejasano tajiniocoma saatijiosaaquiaarijiuhuj.

²⁵Cuno niucua shiaqueya, Pabloori Silasta Pueyaso secojonuuriquiaajaa. Pueyaso maniniuhuaqueetaturiquiaari na

jaaquequejosanota. Cuniqi nujuatejosa-no pueyari nojori tojitariquiaa.

²⁶Jiyacaritij, rijiaari canashiyauqiji jiuuquiutiaquiaari jiyanohea cuno nujuatejojua tia. Puetunu na tootihua-janaari riatequequiaari. Puetunu pueya numatucuaacua morojotasano casaaja-naari tamajaaja saacarejetaquiaari.

²⁷Nujuatejojua camarnuuri ritia niucuaquiaari. Saaja niquirii puetunu tohuateya riatequenojuanaari. Cunora, na nijiniaquetucua mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jiyanihacari puetunu nujuatejosano pueyajanaa naasucuaari tari mashiyocua-turee. ²⁸Pablo jaara na niquiquiaari, nocua nacareeri:

—iMaja najuhuana naa miiniutij!
iCanaacuaajaari puetunujuanaa niya quiyani!

²⁹Nujuatejojua camarnuuri na shiriqui-nitia tetcariquiaa. Tamonu sequeereeri ritia samaritiu na patanura nocua. Samaritiu caaniuji netequee cutaraari nujuatejojua jiniacumara. Pablo, Silas cariquimaji mojuquetaseeri. ³⁰Jiyacari nojori tohuatejoree carijiniacumaari. Nojori nequesotareeri:

—iPueyanaa! ¿Taa cua miyarinijia, Pueyaso jiyanooshano cua quiniuraju-huaj?

³¹Nojoriiri na riucaaree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanoo-shanojuhuaj.

³²Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaaja-naa niquiaranio. ³³Jiyacaritij, nujuatejojua camarnuuri cuno niucuaja Pabloocua jiyanooquiaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno

pueyajanaari ritia tiuquinijiosaaquiaari moojinia Jesucua nojori tiuushacari.

³⁴Jiyacari na tiajinia nojori jiyataquiaari-ri. Tii Pablo, Silas mianuutereeri. Cuno nujuatejojua camarnuuri jiyanohea shuquiriaatia quiriquiaa puetunu na tiajinia quiniaatajanaa, Pueyasooocua tiuuniaa nojori quishacari.

³⁵Cuno tariqui, Filipino tiaca jiyaniijianu-cuaari na seya jiyaroquiaari nujuatejojua tia camarnuucua, na sequenura nojuaja cuaara Pablo, Silas tohutanijioora tari.

³⁶Nujuatejojua camarnuuri Pablo sequeese:

—Tiaca jiyaniijianucua cucua jiyaroree na rupaani, cua cartenura quiarijia niajaniya. iJuhujaniya nia quiaarohua-qui!

³⁷Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano* pueyajuhuaj? Canaa mojuoturiquiaacuaa puetunu pueya niquiarajanaari. Majaari coteenu canaa nequesoreesaanu quiriuucuaa. Canaari jiyanojuua nujuatejosaarucuaani. ¿Taa na miituniu paniya quiarijia canaarini, jiyasohuaja tohuatejonu paniniu? ¿Jiyasohuaja mojuoturiquiaa-cuaa canaatucuaa? iNojorijianaa cuaara niiria quiarijia, niquiji nojori tohuatejo-nura canaa!

³⁸Jiyaniijianucua seya jaara tacatequiaarihuua, puetunu Pablo sequesanojuanaa pohuataquiaari Filipino tiaca jiyaniijianucua niquiaraari. Nocuaaji jiyaniijianucuaari pueretquiaari nojori niishishacari Pablo, Silas Romano pueya quiquiaarijuhuaj. ³⁹Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jiyanoootionura. Jiyaniijianucuaari nojori tohuatejosee. Nojori sequeereeri cuaara quiojoora quenaaja nojori tiacajiniji. ⁴⁰Naacuaajitij, Pablo, Silas jaara

quiaa canaa niquiara quia pohuatasacari. Quiarijia canaa quia tore maninia.

²¹Puetunu Atenas tiacajinia quiniaa pueyajanaa, mariyata tamonu jiyacajinijio cuniqui quiniaajuhua, nojoriiri maja socua tamonu casaa na miitiuniu quijia. Saaja quiarinio sequesanojiniji niishitiuniu panijiacaari.

²²Jiyacaritij, Pabloori Areópagojiniji nujuaquiaari na pohuatanura na tojitianu panijiaca niquiara. Naa coteereeri:

—Atenas tiacajinia quiniaa pueyanaa, janiyari quiarijia niishiyani, niaaqui pueyasohuacua jiaatijaca jiyanoahua. ²³Janiyari naa nia sequeyani pueyanaa, cua niquiniuucua queraatia nia shipinijosano pueyasohua, cua rucuanajosacari nia tiacajinia. Naajuhua, janiyari saajiajiniji nia shipinishano juhua juhuacutura niquiriucuaajuhua. Nocua naajioori sequeya, “Niishishoo Pueyasora”. Cuno Pueyaso niaa na tojitiaquiaa na niishiya-quiniutiani, nojuajaari nio Pueyasocuaa janiya nio pohuataani.

²⁴Cuno Pueyasoori nio jiya shipiniquiaaricuaa, puetunu pa niquishanojuanaanio. Nojuajaari jiyocuaaanu camarnujuhua. Nojuajaari puetunu tiquiyocujanaa Quijia. Majaari pueya tiajosano secojojua tiajinia na quiniu. ²⁵¿Taa nia jiyaniyani pueyanaa, cutara Pueyasojunaate pa jiitiasano casamijiniji panijajuhua? Maja. Nojuacuaaari puetunu pa jiitiasanojuanaa shipiniquiaari puera. Pa rishiniuria, na Sohuanujiniji pa niquitioquiaarijiaariuhua, pa rijiosocoriquiano paratunio.

²⁶Pueyasoori niquiriyatu pueyano shipiniquiaari juhuacatecara. Paari cuniquiji canequiaarini, puetunu jiyacajiniajanaa pa quiniuria. Pueyasoori tarjia sequequiaari tee pueya quiniutianiyani. Sequequiaarijiaariuhua taacari tii pa quiniutianiyani. ²⁷Pueyasoori naa panitiaquiaaricuaa puetunu jiyacajinia

quiniaa pueyajanaa pajenura nojuaja.

Pueyasoori pa saniya, na niishiniuria, ¿pueyate na pajenutaniyani pa riuriatana nojuaja? Pueyasocuaaari maja na quiniu tucuacaanu pajaniyajiniji.

²⁸Pueyasoori pa samiitianiya. Pa cumaquiquiaaariuhua pa poonijionura. Pa rishitiquiaaariuhua. Naatej, taa nia pohuatajaca sequequiaaricuaajani: “Paari Pueyaso muerasuni”. ²⁹Paa jaara seetanujuanaa Pueyaso muerasu quirini, majaari socua pa jiyaniniu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua saajiajiniji shipinishanonio. Pueyaso cutaraari maja na niquishaanu juhua tama pa niishiriojosanojuaja. Majaari na niquishaanu taa pueya shipinijioquiaacuaajani, nojori jiyanishacari Pueyaso naasucuaari naa niquishanotej. ³⁰Pueyasocuaaari pueya miiniu sesa rejeretariquiaa pueyaracaanu. Saniniuuja, nojuajaari quiarijia puetunu tiquiyocua quijiaa pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojitianura. ³¹Pueyasocuaaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuanaari. Pueyasoori tari na saquiriojosano pueyano jiitiaa pa nequesoreeriquianojuhua. Na samiitianshacari cuno pueyano macujiniji, nojuajaari naa pa niishitiquiaari, cunocuaaari na saquiriojosano pueyano.

³²Nojori jaara tojiquiaari Pablo pohuatasacari taa macunucua samiitiaconutaniuhuan, cuno niishijiacaari na saroojotaquiaari na rerequetenuta. Tamasacaari saniniuuja Pablo sequequiaari:

—Canaacua tamacari quia tojiriirianiuhua.

³³Na nuhuaji, Pabloori cuno pueya tajiniji quiacuhua. ³⁴Noojiaqueya cuno

pueyajiniinioori Jesuucua tiuquaaari, Pablo pohuatasano nojori tojtiasacari. Nojorijiniinioori quiquiaari Dionisio jiyaniishano pueyano. Nojuajaari Areópa-go niishijiaa pueya maanujiniinio quiquiaari. Jesuucua tiuquaaarijiaariuhua tamonu maaji. Dámaris na sesa. Socua tamasaca pueyari Jesuucua tiuquaaarijihuaj.

Pablo quishacari Corinto tiacajinia

18 ¹Na nuhuaji, Pabloori Atenas tiacajiniji quiaquiaari Corinto tiacajinia. ²Cuniqui riuriataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaquiaari. Aquilaari necocua Priscilata shusha Italia jiyajiniji tiuquijio-no quiriquiaa Corinto tiacajinia, tii Pablo tiuquishacari. Jiyacaritij, Claudioori jiyaniijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajinijanaa. Nojori jiitiaquiaari Roma tiacajiniijiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocoojonura. ³Aquilaari necocuata suhuoronuutaja toqueya cuspuenuujua quiquiaari juhua Pablojuhuaj. Naaratej, Pabloori nojoritia quishii, mariyata na poonijionuunura tii. ⁴Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucanejojua. Tii nojori pohuataquiaari Jesujiniijiri, taucuaca niquiaranio, noo pojori canapueete Judiocuacaa jiyatesaaquiaaricujani, tariucuacaanu Moisés niishitiojosano nojori tojishacari.

⁵Silas jaara Timoteota Pabloocua tiuquijioquiaari Macedonia jiyajiniji,

Pabloori jiyacari coteequiaari puetunu juucajanaa Jesujiniji pohuatanura Judiocuaca niquiara. Nojori sequequiaariiri:

—iJesucuaajaari nia sashishano, Pueyaso Jiyarosano seetanujuanaa pocua!

⁶Judiocuaca jaara tojiquiaari naa Pablo sequesantej, na tojtiaaquirii saajaari nojori cuaracashitiniutia Pablo sequesano. Saaja juaaquioreeri. Sesa pocooreejaariuhua. Naaratej, Pabloori nojori niquiara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiutianu, Pueyaso jaara mijiria quiniaa saniitiore. Niaacuaajaari Pueyaso rupaa ruuretaquiaa saaja. Quiarijia taucuacaacua quiaa cutaranijia, nojori cua pohuatanura Pueyaso rupaa Jesucristojiniji.

⁷Na nuhuaji, Pabloori cuno Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejojua tia shuriucua quiriquiase. ⁸Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquiaari. Naajuhuaj, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiuuniaajanaari moojinia tiuquinijosaaquiaari. ⁹Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatare cuno pueya tojishocoriquiano. Majaari sanaajenu.

¹⁰Janiyacuaajaari quiaa quiyani. Majaari quenaaja tamonu pueyano jiyashiniu quiniutianiya taa na miiniu paniniuria

quiajaniya. Janiyari queraatia pueya nio tiacajinia jiitiaa cucua tiuuriquianoni.

¹¹Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqui na quishacari, Pueyaso rupaa niishitiojoriquiaa cuno pueyari.

¹²Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuaj. Jiyacari, Judiocuacaari tii Pabloocuara roojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. ¹³Naa sequetusee camarnuuri:

—iCanaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

¹⁴Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cucua jaatucure cutara, sesa mijiaca sequenio, janiya maara jiyano pueyanooacara nia tonujusacari tojiri cutarani. ¹⁵Niaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajecono pueya sesacajiniji, tama nia supuetanaa rootasanojinijijiaajanio. iTama nia jeecatoorejaaja!

¹⁶Na nuhuaji, cuno camarnuuri nojori juaarii. Na shuriucuaji na jiyaramiquiriohuari. ¹⁷Naa Galión miishacari nojoritij, narta taucuacaari cuniquijia quiatuquiaari Sóstenes, Judiocuaca rerejojua tia cojuana. Na piquitirui camarnu Galión niquiara cuniquijiaari. Majaari Galión tenujunu quirii nojori. Nareja na niquiriquiaari.

Pablo riujiuushacariuhua Antioquiya tiacajiniohua. Na nuhuaji jiuujianaraca pacutequiaariuhua quianuuri

¹⁸Pabloori cuniqui queraatia camueenujuquiaarijaara Corinto tiacajinia. Tari na riujiuushacariuhua cuniquiji, na nuhuajiria saruhuataarohua narta Jesuucua tiuunaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilanio. Nojori tacataaquishacarijia buquejiniacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucataaquiri.

Cunora, naa quiarijia riuujiutirii na nacaari. ¹⁹Nojori tiuquijiosacari Éfeso tiacajinia, Pabloori tii jatamaquiaari Priscila, Aquilanio. Nojuajaari tajimias Judiocuaca rerejojua tiajinia. Cuniqui rerejono Judiocuaca pohuatasee Jesujinijiiri. ²⁰Nojoriiri Pablo nenecojoquiaari juucua cuniqui na camueenujunurajaara nojoritia. Majaari Pablo paniniu quiquiaari. ²¹Cuniqui quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutianiya Jesuucua tiuunaa pueyatani. Pueyaso jaara paniri, janiyacua nia niquiniuria tacatemohuarianihua.

Cuniquiji tacaquiaariuhua buquejiniaari. Éfeso tiacajiniji quiaarohuari. ²²Pablo tiuquishacariuhua Cesareya tiacajiniohua, cuniquiji quiamaa Jerusalén tiacajiniaari, puetunu Jesuucua tiuunaa na saruhuataarajananaa. Na nuhuaji, quiaarohua Antioquiya tiacajiniaari. ²³Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajiniarajanaa. Quiariquiaari

na niquiniuhua Jesuucua tiuuníaa pueya Galacia jiyajinia, Frigia jiyajinia. Pabloori nojori niquiara pohuataquiaari socua Pueyaso rupaajiniji. Jesuucua tiuuníaa nacasuquiaariiri maja nojori tarinitianura Jesuucua tiuuniu.

**Éfeso tiacajinia Apolo
pohuatasacari Pueyaso rupaa**

²⁴Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijinio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuacaanu Pueyaso Rupaa naajiosano niishijia quiquiaarijiaariuhuj. ²⁵Nojuajaari maninia niishitijosaaquiaari Jiyaniijia Jesu niishitijosanojiniji. Shitimia pohuataja pueya niquiaraari. Maninia niishitiojowa Jesujiniji na pohuatasacarijiaariuhuj. Seetanujuaanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. ²⁶Apoloori na puerenu jataquiaari tii na pohuatasacari Pueyaso rupaa narta Judiocuaca rerejojua tiajinia. Aquilaari Priscilata tii quiriquiaajuhuj. Apolo pohuatasano tojitariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. ²⁷Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuníaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuníaa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuujiaca cumaqui-

quiaari jiyanoehua, nojori na niishitiojosacari. ²⁸Apoloori nojori niquiara niishitiojoquiaari tariucuacaanu Pueyaso Rupaajiniji naajiotasano. Jiyanoehua maninia na niishitiojosacari Jesuuri seetanujuaanaa nojori sashishano quiquiaari, naacujitij Judiocuaca niishishano pataquiaariiri.

Pablo quishacari Éfeso tiacajinia

19 ¹Apolo quishacari Corinto tiacajinia, Pabloori saniniuuja Antioquiya tiacajiniji quiaquiaari nucuaco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiiquiaari Éfeso tiacajiniaari. Tii riuriataquiaari Pueyaso pueya maanuuri. ²Pabloori jiyacari nojori nequesotaquiaari:

—¿Niaate Pueyaso Sohuanu tiuquini-quianu nioojiajinia, Pueyaso rupaacua nia tiuushacari?

Pablo riuucatureeri:

—Majaari quenaaja canaa niishiniu quijia Pueyaso Sohuanute quiyajuhuj.

³Pabloori nojori sequequiaari:

—¿Casaara nia tiuquinijosaaanucua-raarini?

Nojoriiri na riucaquiaari:

—Canaari tiuquinijosaaquiaarini taa Tiuquinijiona Juan niishitiojoquiaaricua-jani.

⁴Pabloori nojori riucaaree:

—Taaquiririnij. Tiuquinijiona Juancuaaquinateja pueya tiuquinijio-quiaarijiaj, nojori jaara noojia tacatoquiaari sesa na miitiushanojiniji. Nojori sequequiaarijiaariuhuj: “Cua nuhuaji Niriqianoocua nia tiuuri”. Naa Tiuquinijiona Juan sequesacaritij, nojuajaari Jesucristojiniji sequeriquiaa.

⁵Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijosaaquiaariuhua Jesuucua nojori tiuushacari seetanujuaanaa.

⁶Naacuaajitij, Pablo niasacari na juaashi-quia nojori nacaacua Pueyaso na secojosacari, Pueyaso Sohuanuuri cuno pojori jiuujiajinia tiuquiquiaari. Naacuaajitij, nojoriiri niishishoo rupaacajinia pocoree. Naajuhuj, Pueyaso Sohuanu niishitiojosano Pueyasojiniji pohuatanuu-quiaariiri. ⁷Cuno pojoriiri doce canuu quiquiaari.

⁸Pablo quishacari cuno tiacajinia, nojuajaari tii shocotejoquiaari jiuujiana-raca raca. Jiyacari, puetunu samaatenu juucajanana quiaja Judiocuaca rerejojua tiajiniaari. Tii pohuataja Pueyaso rupaa pueya niquiaraari. Naajuhuj, nojori niishitiojojaari taa Pueyaso jiitianutaniya pueyaracaanu Jesuucua tiuuniaa pueyani. Pueyari na tojitiaquiaari maninia, na puereyaquiniutia na niishitiojosacari. ⁹Noojiaqueya cuno pueyajinijinoori saaja ruuretaquiaari Pueyaso rupaa. Na rerequetequiaari saajaari. Sacuaraatia pocooquiaari Jesu rupaaajiniji pueya niquiaraari, Jesuucua nojori tiuuniu paniyaquishacari. Nocuaji, Pabloori saa jiyareta Jesuucua tiuuniaa pueya jiyataquiaari cuniquiji, tamaquiria serojonuujua tiajiniaari. Tirano jiyanishano pueyanoori cuno serojonuujua tia camaru quiquiaari. Pabloori cuniqui puetunu juucajanana niishitiojojua Pueyaso rupaa Jesuucua tiuuniaa pueya.

¹⁰Caapiqui marijiaari socua Pablo shocojoquiaari tii na poojotasacari Pueyaso rupaa Tirano serojonuujua tiajinia. Naacuaajitij, puetunu Asia jiyajinia quiniaa pueyajanaari Pueyaso rupaaajiniji caminiujushaaquiaari, Judiocuaca, taucuaajuhuj. ¹¹Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata.

¹²Naacuaajitij, pueyari Pablo paneyaca tuujutaqueya rijioquiaari, Pablo cooshano toqueraacuanio. Cuno pueya jaara na cusosuhuacua niojoquiaariuhua cuno

toqueraacua, icusosuhuari naatacoquiaariuhua! Naajuhuj, samaruhuari tohuareetaquiaarijuhuaj, samaruhua jiitiaja pueyacuaji.

¹³Tamasaca Judiocuacajinijinoori quiriquiaajuhuj, pueyajiniji samaruhua tohuatanijiojua. Nojoriiri puetunu tiacajiniajanana rucoojojuaca quiquiaari. Jiyacaritij, nojoriiri juhua Pablo miiniu paniquiaarijuhuaj. Juucua na sequetu-quiaari samaruhuari:

—Pablo pohuatasano Jesu sesajinia nia sequeyanijia: “iNio pueyanojiniji nia tohuareetare!”

¹⁴Naa miijiaaari siete canuu quijia. Nojoriiri Esceva jyanishano pueyano niquiohua quiriquiaa. Escevaari pueyacuara secojonaa camarnu quiriquia-sejuhuaj, Judio pueyanotuhuj. ¹⁵Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuaajanijia. Janiyari Pablo niishiyajaanuhuj. ¿Canteerini nijaniyanijia, naa nia sequenura janiyatej?

¹⁶Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataa-quishacari, nocuaji netecuatuquiaari tiacojiiri juhuasunucua, jiyareta naatiquishanojuhuaj. ¹⁷Puetunu Éfeso tiacajinia quiniaa Judiocuacajanana, mariyata tii quiniaa taucuaacanio, nojori jaara niishiquiaari naa miishanojinijitij, jyanohua pueretuquiaariiri. Naacuaajitij, puetunu Éfeso tiacajinia quiniaa pueyaja-naari sequequiaari:

—iJesuqui seetanujuanaa Jiyaniijiajanaa cutara!

¹⁸Naajuhuj, queraatia Jesuucua tiuuniaa pueyari nijioquiaari, tarijia sesa na miitiushano pohuatanura puetunu pueya niquiarajanaa. ¹⁹Naajuhuj,

queraatia pueyari juhua shimiacuri miiijiojuaca quiquiaari. Nojoriiri na nequesoreetuneeca mueratejotaquiaari. Cuno nequesoreetuneecajiniaari serojosano quijia taate pueyano cumueeca shimiadura quiniuni. Na camaruhuari jiyacari puetunu cuno nequesoreetuneecajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoreetuneecajanaa catijasaa-quiaarini, cunoori cincuenta mil platajiniji* shipinijosano cumaneecata masesano quiquiaari. ²⁰Naacuajitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujiajinia.

²¹Na nuhuaji, Pabloori cuniquiji naquerejoquiaari Macedonia jiyajiniara-juhuaj, Acaya jiyajiniariano. Cuniquiji riujiuuniu paniriquiohua Jerusalén tiacajiniohuaraari. Sequequiaarijiaariuhua:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

²²Jiyacaritij, Pabloori na naacuna jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyojequiaarijiaara.

**Éfeso pueya cushitiishacari na
juaaquionuta najuhuanaj**

²³Pablo quishacari Éfeso tiacajiniaja, Éfeso tiacajinia quiniaa pueyari jiyanojua juaaquioquiaari Pablo niishitiojonuucua Jesucristojiniji. ²⁴Naa quiquiaariiri. Demetrio jiyaniashano pueyanocuaajaari juhuacatecara narta pueya nasojoquiaari. Cuno pueyano, Demetroni, nojuajaari shiirijiaa tia platajiniji* shipinijiojua quiquiaari. Cuno shiirijiaa tiacaari juhua nojori jiyaniashano pueyaso secojojua tia niquishano quiquiaari. Nojori pueyasoori maaji

sesaanucua quijia, “Artemisa”. Na shipinijosano niqutiojiojua na cumaneecaraari. Naacuajitij, Demetrioori nata poonijionaa pueyata queraatia cumaneecaraca quijia. ²⁵Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasaca pueya, casaa shipinijionaa platajiniji juhua nojorijiuhuaj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuajaari niishiya, paari puetunu pa panishanojuanaa jiitiaani pa niqutiojosacari pa cumaneecara pa shipinijosano. ²⁶Quiarijia cuno Pablo jiyaniashano pueyanoni, nojuajaari queraatia pueya niishitiojoquiaa, pueyano shipinijosano pueyasohuanaari maja seetanu pueyasohuajanaa. Niaari na niquiriquiaacuaja naa na niishitiojosacari. Niaari na tojiriquiaajuhua. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojtiaajuhua. ²⁷Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyajaariuhua. Nocuaji, majaari pueya nijionu quiniutianiya tari pa pueyaso Artemisa secojojua tiacajiniara, tii nojori secojonura, naa cuno Pablo niishitiojonuucua pueyara-caanu pueyatej. iNaacuajitij, puetunu pa Asia jiyajinijinio pueya, mariyata puetunu jiyacajinijinio pueyapuejanaari pa pueyaso Artemisa rerequetejacara jatanutaniya! iPuetunu pueyapuejanaari na niyajetanutaniya socua pa pueyaso Artemisatej!

²⁸Cuniqui quiniaa pueya jaara tojiquiaari na Demetrio sequesantej,

nojoriiri jiyanoehua juaaquoiquaari. Naa nacoquoiaariiri:

—iPa timitiasano Artemisa cuaara pueyaracaanu quiiria Éfeso tiacajinia quiniaa pueyaso!

²⁹Naa nojori juaaquiosacaritij, puetunu cuno tiacajinijanaa pueyari cushitii- quiaari. Nojoriiri jiyacari quiooturee caapiqui Pablo cojiniaa pueya, Macedo- nia jiyajiniinio pueya. Nojoriiri quiquiaari Gayo, Aristarconio. Na jayoturee Éfeso tiacajiniinio pueya rerejojua tiajiniaari. ³⁰Pabloori cuno pueya nacoosaqui tiajinia tiuquiniu paniquiaari juucuaajuhua. Quera na pocuasee cuno pueya tajiniani. Jesuucua tiuuniaa pueyari saa na cosequiaarijia na tiuquiyaquiniuucua. ³¹Asia jiya camarucuaari na seya jiyaroquiaari Pablocuaajuhua. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacojosaku- qui, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupuenaa quijia. ³²Cuno nasojosano rerejono pueyari saaja cushitiiquiaari na juaaquionuta. Jiyanoehua nacooreeri. Tamasacaari saniniuujia tamaatia nacooriquiaajuhua. Jiyacaritij, tama cuno nojorijiniinio pueyari maja na niishiniu quiquiaari casaajiniji na nacooriquiaani. Secaja nojorijiniinioori na niishiquiaari cutara. ³³Jiyacaritij, Judiocuacaari Alejandro jiyaniishano pueyano caponeequiaari pueya nacoyano taci na nujuatesocori- quiano. Cuniqijinio pueyajaari tii toquiaari Alejandro casaara pueya nacoyani. Alejandroori Judio pueyano quiquiaarijuhuaj. Naaratej, Judiocuacaa- cuaji tacunu paniriquiaa juucuaari. Alejandro jaara nujaquiaari pocuajajini- ji, na juaashiquia shiitioquiaariiri pueya sanaajetanura. ³⁴Saniniuujia, cuno pueya

jaara niishiquiaari Alejandroori Judio pueyano, puetunu pueyajanaari socua jiyacatequiaari nacoonura. Nojoriiri caapiqui hora* shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—iPa timitiasano Artemisa cuaara pueyaracaanu quiiria Efeso tiacajinia quiniaa pueyaso!

Naa pueyaracaanu nacooriquiaari.

³⁵Cuno tiaca camarucuaa naajiona pueyano jaara na naata quiriquiaa nojori na sanaajanura, nojori sequeereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaa- ni. Niishitiuyajaariuhua paacuajaari cuno casaa juhua pa pueyaso Artemisa niquishano cojuaquiaani, jiya cajiniocuaji tinio pa riuriatasanoni. ³⁶iCanteeri nio niishiyaquianijia! Shaaqui. Cunora tariucua. iNia sanaajetarohua! Majaari najuhuaana sesa nia miituniu, maninia nia niishiriojiyaquishacari. ³⁷Nio canuu niaa niyara na jayoreeni, nojoriiri maja na nohuasenu quirii casaa pa pueyaso secojojua tiajiniji. Majaari na sesacatunu quiquiaa pa pueyasojuhua. ³⁸Demetrio jaara nata poonijionaata cuno pueyacuaa tonujunu paniri, ¿casaara na quiaaquia pa nequesoreenaa niqiaara tonujunuraari- ni? ¿Casaara pa jiitiaa nequesoreenaa pa tiacajiniaarini? ¿Najuhuanaj? Pa nequeso- reenaari pa paraa tacujua pocuaji. ³⁹Niaa jaara tamonu casaacua juaaquioreja, pocua tamonu juuca na rerejotariquiani pa jiyaniijianucuaa pa jeecanura puetunu nia sequesanojuanaa. ⁴⁰Pueyanaa, ¿majate nia puerenu, Roma tiacajinia quijia pa jiyaniijiajanaa jaara pocuara tosaare pa nacojonujiniiji? Paa jaara sequesaa nocua quiojonurani, ¿paatucua taa pocuaji tacureni jaara pa nequesoreere pa nacojonujiniiji?

⁴¹Tiaca camarucuara naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuaajitij, puetunu pueyajanaari cuniquiji niaquejejoquiaariuhua.

Pablo rucuanajosacariuhua Macedonia jiyajinia, Grecia jiyajinianio

20 ¹Pueya jaara na juaaniutia na nacojonu nuhuaji sanaajeta-quiaariuhua, Pabloori jiyacari Jesuucua tiuunaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. ²Nojua-jaari puetunu cuno jiyajinia rucuanequiaarijianaa. Jesuucua tiuunaa pueya cumashitiquiaari socuaari, maja nojori tarinitianura Jesuucua tiuuniu. Naa na rucuanesacari cuno jiyajiniatej, socua tiuquishiiquiaari Grecia jiyajiniaari. ³Pabloori tii na quishacari shocotejo-quiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacari-ritij, nojuajaari nocuaji Macedonia jiyajiniara neteja nucuacohua tacatequiaariuhua saaja. ⁴Nucuaco na quiasacariuhua, na tarajaquiaariiri Sópater jiyaniashano pueyano Berea tiacajinijinio, Pirro niyanu. Na tarajaquiaariijaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaariijaariuhua Gayo, Derbe tiacajinijinio. Timoteori nojoritia quiriquiaajaacuhuj, Tíquiconio, Trófimojuhuaj. Nojoriiri Asia jiyajinijinio quiquiaari. ⁵Puetunu nio canaa tapueyo-cuacajanaari canaa puetaquiaari.

Canaacuaji tiuquijioseequiaari coteenu Troas tiacajiniaari. Cuniqui sashitiquiaari canaari. ⁶Jiyacariiri queranacunuusacari quiquiaari, poreeta-jaaju shipinijiosano pan miaquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitiojosacari Troas tiacajinia

⁷Shusha semaana* coteejajinia domingo* juuca, canaari rerejoquiaarini pan neecasenura pa Jiyaniijia cusosacari niishiriojonura. Pabloori jiyacari Jesuucua tiuunaa pueya rootariquiaa niucua. Nojuajaari cuno tariqui quiariquiano quiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pohuatasa-cari, shiyaqueyari tari quiquiaari. ⁸Cuno tiania canaa tii quiriquiaani, canaari jiyocuacaanu tercero na natacojinia rerejoriquiaani. Queraatia samariiri canaa caaniuji noshiquioriquiaa. Pabloori shitimia pohuatariquiaa pueya niqiuara. ⁹Jiyacaritij, tamonu mashajaari tia shuucuaji tacuhuaajiniji cajiriquiaa. Na sesaari Eutico quijia. Pablo pohuatasa-cari pueyaracaanu, socua maquequiaari na cajishaquiiiri. Jiyanoahua na maquesacari, jiyocua tiqui socuaari. Cusoseejanaari. ¹⁰Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuunaa pueya sequereeri: —Maja najuhuaana shiriiquituniu. Saminiocuaja.

¹¹Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua

pohuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara. ¹²Cuno mashajaari saminio jaatucusaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

Pablo quiasacari Mileto tiacajiniara

¹³Pabloori na quiaaquishacarijia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴Naacuaajitij, canaari coquetoquiaari Asón tiacajiniani. Canaari cuniquiji Pablo tacanimiaquiarini. Canaari mariyata tiji quiaaree Mitilene tiacajiniani. ¹⁵Canaari tariqui shocomaa Qufo jiya tucuaatiajani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhua. Canaari Mileto tiacajinia tiuquishiini. ¹⁶Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajinijuhua. Ritia tiuquiniu paniquiaariuhua Jerusalén tiacajiniara. Pentecostés juucara quiniu paniriquiaa tiiri.

Pablo cumashitishacari Éfeso tiacajinijinio Jesuucua tiuunaa jiitiana pueya

¹⁷Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuunaa pueya jiitiana. ¹⁸Nojori jaara canaacua tiuquijioquiaari, Pabloori nojori sequeree:

—Niaacuaajaari maninia niishiya taa cua quishiiquiaari niaatani, cua

tiuquishacari Asia jiyajinia niaacua.

¹⁹Niaata cua quishacari, janiyari pueyaraaanu nia niishitiojojuani, pueyaracaanu pa Jiyaniijiaa cua poonijiosacari. Naa cua miishacaritij, majaari cua quiniu paniniu quijia juhua nia jiyaniijia.

Janiyari niaacua cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca paracaashacari janiya. ²⁰Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitiojojuani puetunujuanaa maninia nia quiniuria, maninia mijia nia quiniuriajuhua. Majaari cua niishitiojonu quijia jiyasohuaja. Janiyari puetunu pueya niquiarajanaa nia niishitiojojuani, tama nia tiacajiniaqueyajaajanio.

²¹Janiyari Judiocuaca sequejani tucuaacanio, nojori tacatonuhua noojia Pueyasooocua, sesa nojori miishanojiniji, pa Jiyaniijiaa nojori tiuuniuria cutara. ²²Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³Janiyari saaja niishiya cutarani, puetunu tiacajinijanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhua.”

²⁴Janiya jaara naa niishirini, majaari cua tacaaniu quiquiaa. Cuara cua motuuraqui jaara monu panitiuri. Janiyari saaja pa Jiyaniijia sequesano tucuatani paniya cutarani. Pa Jiyaniijia Jesuuri cua jiyaroquiaari cua pohuatanura pueya niquiara, taa Pueyaso jiyanooni paniya pueyani.

²⁵Janiyari seetanujuanaa nia sequeyani pueyanaa. Puetunu nijaniyajanaa, cana niquiara cua pohuataquiaari Pueyaso rupaacuajani, majaari socua nia niquiniu quiniutianiya mijiria janiya. ²⁶Naaratej, janiyari nia sequeyani, majaari na nuhuaji nia sequenu: “Maja canaa

pohuatasaanu quiquiaari Pueyaso rupaani”. ²⁷Janiyacujaari tari nia pohuataquiaari puetunu Pueyaso sequesanojuanaa pajaniyarani. ²⁸Quiarijiani, tama nia cuaqueyajaaja nia cojuare. Maninia nia cojuare Jesuucua tiuunaa pueyajuhaaj. Pueyaso Sohuanucujaari nia jiyatequiaari Jesuucua tiuunaa pueya jiitiana nia quiniuria. Nojuajaari nojori masequiaari na nanacata tama nerajaaja, pocuara na cusosacari. ²⁹Janiyari seetanujanaa niishiyani, janiya jaara niiquiji quiaqueeni, tamasaacari cua nuhuaji nijionutaniya. Jesuucua tiuunaa pueya sesonutaniyari, sacuaraatia nojori niishitiojosanota. Nojoriiri juhua marucatuque sareya tiuquitianutaniya Jesuucua tiuunaa pueya tajinia. Taa marucatuque sare tiuquiya borregohua tajiniacuaani, puetunu na sooseejanaari, cuno pojoriiri naa miiniutianiya Pueyaso muerasutej. ³⁰Naajuhuaaj, tama niajaniya-nijinjiojuaritia najuhuana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuunaa pueyari, pueya tojiniuria nojori saniniuu-jia. ³¹Janiyacujaari nia sequeyani, jiyanhua nia cojuare tama nia cuaqueyajaaja. Nia niishirijiuhuaaj, jiuujianaraca marijiaari tari cua shocjoree pueyaraanu cua niishitiojosacari niajaniya. Majaari cua tarinitianu quijia rootanu niajaniya, juuca, niucuanio. Janiyari naajaa cua namijiaacatenuta niishitiojua puetunu niajaniyajanaani. Majaari naa cua miishano nia niyjetanu pueyanaa.

³²Nia tiujianutaniya tarinijia. Janiyacujaari pa Jiyaniijia juaashiquiajinia nia jataani. Na rupaa nia tojiriquia pueyaraanu, juhua rishimiaca pueyano nia quiniuria, cumueecara. Nia jaara naa miiritij, Pueyasoori nia rijionutaniya na

shuriucua, na saquiriojosano pueyata nia quiniuria. ³³Niaata cua quishacari, majaari tama quiriajaaja cua paniniu quijia cumaneeca, toquenio. ³⁴Niaari naa quiyano cua niquijiajuhuaj. Janiyari tama cua juaashiquiaatajaaja poonijiojuani, cua panishano cua masetajara, cua cojiniaa panishano masetajarajuhuaaj. ³⁵Janiyari nia niishitiojojuani, naa poonijiosanotej casamijiiuniucua pa naacunura pa jiitiasanota. Majaari pa Jiyaniijia Jesu sequesano nia niyjetanujuhuaaj. Naa sequequiaariiri: “Maninia pueyano jaara na jiitiasanojiniji niquitiore nareja tamonu pueyano, na niquitiosacari tamonu, nojuajaari socua shuquiriaatia quiya, niquitiosano masejajiniji”.

³⁶Naa nojori na sequenu nuhuajitij, Pabloori mojoquetaree. Puetunu nojoritijajanaa secjoreeri. ³⁷Puetunu pueyajanaari nujuquettee. Pablo cacanuututeeri. Na nujuunetuteejaariuhuaaj. ³⁸Pueyari jiyanhua taraajeriquiaa Pablo sequenuucua nojori, maja tari socua na niquitiuniu quiniutianiya nojuaja. Nojoriiri caminiajiniara rosetaquiaarijuhuaj, Pablo na niquitiniuria buquejinia na tacasacari.

Pablo quiasacari Jerusalén tiacajiniara

21 ¹Éfeso tiacajiniji canaa ruparetasacari, canaari shoniacu caminia jiuujiaaco quiaareeni. Canaari Cos tiacajinia tiuquishiini. Cuniquiji canaa quiasacari tariqui, canaari Rodas tiacajinia tiuquishiiniuhuaaj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. ²Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetanonni. Canaari tii tacataareeni. ³Canaa jaaretasacari, canaari canaa muenecara niquimiohua Chipre jiya tucuaatijani. Canaari Siria jiyajinia tiuquishiini. Cuno

buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiuutiaseeni, casami jatanura tii. ⁴Jesuucua tiuunaa pueyari tii quijiajuhuaj. Canaari nojoritia quishiini. Canaari siete juuca camueenu-jusee cuniqui nojoritiani. Pueyaso Sohuanuuri cuniquijinio Jesuucua tiuunaa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. ⁵Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuunaa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa secojonura jaaquiajinia. Puetunu canaajanaari mojoquetacoquiaarini shoniniacu caminia casaqueyaji. ⁶Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tiajiniohua.

⁷Canaari Tiro tiacajiniji jaaretaareeni. Canaari Tolemaida tiacajinia tiuutiaseeni. Canaari cuniqui tacatasee puetunujuanaani. Canaari tii quijiaa Jesuucua tiuunaa pueya saruhuataseeni. Canaari nojoritia quishii niquiriyatu juucani. ⁸Tariqui saniniuuja, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuajaari Jerusalén tiacajinia coteenujuanaa tamasacata jiyatesaquiaari mashiquio-pue mianuuteriquiano. ⁹Felipeeri necojori jiitiaja, saa caqueetacaneeja, niyacoojori. Cuno niyacoojoriiri Pueyaso Sohuanu jiitiajaca. Naacuajitij, Pueyaso

Sohuanu niishitiojosano nojori jiuujiajinia Pueyasojiniji pohuatanuujuaari.

¹⁰Canaa camueenujusacari cuniqui, jiyacari tiuquishiiaariiri Judea jiyajinijinio pueyano. Nojuajaari Pueyaso sequenu panishano caminiujunia quijiajuhuaj. Ágabo jiyanishano pueyano.

¹¹Nojuajaari canaacua niquiaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucujaarijia, na numatucuanio. Na nuhuaji sequerohuari:

—Jerusalén tiacajinia parta Judiocua-caari naa morojonutaniya nio cajiniocuaque camarutej. Na nuhuaji, taucua niquitiosaanutaniyari. Pueyaso Sohuanuuri naa cua sequereeqij.

¹²Naa Cesareya tiacajinia quiniaa Jesuucua tiuunaa pueya tojishacaritij, canaajuhua, puetunu canaajanaari juucua Pablo nenecojoquiaarini maja na quianura Jerusalén tiacajinia. ¹³Saa canaa sequereajaari:

—¿Casaara nia nujuquetiuyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatanuucua cua Jiyanijia Jesujiniji.

¹⁴Maja canaa naata na tarinitiniu quishacari, canaari socua na tarinitiareeni. —Cuaquij. Pueyaso cuaara miiria taa na miiniu paniyacuajani.

¹⁵Naa canaa sequenu nuhuaji nojuaja juucuatej, canaari canaa jiitiasano casaa jeenucareeni. Canaari Jerusalén tiacajinia quiaarejaaniuhua. ¹⁶Canaata quiojoquiaariiri Cesareya tiacajiniji Jesuucua tiuunaa pueyajuahuaj. Canaata quiariquiaariuhua Mnasón jiyanishano pueyano. Nojuajaari Chipre jiya tucuaatiajajinijinio pueyano quiquiaari. Nojuajaari tarijia Jesuucua tiuuja quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

Pablo pocoojosacari Santiagota

¹⁷Canaa tiuquijiosacari Jerusalén tiacajinia, cuniqijinio Jesuucua tiuuniasa pueyari canaa timitiaree canaa tiuquijiosacari. ¹⁸Pabloori tariqui canaata quiaquiaari Santiago niquiniucua. Tii quiriquiaajaariuhua puetunujuanaa Jesuucua tiuuniasa jiitiana pueya. ¹⁹Canaa tiuquishacari, canaari nojori saruhuataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatanuucua Jesujiniji, na rucuanijosacari tucuaaanu taucuaa quijia jiyacajinia. ²⁰Pueya jaara naa tojiquiaari Pablo pohuatasanotej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaa-ri:

—Canaa tarajanunaa, taa quia niquiquiaacuajani, jiyanhua queraatia parta Judiocuacari Jesuucua tiuya. Puetunu nojorijianaari tariucuaaanu Moisés niishitijosano tojitiajajuhua, nocua nojori jiaatanuta jiyanhua. ²¹Nio Jerusalén tiacajinia quiniaa Jesuucua tiuuniasa pueyari quicuaji tojiquianjuhuaj. Quiaanaari tamonu jiyacajinia quijia parta Judiocuaca niishitiojoquiaa maja nojori miiniuria tari tariucuaaanu Moisés niishitijosano. Quiaanaari niishitiojoquiaajuhua maja nojori necohua cararaatiuquia co nojori miatejonura, taa pa supuetanaa niishitijosaaquiaaricuani. ²²Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquia-

no, tarijia na sequetusano Pueyaso na tohuateenura. ²⁴Nojori quia jiyataare Pueyaso Secojoja tiajinia. Niocua nia cuaqueya jeequejosee taa pa supuetanaa sequequiaaricuajani. Naajuhua, quiocua nojoriria cumaneeca niquitiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujuanaa quiquianu pueya sequesano quiajanijajiniji. Niishitiunutiyanijajariuhua, quiaaqui tariucuaaanu Moisés niishitijosano miyajaa. ²⁵Majaari Jesuucua tiunio taucuaacua quia tacaani. Canaajaari tari nojori nacasquiaari canaa naajionejiniani, nojoricuara canaa naajiosacari. Canaari nojori sequequiaari cutarani maja tari nojori tojiniuria Moisés niishitijosano. Canaari nojori sequequiaarijuhuaj, maja na miaquenuunura shipinishano pueyasohuacuara puecoosano casaa, naajuhua, maja na miaquenuunura nanaca. Canaari nojori sequequiaarijuhuaj maja na miaquenuunura shu na nanacataja, naajuhua, maja na numuetucunura na camishoo maaji. Puetunu pa supuetanaa rootasanojinijianaani, saa niojaari taucuaa tojishocoriquiano rootasano.

Na cojiniaata Pablo quioosacari Pueyaso Secojoja tiajinia

²⁶Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricuajani. Naa na miiniu nuhuajitij, Pueyaso Secojoja tiajinia tiuquitiaquiaariiri pueyacuara secojonaacua. Na sequetquiaariiri casaa juuca na tucuatunutaniya na cuaqueya na jeequejonuununi, naajuhua, casaa juuca nojori panutaniya Pueyasora na niquitiosocoriquianoni.

²⁷Quera nojori tucuatascari puetunu cuno semaana juucajanaa, Asia jiyajinijinio narta Judiocuacaari Pablo niquiquiaari Pueyaso Secojoua tiajinia. Nojoriiri puetunu pueyajanaa nasajoquiaari ritia. Jiyacari Pablo quiatureeri. ²⁸Na quiatusacari Pablo, pueya na jiiquioonuutareeri:

—iIsrael pueyanaa, miji! iCanaa nia naacuseeja! Nioori noo pueyanocujaja tiqiyocua na rucuanesaqui pueya niishitiojquiaa sacuaratia pocuaratej, nio Pueyaso Secojoua tiaacuarajuhuj. Naajuhuj, tariucuacaanu Moisés Rootasano sesacatequiaa pueyajaariuhuj. iQuiarijiani, pa Secojoua tiajinia sacuaratia tiuquinitiaree taucuacaari!

²⁹Cuno Judiocuacaari naa sequetquiaari Pablotej, Trófimo jiyanishano pueyanota nojori niquiniucua nojuaja tarijia na rucuanesacari cuno tiacajiniaja. Trófimoori Jesuucua tiuunia tahue quijia, Éfeso tiacajinijinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirii Pueyaso Secojoua tiajinia.

³⁰Puetunu Jerusalén tiacajinia quiniaa pueyajanaari juaaquiocuaari. Pabloocua netecuatuquiaariiri. Na quiatureeri. Pueyaso Secojoua tiacoci na jaatiuquiaari carijiniacumaari. Pueyaso Secojoua tia tohuateyari ritia tionujusaquiaari na nuhuaji. ³¹Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandantee-ri numootesaaquiaari: “iJudiocuaca na juaniutia nacoya!” Cuno comandanteni, nojuajaari soldadohua capitáncuaa jiyaniijia. ³²Jiyacaritij, comandanteeri na soldadohua rerejotequiaari ritia, na capitáncuacanio. Tee pueya nacooriaani, nocua netecuatuquiaariiri. Judiocuaca jaara niquiquiaari comandante na soldadohua neretaano nojoriicua, jiyacari shusha cartetuquiaari Pablo

piquitiuniuuri. ³³Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴Pueyari saaja jiyajeneta nacooriaquiaa. Nioori tamaatia nacooriaacuajaja. Tamasacaari socua tamaatia nacooriaquiaajanaajataj. Comandanteeri cunora maja na niishiniu quiquiaari casaa Pablo miirijiaarani, puera nojori cojuatunenuucua na nacoosacari. Cunora na soldadohua sequereeri:

—iPa quijia tiajinia nia jaatucuyarohua!

³⁵Soldadohua tacatasacari tari nojori quijia tia tacatuhuoco Pablo nojori jaatucuscari, Judiocuacaari jiyacari quera na macaaniutia socua shiiniuquitiaquiaari Pabloocua, na monu paniniuria juucua. Soldadohuari nojoriicuaari Pablo shiitioquiaari jiyocuacaanu. ³⁶Pueyari soldadohua nuhuaji na cocuatesacari jiiquioonuuriquiaa:

—iNia more cuno sesaaca! iNia more!

Tama nocuaji Pablo tacusacarijiaaja

³⁷Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niquiriyatu rupaa sequereera cuno pueya.

Comandanteeri na riucaaree:

—¿Quiaaquiiri Griego rupaa pocujaja? Janiya juucua quia jiyaniriquiaa Egipto jiyajinijinio pueyanoni. ³⁸¿Majateeri noo quiajaniya quiquianucujaja, cariquia jiyajinia jiyatacanu cuatro mil puecoojuaca pueyatej?

³⁹Pabloori saaja na sequereeri:

—Janiyari Judio pueyanoni, Tarso tiacajinia rasanotuhuj. Naacuajitij,

janiyari Tarso tiacajinijinio pueyanoni, teyano tiacatucuaja socua panishano tiaca Cilicia jiyajiniani. Quenaaja rupaquijia cua tarishitiricuarajaj. Cuno pueya sequenu paniya niquiriyatu rupaa quenaajanijia.

⁴⁰Comandanteeri socua na sequeree: —Quia pocuaree.

Pabloori jiyacari tacatujiniji nujuaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicuaru pocuaree tama nojori Hebreo* rupaajiniaari. Naa nojori sequereeri:

22 ¹—Cua tapueyocucanaa, cua jiyaniijianucunaa, nia tojitiare cua sequesano niajanija tama cua tacusacarijiaaja cucuaji.

²Cuno pueya jaara tojiquiaari Pablo pocuasacari nojoriicuaru Hebreo rupaajinia, pueyari maninia sanaajetaquiaarijianaa. Pabloori nojori sequeree:

³—Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalieli cua niishitiojona quijia. Jiyanoahua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniucua jiaatiaquiaani, taa quiarijia nia miiniu panianijia. ⁴Janiyari tarijia Jesuucua tiuunaa pajejani naquiya cua miitiasocoriquiano. Janiyari na mooquiaarijiuhua. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. ⁵Pueyacuara secojonaa camarnuuri cua miiijosano niishiyaju-huaj, puetunu pa jiyaniijianucujanaanio. Nojoricuajaari cua niquitioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuunaa pueya cua

pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriquiano.

Pablo pohuatasacari Jesuucua na tiuuniujiniji

⁶Janiyari juucua nucuaco quiariquiaani. Quera cua tiuquishacari Damasco tiacajinia, panacariiri quiriquiaa. Canashiyauquiji jiyanoahua shacantuuca juhua miacanaari cua nunuquiaari.

⁷Janiyari juhua jatasaaareeni. Jiyacaritij, janiyari rupaa tojirii cua sequeyanoni: “Saulo, Saulonaa, ¿casaara quia miitiaa puera janiyani?” ⁸Janiyari na nequesotaareeni: “¿Cantequia Jiyaniijianaa?” Cua sequereeri: “Janiyacujaari Jesuni, Nazaret tiacajinijinio pueyano. Cunocujaari quiaa na miitiaani”. ⁹Cua cojiniaa pueyari cuno shacantuuca na niquishacari shiriiquitiuquiaari. Majaari na tojitiuniu quiquiaari cutara jiyocucacuanu-ji rupaa cucua pocuaano. ¹⁰Janiyari socua na sequereeni: “¿Casaa cua miyarini Jiyaniijianaa?” Jiyaniijiaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria”. ¹¹Cuno shacantuuca cua nunuquiaari jiyocucacuanujini, cua namijia sesoquiaariiri. Janiyari cariyojuaru quiriquiaani. Naacuajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

¹²Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetunujuanaa tariucucacuanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: “Ananías cutaraari maninia pueyano”. ¹³Ananíasri jiyacari cua niquiniucua niquiaari. Jaara tiuquiquiaari cucua, cua sequeseeeri:

“Cua tarajanu Saulonaa, maninia niquijiaa quia quiriohua”. Jiyacaritij, cua namijiaari ritia jeequequee. Janiyari maninia niquiqui Ananíasni. ¹⁴Cua sequerejaariuhua: “Pa supuetanaa Jiyaniijia Pueyasocuaajaari quia saquirio-joquiaari tariucuaaanujiniji, na niishitionura quiajaniya na panishano quia miiniuria. Quia saquiriojoquiaari-jiaariuhua quia niquiniuria taquiya pocuajinio sesa miyashijia cutara, tama na camaru rupaajiniji quia tojinuria na sequesanojuhua. Nojuacuajaari pa Jiyaniijia Jesucristo. ¹⁵Quiaari puetunu pueyapue niquiarajanaa pohuatantaniya nojuajiniji quia niquishano, quia tojishanonio”.

¹⁶Ananíasri socua cua sequequiaari: “¿Casaara quia tarishiyarini? Quiarijiani, quiaa cuara tiuquinishaaria. Jiyaniijia Jesu quia sequere: ‘Cua jiyanoori sesa cua miishanojiniji’. Nocua quia tiuushacari, quia sesa miishanoori jeequesaanutaniya”.

Pablo pohuatasano taa Jesu jiyaroquiaari nojuaja taucuaacaucani

¹⁷Janiya jaara riujiuquiaariuhua Jerusalén tiacajiniohuani, janiyari Pueyaso Secojonuujua tiajinia secojori-quiaani. ¹⁸Cua secojosacari, janiyari Jesu niquiquiaari juhua cua maquenujiniani. Cua sequereeri: “Ritia quia quiaare niquiji. Nio pueyari maja na tojittianu quiniutianiya quiajaniya, nojori quia pohuatasacari janiyajiniji”. ¹⁹Janiyari saaja na sequereeni: “Cua Jiyaniijianaa, nojoricuajaruhua niishiya janiyari quiocua tiuuniaa pueya quioojuani puetunu rerejojua tiajinijijianaa cua nujatejosocoriquiano nojori. Janiyari nojori mojojuaajuahua. ²⁰Naajuhua, quia rupaa pohuatana Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na

jacunaa toqueya cojuariquiaajaaniuhua, nojori mosacari Esteban. Janiyari jaaraaja sequequiaarini: ‘Cuaara mosaaria’”. ²¹Naa cua sequesacaritij, Jiyaniijiaari saaja cua sequereeni: “iNiiquiji quia quiaareja! Janiyacuajaari tucuaaanu quia jiyaronutaniya taucuaacaucani”.

Comandante jiitiasacari Pablo

²²Pueyari sanaa tojtiaquiquiaa Pablo pohuatasacari. Saniniuujia, Pablo jaara jiyaniquiquiaari taucua, pueyari jiyacari coteequiaari nacoonu, taucua soojeaca nojori quiniucua:

—iCuaara mosaaria cuno pueyano! iMajaari maninia jiyano pueyano rishiniuria socuatej!

Cuno pueyari naa nacooriquiaa.

²³Na juaaquionuta na nacoosacarijia, na toqueya quejootuquiaari jiyocuacaanuuri quera na macaaniutia. Naa quejootuquiaari jijojuajaariuhua.

²⁴Comandanteeri na capitáncuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuaara sequeera casaara naa pueya nacoyani.

²⁵Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniijia César rootasanotee, na nequesoreesoojua nia majacunura narta Romano* pueyanotej?

²⁶Capitán jaara tojiquiaari naa Pablo sequesantej, ritia netequiaariiri. Na comandante sequeseeeri:

—iQuiaa cocuaatia miya! iCuno pueyanona Romano!

²⁷Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucuaaree:

—Taaquiriirini.

²⁸Comandanteeri na sequerohuacuhuj:

—Romano pueyano cua quiniuria,
janiyari queraatia cua cumaneeca
niquitioquiaarini.

Pabloori saaja na sequeree:

—Janiyari Romano cutarani, nojori
tiacajinia cua rasaanuucua.

²⁹Cuno pojori, Pablo majacunura
seeratasaaquiaari juucuan, naa nojori
tojitasacaritij, Pablo shuriucuaji ritia
shiriquitiaquiaariiri. Comandante
niishishacari Pablo seetanujuanaa
Romano quiquiaari, puererejaariuhuj,
Pablo na morojotenuucua.

Tama nocuaji Pablo tacusacarijiaaja Judiocuaca jiyaniijianucua niquiara

³⁰Tariqui saniniuujia, comandanteeri
maninia niishiniu paniquiaari casaara
Judiocuaca nacootariquiaacuaa naa
Pabloni. Naaratej, comandanteeri Judiocu-
caacuara secojonaa jiyaniijianucua
rerejotequiaari. Puetunu Judiocuaca
camarucua nacasunaa maanujuanaa
rerejotequiaarijiaariuhuj. Nojoricuajaari
Sanedrín* maanu. Jiyacari Pablo numatu-
cuajiniji rupareetaquiaari cumayocua
saatijiotasanoori. Puetunu nojorijianaa jaara
tari rerejoquiaari, jiyacari Pablo tohuate-
quiaariiri. Nojori tacoji na nujuatereeri.

23 ¹Pabloori juhuacatecara pohuata-
nu coteequiaari camarucua
niquiara. Nojori sequereeri:

—Cua tapueyocucanaa, janiyari
pueyaracaanu juhuajaniya quiquiaani,
Pueyaso tojjia cua quishacari pueyara-
caanu.

²Naa Pablo sequesacaritij, pueyacuara
secojonaa jiyaniijiajanaari juaarii.
Ananías na sesa. Nojuajaari Pablo
jiyaniquiaari najuhuaana pocuaa
naasucua. Nocuaji, Ananíasri Pablo
shuriucua nujuatunaa sequequiaari ritia:

—iNa rupaajinia nia piri naa pocuaani-
quitij!

Pablo shuriucua nujuanaari jaarajaaja
na piquii. ³Majaari Pablo niishiniu
quiquiaari casaate Ananías quiquiaarini.
Naacuajitij, Pabloori juhuajaniya Ananías
sequequiaari:

—iPueyasoori saniniuujia cucua quia
naminiutianiyacujua, Moisés Rootasano
tojiyashijianaa! Nia jiyaniishacari janiyari
Moisés Rootasano tojiyashijiani, niaari
coteenu cua nequesoreya maninia taa
Moisés rootaquiaaricuajani. iQuiaa sajara
Moisés Rootasano tojiyashijia cutara,
quia sequesacari cua pishaanura nia
nequesoreyaquishacarijia maninia janiya!

⁴Pablo shuriucua nujuatunaari Pablo
sequequiaari:

—¿Quiaateeri saa rerequeteyajaa
pueyacuara secojonaa jiyaniijiaruhua?

⁵Pabloori nojori riucuaaree:

—Cua tapueyocucanaa, cua jiyanoori.
Paacuajaari naa rootasaaquiaari Moisés
nequesoreetunejiniani:

“Majaari sacuaraatia rimiaaquenu nia
camarnuucuaa”.

Cua pueyanaa, maja cutaraari cua
niishiniu quiriquiaa nojuajate pueyacuara
secojonaa jiyaniijia.

⁶Pabloori niishiquii cuno Judiocuaca
camarucua nacasunaa cuniqui quiriquiaa-
ni, noojiaqueya nojorijinijinioori
Saduceocuaca* maanujiniji quiriquiaa.
Tamasacaari saniniuujia narta Fariseo-
cuaca* maanujiniji quiriquiaacujua.
Naaratej, Pabloori jiyanoohua na rupaa
paaretaquiaari naa na sequenura nojori:

—iCua tapueyocucanaa, janiyari Fariseo
pueyanoni! Cua shipininioori Fariseo
pueyano quiquiaarijuhuaj. Canaari
Pueyaso Rupacuua tiuujiacani. Naacuajitij
canaari niishiyani Pueyasoori macunucua
samiitianijionutaniuhua taa puetunu cuarta
Fariseocuaca niya quiniaa tiuyanijia.
iNiaaquiiri jiyamitia cua nequesoreya!

⁷Pablo jaara naa sequequiaaritiij, Fariseocuacaari Saduceocuacata juhuacatecara juayonuutaquiaari tama nojorijiaaja. Naacuajitiij, nojoriiri caapiqui maapuera raquitiiquiaari.

⁸Saduceocuacaari jiyaniya maja macunucua samiitiaconu quiniutianiuhua. Nojoriiri sequeyajuahuaj: “Maja Pueyaso seya quiniu”. Pueyapuenaaari sohuanuujujuhuaj. Fariseocuaca cutaraari nojori cuaracashitishanoocua tiuya. ⁹Naacuajitiij, puetunu pueyajanaari nacooriguiaa na juayonuutasacari. Jiyacaritiij, tariucuaaananu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pablojiniji:

—iNio pueyanoori maja sesa na miiniu quiquianu! Maninia sohuanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenuitye Pueyaso panishano na miishacariini?

¹⁰Pueyari socua jiyacatequiaari nacoonu. Comandanteeri puerequiaari, na jiyanishacari Pablo naasucua socua sureesaanutaniyaquij. Naa jiyaniquiaariiri, puerajanaa pueya juaaquiosacari. Nocuai, comandanteeri ritia na soldadohua jiyaramiquiquiaari, na tiajinia nojori tiuquininiuhuaa Pablo pueya tajiniji. Naa miitiquiaariiri.

¹¹Cuno niucujani, Jiyaniijia Jesuuri Pabloocua muetaquiaari. Na sequereeri: —Quioojia quia cumaquiri Pablona. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhuaj, Césarjanaa* niquiarajuahuaj.

Judiocuaca roojotoosacari Pablo na motunura juucua

¹²Tariqui saniniuuja, noojiaqueya Judiocuacajinijinoori Pabloocua

roojotooquiaari na monura. Nojoriiri naa sequetuquiaaritiij:

—Paa jaara Pablo moyaquirini, pocua miaqueyaquirini, pocua ratuyaquirinianiuhua.

¹³Nojoriiri cuarenta canuu quiquiaari, naa sequetuquiaarini. ¹⁴Na nuhuaji, cuno pojoriiri pueyacuara secojonaa jiyaniijianucuaacua quiaquiaari, Sanedrín* maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaara more Pablojaatijia. ¹⁵Niajaninya, pueyacuara secojonaa jiyaniijianucuaanaa, puetunu Sanedrín maanujuaanaano, nia sequere comandante cuaara nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacua jiyacari niaacua na tiuquiyaquishacarijia nuu cajiniocua na moreni.

¹⁶Tamonu pueyanoori Pablo raquia caminiujuquiaari naa cuno pojori sequesano camarucuatej. Pablo raaquiaari nocuai ritia soldadohua quijia tiajinia quiaquiaari na cama Pablo na pohuatanura. ¹⁷Jaara tari na pohuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante numootenu paniya.

¹⁸Jiyacaritiij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casaa quia sequenu paniya.

¹⁹Jiyacaritiij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

²⁰Caya samijiaari na sequeeree:

—Noojiaqueya Judiocuacajiniiniori Pabloocua rojotoorucuaa. Quiaari sapojonu sequesaanutaniya tariqui quia jiyatanura Pablo, puetunu Sanedrín maanujuanaa niquiara nequesoreesocoriquiano. ²¹Quiaa jaara sequesaa, majaari nojori tojiniu. Cuarenta canuuri tari nuu cajiniocua nocuaji jamaatiyu. Cuno pojoriniaari maja na miaquenuunu quiniutianiya, majanaari na raruunu quiniutianiyajuhuj, cuaara moture Pablojaatijia.

²²Comandanteeri caya samijia sequequiaari:

—Maniniacuja. Majaari tamasa pohuatanu quia sequesano janiya. Tariucuja. Quia quiaarohua.

**Soldadohua jiyatasacari Pablo
camarnu Félix**

²³Comandanteeri caapiqui capitán piiquiaari. Nojori sequeerei na numootenura dosciento soldadohua, Cesareya tiacajinia quiojoriquiano cuno niucuja. Mariyata cuaara quiojoora setenta soldadohua caballohua nijinia cajitiujia-cajuhuj, socua dosciento soldadohua saa cashiriacajanio. ²⁴Comandanteeri na capitáncuaca sequequiaarijuhuaj, nojori niojotanura cajitiucua tamasa caballohua nijinia Pablo cajijia. Nojori sequequiaarijuhuaj:

—Niocua maninia cojaare Pablo, cuaara tiuquiiria camarnu Félix nequesoreesocoriquiano.

²⁵Comandanteeri na naajione niquitioquiaari Pablo jiyatanaa. Naa naajiosanoori quiquiaari camarnu Félixcuara:

²⁶ “Camarnu Félixnaa. Nio Claudio Lisias naajione. ¿Taa quia quiyani cua panishano camarnunaa? ²⁷Cua jiyarotasano pueyanojiniji quia pohuatareeraj. Na sesa Pablo.

Narta Judiocuacaari na motunu paniquianu. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequeereni: ‘Judiocuacaacuaji nia quiare ritia cuno pueyano, mariqui na motureeri’. ²⁸Maninia cua niishiniuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablóni, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. ²⁹Nojoriquiiri na nacootacanua Pablo tojiyaquiniucua tariucua-caanu tama nojori supuetanaa rootasanojuaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquianu, pueyaracaanu na nujuatesaanura. ³⁰Janiyari sequesaarucuaajuhuj, noojiaqueya Judiocuacajiniinionaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhuj, cuaara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuja”.

³¹Soldadohuari naa miiquiaari taa comandante sequequiaari nojoricuajani. Nojoriiri cuno niucuja Pablo jiyataquiaari. Antípatris tiacajinia tiuquiiioseeri. ³²Na niohuacata quiojonaa soldadohuari Antípatris tiacajiniji tariquicuaji riujuutiaquiaari-

hua Jerusalén tiacajinihua. Caballohua nijinia cajituninaa soldadohua cutaraari Pablo jiyataquiaari. ³³Pablo jiyatanaa jaara tiuquijioseequiaari Cesareya tiacajinia, nojoriiri comandante naajionee niqutiose camarnu Félix. Pablo na niqutiotureejaarihuaj. ³⁴Camarnu serojonu nuhuaji comandante naajionee, Pablo nequesotaquiaariiri:

—¿Tee quia rasaquiaarini?

Pabloori na riuquaree:

—Cilicia jiyajinia rasanonijia.

³⁵Camarnuuri na sequeeree:

—Janiyagua quia nequesoreeriquiani quicuara saquiriojotanaa jaara tiuquijiore.

Jiyacaritij, camarnuuri na soldadohua sequequiaari cuaara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaquiaari na quijiaara.

Tama Pablo tacusacari nocuajijiaaja camarnu Félix niquiara

24 ¹Pabloori cinco juuca camueequiaari tari Cesareya tiacajinia. Jiyacari tiuquijioquiaariiri nocuara saquiriojotanuuriquiano pueya. Nojoriiri quiquiaari pueyacuara secojonaa jiyaniijia Ananías, mariyata secaja Judiocuaca camarucuanio. Nojoritia tiuquiquiaariiri Tértulo jyanishano pueyanohuhaj. Jyanohua pocuanu niishijia. Puetunu nio pojorijianaari camarnu Félixqua tiuquitiaquiaari Pabloocuara na saquiriojotana. ²Pablo jaara tohuatesaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jyanohua niishijia. Naa niishijia quia quishacaritij, quiaari maninia quia pueya jiitiaa. Canaari naacua juhuajaniya quiyani, maninia canaa quia jiitiasacari.

³Canaari cunora quia timitiaani camarnunaa, maninia quia jiitianuucua canaa pueyaracaanu, puetunu canaa jiyajinijianaa. ⁴Maja puera cua tarishitiniu paniniu quiajaniya. Quenaaja rupaquijia canaa quia tojiricuara. ⁵Nio pueyanoori tariucuacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quiniaa Judiocuacajuhaj. Naa sesa na niishitiojonuucua pueyatej, tamasaacari maja tari na rupeunu paniniu narta pueyano. Nio pueyano tojitiajacari sesojosaquiaari Nazarenoocua tiuninaa maapue. Nio pueyanocuaajaari cunopojori jiyaniijia. ⁶Juucua Pueyaso juaatiniu paniquianuajaarihuaj, tahue na tiuquininiu panishacari Pueyaso Secojojua tiajinia. Canaari jiyamitia na quiarucuaani, canaa nequesoreesocori-quiano taa tariucuacaanu canaa supuetanaa rootasaquiaaricuaajani.

⁷Comandante Lisiari canaa na jaariutiarucuaa saajani. ⁸Canaa sequerucuaajaarihuaj: “Cante nio pueyanooocuara saquiriojotanu paniyani, cuaara quiaara camarnu Félixqua”. Naa canaa sequerucuaari. Nio pueyano quia nequesotasura, quia niishiniuria maninia. Seetanujuaanaacuaj, canaari cunora nocuara quia saquiriojotaani.

⁹Cuniqui quiniaa Judiocuacaari jaarajaaja sequeturee:

—Taaquiriirini, camarnu Félixnaa.

Naacuaaquinatejaj, taa Tértulo sequeyacuajani.

¹⁰Camarnuuri na juaashiquia shiitioquiaari Pablo pocuanura saniniuujia. Pabloori jiyacari coteeree. Naa sequereeri:

—Taaquiriirini, pocuashiyacuaaquinatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia

quishacari. Naaratej, janiyari juhuajaniya quia niquiara tama cucuaji tacunu paniyani, cuarta Judiocuaca saquiriojotacari cucuara quiajaniya. ¹¹Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuuja tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. ¹²Nojoriiri maja quenaaja na riuriatanu quiquianu janiya tamonu pueyanota juayonuutaano. Majaari na riuriatatunu quiquianu janiya pueya ruutaqueyano quenaaja Pueyaso Secojojua tiajinia. Majaari quenaaja nojori riuriatanu quiquianu janiya canaa Secojojua tiajinia juayonuutaano pueyata. Majaari quenaaja naa cua miiniu quiquiaari puetunu tiacajiniajanaa cua rucuanajosacari. ¹³Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miijiani. ¹⁴Nojori sequesacari janiyanaari Pueyaso tojjia tamaatia nojorijinijini, cua tojinuucua cuno Nazareno pueyano, taquiriirinij. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa cua tiuushacari puetunu Moisés naajiotasanoocujanaa, naajuhuj, cua tiuushacari puetunu canaa supuetanaa caminiujiushano Pueyasojiniji naajionuutasanoocujanaano. ¹⁵Janiyari juhua cucuara saquiriojotanaa pueya tiuya Pueyasoocujuhuj, taa Pueyaso samiitianijionutaniuhua macunucuan; maninia miijiaca, sesa miijiacanio. ¹⁶Naaratej, janiyari pueyaracaanu sesa miyaquiniu saniniujiuquiaani, maninia cua quiniuria Pueyaso niquiara, pueya niquiaranio. Naacujitij, janiya jaara samiitiarohuani, majaari cua macuhuaje-nu quiniutianiya.

¹⁷Queraatia marijia cua shocotejonu nuhuaji cua rucuanajosacari tamonu jiyacajinia, janiyari shusha tiuquiriohua-

cuaa cua jiyajiniani. Tamonu jiyacajiniji Jesuucua tiuunaa niqutiojosano cumaneeca tiuquitiarohuacuaanijia. Janiyari na tiuquitiarohuani na jatanuhuaa Jerusalén tiacajinia, Jesuucua tiuunaa casamijiuniucua niqutiojosocoriquiano, mariyata cua jiitiasanojiniji cua niqutionuhuaa Pueyasora. ¹⁸Naa cua miiniu nuhuaji Pueyaso Secojojua tiajiniatej, Asia jiyajinijinio Judiocuacaari cua naacutucanu tohuataano juucua Pueyaso Secojojua tiajiniji. Janiyari juucua tohuatariquihuani cua cuaqueya cua jeequenu nuhuaji, taa canaa supuetanaa niishitiojosaquiaricujani. Cuno juuca, majaari queraatia pueya quiniu quiriquiaa Pueyaso Secojonuujaajinia. Majaari quenaaja pueyata cua juayonuutanu quiriquiaajuhuj. ¹⁹¿Teete cuno pojoricuarani? Mariqui niya nimiacuara cucuara na saquiriojotanuunura, janiya jaara sesa miiquianuni. ²⁰Cucuara saquiriojotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quituquianu jiyacarijuhuaj. Nojori cuaara sequeera, ¿cuno camarucuate cua sequecanu janiya sesa miiquianuni? ²¹¿Pueyateeri cucuara saquiriojotaa soj, nio cua sequenuucua Judiocuaca camarucua: “Niaari cua nequesoreya quiarijia, cua niishishacari macunucuaari samiitianijiosaanutaniuhua”? Janiyacuajaari naa nacacanu camarucua nequesoreesacari janiyani.

²²Camarnu Félix jaara naa tojiqiaari Pablo sequesantotej, nojuajaari pueya sequequiaari:

—Comandante Lisias cuaara tiuquiiriajaara, janiyacua Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pabloocuara saquiriojotanaa

pueya tarinitiaquiaarijiaara. ²³Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara.

Niocua maninia na cojuarenoj. Na rupuenaa, tapueyocuacanio, nojori jaara Pabloocua nimiaquia, majaari nocuaji na tenujununoj. Nojori cuaara na niquitio-tuura na panishano.

²⁴Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocua-taari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—iPablo nia tohuatere! Janiyari cua niquiocuata na tojinu paniyani. Cuaara canaa niquiara pohuataara taate Jesuucua tiuushanojuaarani.

²⁵Naacuajitij, Pabloori Félix pohuata-quiaari nojori niquiara taate pa naata maninia miijiara pa quiniuni. Pohuata-quiaarijiaariuhuj taate pa naata tama pa cuaqueyajaaja pa cojuanu maniniani, sesa pa miyaquiniuucujia. Naajuhuj, Pabloori na numootequiaari Pueyasoori sesa miijiaca saniitionutaniya.

Camarnu Félix jaara naa tojiquiaaritij, jiyanhua shiriquiquiaariiri. Pablo sequereeri:

—iTariucua! Quia quiaarohuacuara-jaara. Janiya jaara jeya quiriquiani, janiyacua quia sequereeraniuhuj.

²⁶Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocojonura. Nojuajaari juucua jiyaniquiaari Pablo naasucuaari cumaneeca na niquitionuta-niya na cartesaanura. ²⁷Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniuujia camarnura jiyatesaaquiaari Félix niti. Majaari Félix tohuatenu

quiaquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

Pablo pohuatasacari Festo niquiara Jesujiniji

25 ¹Jiyacaritij, Festoori tiuquiquiaa-ri Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari. ²Jerusalén tiacajinia na quishacari, pueyacuara secojonaa jiyaniijianucuaari tii Judiocuacajinijinio socua tojishano camarucua Pabloocuara saquiriojota-quiaari camarnu Festo. ³Nojoriiri camarnu Festo sequequiaari cuaara na soldadohua jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. ⁴Camarnu Festoori saaja nojori riucuaquiaari:

—Nujuatesano quia Cesareya tiacajiniacuajaruhua. ¿Maatucua casaara niyara rishaareni? Janiyacuajaari nocua tacatenutaniuhuan.

⁵Camarnuuri nojori sequequiaarijiu-huaj:

—Niajanijajinijinio socua tojishano pueya cuaara quiojohuara cuata Cesareya tiacajinia. Nojoriiri na naata Pabloocuara saquiriojotanu cua niquiara tii, cua niishiniuria maninia, Pablote seetanujua-naa sesa miiquianujuaara.

⁶Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniohuari. Na tiuquinu nuhuaji, saniniuujia tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohuateera na nequesoreesocoriquiano.

⁷Judiocuaaari tari tiuquiiijioquiaari Jerusalén tiacajiniijiihuaj, Pabloocuara na saquirojotanuunura. Pablo jaara nujuatesaaquiaari camarnu tacoji, cuno pojoriiri jaarajaaja catecanoquiaari Pabloocua. Nojoriiri jiyanoehua sesa nocuara saquirojotanuquiaari najuhua-na queraatia casaa. ⁸Jiyacaritij, Pabloori tama nocuaji na tacusacarijiaa naa sequequiaari:

—Maja sesa cua miiniu quiquianu. Janiyari tariucuaaanu Moisés Rootasano tojiquiaaanihuaj. Majaari sesa cua miiniu quiquianu Pueyaso Secojoua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

⁹Camarnu Festoori jaarajaaja Judiocua-ca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajani-ya?

¹⁰Pabloori na riucaquiaari:

—¿Majateeri Roma tiacajiniji pa jiyaniijiajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaa-ri niya camarnura quia jiyatecanu.

Quiaacuajaari niishiyajuhua, majaari sesa cua miiniu quiquianu Judiocua.

¹¹Janiya jaara sesa miirri seetanujuanaa-ni, cuaara cua motuuraqui. Cucuara cuno pojori saquirojotasano jaara coriaa quiri, majaari quenaaja tamonu pueyano naata niquitionu janiya cua mosaanura.

¿Janiyatucua casaara mosaare najuhua-nani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.

¹²Camarnu Festo pocoojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia

Césarqua, nojuajanaa nequesoreenura quiajaniya. Janiyari nocua quia jiyaronu-taniya cua soldadohuatani.

Jiyaniijia Herodes* Agripa niquiaa Pablo pohuatasacari Jesujiniji

¹³Naa Pablo sequesaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanu-ra nojuaja. Agripaari tiuquiquiaari na rimiatu Bereniceta. ¹⁴Nojori camueenuju-sacari camarnu Festo tiajinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. ¹⁵Jerusalén tiacajinia cua quishacari, Judiocuaa-cuara secojonaa jiyaniijianucuaari nocuara cua saquirojotacanu, Judiocua-ca camarucuata. Nojoriiri cua sequetucanu Pablo cua motenura.

¹⁶Janiyari saaja nojori riucaacanuni:

“Roma tiacajiniji jiyaniijiaari maja ritia na monu pueyano. Nocuara saquirojota-naa cuaara nijioma niya nocuara saquirojotanuunurajaatijia. Monu panishano cuaara rihuaneera tamajaaja quenaaja nocuaji, jaara seetanujanaa quiaquiri nocuara saquirojotasano”.

¹⁷Naacujitij, Jerusalén tiacajinijinio pueya nocuara saquirojotanuuriquiano jaara cucua tiuquijiocanu, majaari socua cua tarishiniu quiquianu. Janiyari tariquicuaji nequesoreeja cajitiujinia cajiquianuni, pueya camarnu cua quishacari. Janiyari jiyacari cua soldado-hua sequereeni nojori jaatucunura cucua cuno pueyano. ¹⁸Cuno pojori Pabloocua-ra saquirojotanuucanuni, nojoriiri maja quenaaja na saquirojotanuunu quiriucuaa juhua cua niishirijosano.

¹⁹Saaja tamaatia nocuara cua saquirojo-tanuureeri. Pablonaari nojori supuetanaa Pueyasojiniji rootasano tamacaquiaa

saaja. Cua sequetureejaariuhuj, Jesu jiyaniishano pueyanonaari mosaquiaari. Pablonaari saaja pueya niishitiojiyacujua, cuno Jesu jiyaniishanonaari samiitia-quiaariuhua. Saminionaari quiari quiyajaa. ²⁰Naa cua tojishacari nocuara pueya saquiriojotasantej, majaari cua niishiniu quiquianu taa cua miiniutiani-yani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” ²¹Nojuajaari saaja cua sequecanu: “Jiyaniijia César Augustojuanaa cuaara cua nequesoreera juhuari”. Janiyari cunora niyaja nujuatesano na jiitiaani, janiya cuaara na jiyarore jiyaniijia César Augustoocujaa-tijia.

²²Jiyaniijia Agripaari camarnu Festo sequequiaari:

—Janiyari cuno pueyano tojiniu paniyajaacuhuj.

Festoori na riucaquiaari:

—Quiaacujaaari tariqui na tojiniutiani-ya.

²³Tariqui, jiyaniijia Herodes Agripaari niquiaariuhua Bereniceta. Nojoriiri tiuquitiaquiaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niquishano. Nojori tiuquitasacari, nojori cojiquiaariiri soldadohua camarucua, mariyata tama cuno tiacajiniijinio camarucujaaajanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano. ²⁴Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niquiani, queraatia Judiocuacaari nocuara cua saquiriojotanuquiaa, Jerusalén tiacajinia cua quishacari, niya Cesareya tiacajinia-juhuaj. Nojoriiri pueyaracaanu cua

taajetequiaa. Cua sequetuquiaari: “Cuno pueyano cuaara mosaaria camarnunaa”. ²⁵Janiyacujaaari tari niishiyani, nio pueyanoori maja sesa na miiniu quiquianu. Naacujajitij, janiyari niishiriojiyani, ¿pueyanotucua casaara najuhuaana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijiajanaa nequesoreenura nojuaja. Janiyari cunora na jiyaronutaniyani. ²⁶Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriquianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocua-ra casaara nio pueyano cua jiyaroree nocuani. ²⁷Majaari cua naata naajaa jiyaronu quiasano pueyano, maninia nequesoreyaquishoojua.

Pablo riuhanesacari jiyaniijia Agripa

26 ¹Jiyacaritij, Jiyaniijia Agripaari Pablo sequequiaari:

—Quiocuaji quia riuhanereja, jaara seetanujuanaa quiaquiri quicuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

²—Timiyanijia jiyaniijia Agripanaa, quia sequesacari cua pocuanura quia niquiara, tama cua tacunura cucujiaaja, Judiocuaca saquiriojotasanojiniji cucuara. ³Quiaari puetunu cuarta Judiocuaca mijiosanojuanaa niishijajuhuj, puetunu canaa nacojotasanojuanaanio. Janiyari cunora quia sequeyani, nareja cua tojiri cua pohuatasacari quiajaniya.

Pablo pohuatasacari taa na quiquiaari Jesuucua na tiuyaquishacarijiani

⁴Puetunu Judiocuacajanaari niishiyaju-huj taa quijia cua quiquiaari cua

naatujajiniji nojoritia cua quishacari cua jiyajiniani, Jerusalén tiacajiniano. ⁵Cuno Judiocuaca quia nequesotasureeraj. Nojori cuaara quia pohuataara jaara paniri pohuatanu. Cua mashajajiniji, janiyari seetanujanaa Fariseo quijiani. Fariseocuacaari puetunu canaa supuetanaa rootasano Pueyasojinijijianaa tojtiaja cutara, socua tamasa cuarta Judiocuacajiniji. ⁶Nojorijiaari cucuara saquiriojotacanu cua tiuushacari Pueyasooqua, taa na samiitianijionutaniuhua macunucuanu. Pueyasoori nojori samiitianijionutaniuhua taa na sequequiaari tariucuacaanu canaa supuetanaacuajani. ⁷Quiarijiani, canaa supuetana Israel doce niquiohuacuajinio caneno pueyari naa seetanujanaa Pueyaso sequesano niquiniuria sashiyajaa. Naaratej, nojoriiri pueyaracaanu Pueyaso secojonuquiaa, juuca, niucuanio, Pueyaso na tojtiasacari. Naa cua sashishacari Pueyaso sequesanojuhuaj Jiyaniijia Agripanaa, nio cuarta Judiocuacaari quiarijia cucuara saquiriojotanuquiaa. ⁸¿Niaateeri janiyari Pueyasoori maja na naata macunucua samiitianijionuhua?

Taa Pablo miitiaquiaari Jesuucua tiuuniasa tarijiani

⁹Janiyari tarijia sequequiaari tamajajani sesa cua niishiriojosacari Jesujiniji: “Nazaret tiacajinijinio pueyanooqua tiuuniasa pueya paracaariiraj”. ¹⁰Janiyari seetanujanaa taraatia nojori miitiaquiaari Jerusalén tiacajiniani. Pueyacuara secojonaa jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniasa riuniujiuquiaari nujuatejojuajiniani. Nojori jaara puecoosaaquiaarijuhuaj, janiyari jaarajaaja sequequiaarini: “Maniniacuaja, cuaara puecoosaaria”. ¹¹Janiyari

sequeyarucua naa miitiaquiaari Jesuucua tiuuniasa pueyari, nojori cua pishojonura Jesuucua nojori tiuunio.

¹²Janiyari naa miitiaquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanoqua nojori juaajia quiquiaarini. Majaari quenaaja nojori cua niquiniu paniniu quijia. Naa cua miitiasocoriquiano nojoritij, janiyari nojori pajequiaari tucuacaanu tamonu jiyaca tiacajiniani.

Pablo pohuatasacari taa Jesuucua tiuujia na quiquiaarini

¹²Naacuajitij, janiyari juuca quiariquiaa Damasco tiacajiniani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniasa pueya cua miitiasocoriquiano. ¹³Nucua cua quiasacari jiyaniijia Agripanaa, janiyari jiyocuacaanu nunusaaquiaarini, cuata quiojonaajuhua. Cuno shacantuucaari socua jiyanoqua shacantuuca quiquiaari pananujiniji. Panacariiri jiyacari quiriqiaa. ¹⁴Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiquiaari rupaani. Hebreo rupaaajinia cua sequeriquiaari: “iSaulo, Saulonaa! ¿Casaara puera quia miitiaa janiyari? Naa quia miishacaritij, quiaari tama quia cuaqueya miitiaajaacuajua. Juhua juaajia pueyano, na juaashacari saaja mocoshoco patiyashiyari”. ¹⁵Janiyari na sequereeni: “¿Cantequia Jiyaniijiana?” Cua riucaareeri: “Janiyacuajaari Jesuni, quiaa na miitiaquiaani. ¹⁶Quia sanerohua. Janiyacuajaari quiocua muetareeni puetunu cua panishanojuanaa miijiaa cua jiyatenura quiajaniya, quiarijia janiyajiniji quia niquishano quia pohuatanurajuhua. Naajuhua, na nuhuaji janiyari quiocua muetanutaniuhua

huani janiyajiniji quia niquishanorano pohuatana quia quiniuria. ¹⁷Cua jiyarosa-cari quiajaniya, janiyari quiarta Judiocuacaacuaaji quia cojuanutaninyacua-jani, tamonu jiyacajininijinio taucuacaacuaajinio, tiqiyocua quia rucuanajosacari janiyajiniji quia poojotasacari. ¹⁸Nojoriicua quia jiyaroyanijia, janiyajiniji nojori quia pohuatanura, maja juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiushacari. Nojori jaara naa miiri, Sesaacaari maja tari nojori jiyaniijia na quiniu quiniutianiya. Naa nojori tiushacari cucuatej, Pueyasoori puetunu sesa nojori miishanojuanaa jiyanooniutianiya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jiitiasanojinijijianaa nojori jiitianurajuhuj”.

**Pablo pohuatasano Jesu
tojijiara na jatanujiniji**

¹⁹Naacuajitij jiyaniijia Agripaanaa, janiya jaara naa tojiquiaari sequeshiyano jiyocuacaanujini, majaari cua tarijionu quiquiaarinioj. ²⁰Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarinini, na nuhuaji Jerusalén tiacajinia, mariyata puetunu cuno Judea jiyajiniajanaanio. Maja saaja cuarta Judiocuaca cua pohuatanu quiquiaari Jesujiniji, janiyari taucuaca pohuata-quiaarijiuhuj. Nojori nacasuquiaarinijia cuaara sesa nojori miishano carteera, Pueyasooocua nojori tacatonuhuara nojori jiuujia. Janiyari nojori sequequiaarijiuhuj, cuaara saaja maninia miijiaca quiriira, na niishishaanura Pueyasoori seetanujuanaa nojori jataniquianu. ²¹Naa cua pohuatanuucuatej jiyaniijianaa, cuarta Judiocuacaari cua quiatucanu

Pueyaso Secojonuujua tiajinia. Cua motunu paniquianuuri. ²²⁻²³Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyanio. Majaari tama cua niishishano-juaaja cua pohuatanu quiquiaa. Janiyari pueya niishitiojoquiaani taa tariucuacaanu Pueyaso sequesano caminiujiunaa naajionuutaquiaaricuaajani, naajuhuj, taa Moisés naajiotasano quiya tariucuacaanu Pueyaso Rupaajiniacuajani. Nojori naajionuutasanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na cusonu nuhuaji, nojuajaari coteenu samiitiariquianohua. Jaara samiitiarohua, nojuajiniji pohuata-sanoori puetunu pueyapuejanaa cuhuatanutaniya. Naacuajitij, nojoriiri niishiniutianiya nojori jaara nocua tiuuri, nojoriiri samiitiaconutaniuhujuhuj; Judiocuaca, taucuacanio”.

**Pablo tiutiniu panishacari jiyaniijia
Agripa Jesuucua juucua**

²⁴Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablona? ¡Quia mueyocuaquui seseree puera quia niishiniuucua!

²⁵Pabloori na riucuquiaari saaja:

—Maja cua paatenu, camarnu Festonaa. Cua sequesanoori seetanujua-naa, maja cuaracashiniu. ²⁶Jiyaniijia Agripaari puetunu cua sequesanojiniji niishiyajuhuj. Cunora majaari cua puerenu na niquiara pocuanu. Nojuaja naasucuaari tarijia tosaquiaaricuaaja Jesujiniji, Jesuucua tiuunaa pueya miishanojinijijiuuhuj. Puetunu canaa

miishanojuanaari maja jiyasohuaja na miishaanu quiquiaa. ²⁷Jiyaniijia Agripaanaa, ¿quiaate тариуаааааа Pueyaso sequesano caminiujiuniaa naajionuutasanoocua tiuyajuhua? Quiaacuaajaari nocua tiuya. ¿Naatejaara-tej?

²⁸Jiyaniijia Agripaari na sequequiaari: —¿Quiaateeri ritia cua jiyatenu paniya Jesuucua tiuuniara?

²⁹Pabloori na riucuaquiaari: —Naajaa, ritia, na nuhuaji soj, taa quia paniyacuaajani. Pueyaso maara seetanujuanaa naara quia jiyatere taa quia sequeyacuaajani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniuriajuhuaj. Maja naatej, taa cumayocuata moronucua cua nujuatashuyanijia.

³⁰Jiyacaritij, jiyaniijia Agripaari sanequee, camarnu Festojuhua, Berenice-nio, puetunu cuniqui nojoritia cajituniiaa pueyano. ³¹Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiquianu na mosaanura, maja quenaaja na nujuatesaanurajuhua.

³²Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

27 ¹Camarcua jaara sequequiaari canaa buquejinia jiyarosaanuta-niya Italia jiyajiniani, Pabloori jiyacari narta quioosano pueyata cojiritiasa-quiaari niqutionu soldadohua capitán. Cuno capitán sesaari quiquiaari Julio. Na

soldadohua maanuuri sesojosaaquiaari “Augusto”. ²Jiyacaritij, Adramitio tiacajiniji buqueeri quera ruparetari-quiaa, Asia jiya tiacajinia shiiniuquitiariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. ³Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuaara tacaara na rupuenaa pueyacua, nojori na saruhuatanura Sidón tiacajinia, naajuhua, na rupuenaa niqutionura puetunu Pablo panishanojuanaanio. ⁴Canaa jaara jaaretaquiaari Sidón tiacajinijini, canaari canaa muenecara niqumiaa Chipre jiya tucuaatijani. Paratuuri buque nacaacoji piyarojori-quiaa saaja. ⁵Canaari Sidón tiacajiniji niuutiaquiaari Cilicia jiyacuani, Panfilia jiyacuanio. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

⁶Capitánri cuniqui riuriataquiaari Alejandría tiacajinijinio buque. Italia jiyajinia quiariquiaari. Naaratej, canaa tacaditaaquiaari cuno buquejinaari, tii canaa quianura saniniuuja. ⁷Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacuajitij, canaari Salmón jiya tucuaatijaniyojua shuriucua-ratamaani. Canaari Creta jiya tucuaatijaa camarucutamaajaniuhua. ⁸Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriucua quiya.

⁹Canaari puera tarishiquiaari tarini. Judiocuaca miaquenuyaquiniu juucaari tari shocoquiaari. Jiyacaritij, shoniniacu caminiyajiniaari puereeta quijia tari buqueta jaaretanura. Pabloori juucua sequequiaari:

¹⁰—Camarucuanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya. Paa naasucuaari cusonuunutanijahuaj. ¿Casaatejaj pa toyani?

¹¹Pablo jaara naa sequequiaaritij, majaari buque jiyatana capitán tojini quiquiaarinioj. Saaja buque camarujua-naa tojiquiaariiri, buque capitánno.

¹²Cuno tacatajajiniji canaa tii tiutiari-quiaani, majaari maninia quiquiaari shuniya canaa tajitiniuria tii. Nocuaji, puetunu pueyajanaari sequetuquiaari:

—iNiiquiji pa quiaarej! Fenice tacatajajinia pa quishii shuniyacuaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatiajaacuaja.

Shoniniacu caminiyajinia paratu piyarojosacari jiyanhua nojori

¹³Jiyacaritij, paratuuri jacaria piyarojonu coteequiaari pananu shuucuaji, canaa muenecarajiniji. Naaratej, nojoriiri sequetuquiaari:

—iPa naatacuajaqui niiquiji quianu!

Canaari cuniquiji ruparetaquiarini. Creta jiya tucuaatiaja shuriuquiumia jaaretaareeri. ¹⁴Na jaaretasacari shiitiani-yojua, paratuuri canashiyaquiji jiyanhua piyarojokuiaari buque. Cuno paratu sesaari quijia “Noreste”. ¹⁵Paratuuri buque capotariquiaa na shuucujiria saaja. Naaratej, majaari canaa naata jaaretanu quiriquiaa paratu piyarojosacaji. Paratuuri saa canaa patariquiaajaa. Nocuaji, canaari buque tarinitiaquiarini

paratu cuara na capotaara tamajaaja.

¹⁶Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanhua poonijioquiaari cuniquini, canaa tacaniniuhua buque cacojiria cuno boteniyojua. ¹⁷Bote tacanishaanu nuhuaji, canaari buque cuaqueya morojoquiarini na cumaquiniuria na jiaqueyaquiniucuaji. Pueyari na puerenuta sequetuquiaari:

—iParatuuri pa capotanutaniya jaaquijiniera! iPaari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari. Paratuuri saaja capotaquiaari buque. ¹⁸Jaara juhuaquequiaari, paratuuri saaja jiyanhua piyaroriquiaajaa. Naaratej, nojoriiri buque pasano casami quejoonu coteequiaari moojinia. ¹⁹Canaa camueenujusacari jiuujianaraca juuca naquiya canaa miishacari, canaari buque casamijianaa quejooquiaari socuani, buque namuenura quenaaja. ²⁰Tari canaa shocojoquiaariiri queraatia juuca. Majaari quenaaja canaa niquini quiquiaari pananu, ryanio. Paratu piyarojosacari canaacua, mohuacaari socua jiyanhua cajiniucuquiaari canaacua. Nocuaji, canaari niishiriojori-quiaani canaari quiarijia cusonuunutanianiyani.

²¹Majaari tojetaarucujanaa quenaaja canaa miaquenu quiquiaari pueyaracaa-nu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuanaa, niaa jaara tojiqiuani quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiyani. ²²Naajaa,

nioojia nia cumaquiri. Maja quenaaja niquiriyatu pajaniyajinjinio cusun quiniutianiya. Pa buque cutaraari juhua rapitiasaanutaniya puetunujuanaa.²³ Janiyari quiarijia cua maquenujinia cua Jiyaniijia Pueyaso seru niquirii cua shuriucua nujuaanoni. Janiyari cuno Pueyaso tojjijiani. Janiyacuajaari na pueyanoni.²⁴ Pueyaso seruuri cua sequeree: “Majaari puerenu Pablonaa. Quiaacuajaari jiyaniijiajanaa Augustoo-cua tiuquiniutianiya Roma tiacajinia. Quiaari na taccoji nujanutaniya quia pocuanura. Naajuhuj, Pueyasoori quia secojosano tojiriucuaa. Naaratej, puetunu quiata quiniaajanaari quiata rishiniutiani-yajuhuj”.

²⁵Naacujitij camarucuaanaa, nioojia nia cumaquiri. Janiyacuajaari seetanujua-naa niishiyani, naa quiniutianiyaari taa Pueyaso seru sequeree janiyacujani.²⁶ Naajaa, paari tamonu jiya tucuaatiajaa-cua juhua niojosaanutaniyani.

Pabloori naa canaa cumanijiaquiaari.

²⁷Pueyaracaanu canaa jaaretasacari shoniniacu caminijinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriaajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani.²⁸ Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na taccoji shanacutuquiaariuhua, saaja veintisiete metro queroni quiriquiaari.²⁹ Nojoriiri puerequiaari buque naasucuaari shoniniacu caminia casaque-yaji pojotujua saicua cutetanutaniya.

Nocuaiji, buque pajamaji sohuaneyocuata morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuaara juhuaqueera.

³⁰Jiyacaritij, buquejinia poonijionaana pueyari juucua cuno niucuaaja jiyasohuaja mashiyocuatumu paniriquiaa buquejiniji. Naaratej, nojoriiri buque nacaacoji sapojonu tinijiotariquiaa niajaaca casaa moojinia. Jiyasohuaja roshinituriquiaa jiyocuacaanu tacanishano boteeri, tii na mashiyocuatumura.³¹ Pabloori jiyacari na jiyatana capitán toquiaari, na soldado-huanio. Naa nojori sequequiaariiri:

—Cuno pojori jaara niya juhuaqueya-quimia pata, niaari cusunuriquiano.

³²Soldadohuari ritia jiyocuacaanu tunusano bote neyocua jiyatajotaquiaari. Moojinia na tintiuriiri. Paratuuri na piyarojoquiaari tamoco nojorijiniji.

³³Juhuaquenu panishacari, Pabloori puetunu buquejinia quiniaajanaa sequequiaari cuaara quenaaja miaquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhuj.³⁴ Quiarijia nia miaquerecuara, nia cuaqueya nia cumaquitajara quenaaja. Majaari quenaaja niquiriyatu niajaniyajinjinio cusun quiniutianiya quiarijia.

³⁵Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niquiarajanaari. Na nuhuaji miaquerohuari.³⁶ Tamasaca jaara naa niquiquiaari Pablotej, puetunu nojorijia-naari noojia cajitiquiaari. Pan satureejaariuhuj.³⁷ Cuno buquejinia, puetunu canaajanaari quiquiaarini doscientos setenta y seis pueya.³⁸ Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

Buque coquesacari caminiajinia

³⁹Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatiajatejaara cunoni, nojori na niquiriquiaani. Nojoriiri cuno jiya tucuaatiajaacua niquiquiaari puereetuca surocohua. Jaaquiaari puetunu na shocuajanaa quiriquiaa. Naacujitij, nojoriiri sequetuquiaari:

—Buque pa saniri shiitianiniu cuno surocohua.

⁴⁰Buquejinia poonijionaa pueyari niajaaca sohuaneyocua jiyatajotaquiaari. Cuno niajaacaari caminia jiuujiajinia jateequiaari cuniquijia. Nojoriiri buque niquinijiotetajaa roshinitiaquiaarijiuhuj, buque tacutajara. Buque nacaacuaji teeja toque tacanitiatureejaariuhuj. Buqueeri canujutaaree jaaquiajinia, paratu piyarojosano. ⁴¹Buqueeri saacariji jaaquiajinia riitiseequiaari, caminia cajiniucuasacari mohuaca paatishano jaaquiajinia. Buque nacaari jiyanhua tiuquishii cumaatia jaaquiajinia. Majaari quenaaja na naata pooniu quiriquiaa na matasaquiji. Na pajaari maa rapuequiaa-rijia moo cajiniucuasacari jiyanhua nocua. ⁴²Soldadohuari nojori jiyatasano quioosano pueya puecoonu paniquiaari cuniquijia, nojori jyanishacari cuacunu- taniya naasucua, mashiyocuatumaari. ⁴³Capitán cutaraari Pablo tiuqutiniu paniquiaari jyanijia Augustoocua.

Naaratej, na soldadohua sequequiaariiri:

—iMaja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuaara cuacoora coteenu, jaaquiajinia rupaatiushicuuaari. ⁴⁴Cuaashijianucua saniniujia cuaara buque jiniacumaji suruhuatuneecaacua jacamatuura na cuatajara. Tamasaca cuaara buque neecaacua jacamatuurajuhuj.

Naa miitiquiaariiri. Puetunu pueyaja- naari jaaquiajinia rupaatiushiiquiaari.

Pablo quishacari Malta jiya tucuaatiajajinia

28 ¹Puereeta canaa cuaconu nuhuaji shoniniacu caminiajinia, canaari namitia puetunujuanaa maninia tacataseequiaari cuno jiya tucuaatiajaa- cuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. ²Cuno jiya tucuaatiajaacua quijia taucuaacari maninia canaacua jiyanooquiaari. Shiniquiaari quiriquiaa. Maruuri niriqiaajuhuj. Naa canaa shiniquiosaca- ritij, taucuaacari canaara noshitiquiaari puereetuca mani. Na nuhuaji canaa sequetureeri:

—Miji. Nia jitiushii.

³Pabloori naanacucua reratejoriquiaa- juhuaj. Manijinia na quejooriquiaari. Jiyacaritij, soconuquiiri maniicujia mashiriquiaa juucua. Pablo juaashiquia saariiri. ⁴Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niquitiquiaaritij, tama nojorijiaarijia sequetooquiaari:

—iNio pueyano naasucuaari pueyano moju! Cocuaatia miirij juucua shoniniacu caminiajinia na cuasacari buquejinijiri. Pueyasoori quiarijia saniniujia cunora soconu na sajiritii na cusonura.

⁵Pabloori saaja manijinia majiriataree soconu. Majaari quenaaja na sajiyashi noonu quirii. ⁶Puetunu pueyajanaari na sashiriquiaa, taacari na poreenutaniyani. Na sashitiuriquiaajaariuhuj na jyanitius- hacari canashiyaquiji cusunutaniya naasucua. Naa pueyaracaanu na sashitiu- shacari juucuatej, nojoriiri socua tamaatia niishiriojonuquiaari. Nojoriiri Pablojinij sequetooquiaari:

—iCuno pueyano naasucuaari pueyas- ojuhanajaj!

⁷Cuniqui canaa quishaquini, canaari tamonu pueyano cuhuariquia shuriucua quiriquiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojuajaari canaa masuuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajinia camueequiaarini. ⁸Cuno camarnu queeri jiyacari cusosu matariquiaa. Jiyanhua naseecaari quiriquiaa. Coriyacau rurequeriquiaajaariuhuj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secojosacari, nocua niaquiaari na juaashiquiaari. Pueyanoori naatarohua. ⁹Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijiuhuj. Pabloori puetunujuaanaa na naatanijioquiaari. ¹⁰Naa Pablo miiniucuatej, cuno pueyari na jiitiasano casamijiniji canaa niquitioquiaari nareja. Na nuhuaji, canaa jaara quiaquiaari cuniquiji tamonu buquejiniani, nojoriiri canaa jiyatajara canaa panishano niquitiojotquiaari narejajuhuj.

Pablo tiuquishacari Roma tiacajinia

¹¹Canaa sashishacari shuniya cuaara tajiiria, jiuujianaraca racaari canaa shocojoquiaari Malta jiya tucuaatiajaacua canaa quishacari. Alejandría tiacajinijinio buqueeri tii nujuatariquiaajuhuj. Shuniyacuaji tiutiaquiaari tiiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. ¹²Canaari Siracusa tiaca tacatajajiniji tiutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua.

¹³Cuniquiji canaa quiasacari, canaari cuno jiya tucuaatiaja shuriucuaataareeni. Canaari Regio tiacajinia tiuquishiini. Tariqui, paratuuri maninia piyarojori-quiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuaanaani. ¹⁴Puteoli tiacajinia Jesuucua tiuunaa pueyari canaa masuuquiaari na tiajinia. Canaa sequetuquiaariiri:

—iMaja canaa shoconu pueyanaa!
Canaa tiajinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. ¹⁵Roma tiacajinijinio Jesuucua tiuunaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jiyanishano tiacajinia. Pablo jaara narta Jesuucua tiuunaa niquiquiaari, noojia cumaquiquiaariiri. Naaratej, Pueyaso sequequiaariiri:

—iPaacarasho cua Pueyasonaa!

¹⁶Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niquitioquiaari Roma tiacajinia quioosano cojuanaa camarnu. Pabloori saniniuujia tarinitiasaaquiaari tamonu tiajinia na quiniuria tamajaaja, tamonu soldadota na cojuariquiano.

Pablo pohuatasacari Jesujiniji Roma tiacajinia

¹⁷Jiuujianaraca juuca na quishacari tari Roma tiacajinia, Pabloori puetunu tii quijiaa narta Judiocuaca camarucujanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuacanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niqitiotucanu Romano pueyari, cua morosaanura. ¹⁸Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. ¹⁹Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuaara cua jiyarotuura jiyaniijajanaacua niya Roma tiacajiniani, Césarjanaa* nequesoreenura janiya. Naajaa, majaari cua saquirojotanu quiniutianiya saniniuujia nojoriicua, cuarta Judiocuaca nojori quiniuucua. ²⁰Janiyari cunora nia niquiniu paniriquiaani, cua pohuatanura niajaniya taa puetunujuanaa parta Israel pueya niishiyacuajani, niajanijahuaj; macunucuaari samiitianijiosaanutanihua. Janiyari cunora cumayocuata moronucua niya quiyani.

²¹Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajionee, canaa pohuatasaaanura quiajanijajiniji. Cuniqijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pohuatanuunu quiquianu canaa quiajanijajiniji. ²²Canaari saaja niishiyani, puetunu tiquiyocuajanaa sesacasaaquiaaquiniaari Jesujiniji pohuatasano. Quiaa mariqui cunojiniji canaa pohuatate, canaa niishiniuria socua.

²³Jiyacaritij, Judiocuacaari Pablo sequetuquiaari:

—Canaacua tamonu juuca quia tojiqii-quiani.

Na nuhuaji, nojoriiri na sequetusano juuca nijioquiaari. Pablo quijia tiajinia

mishitiuquiaariiri. Pabloori nojori niquiaara pohuatanu coteequiaari tariquii-cuaji. Naa niniyareejaari. Juucua nojori niishitiojoquiaariiri, Jesuuri seetanujua-naa Pueyaso Jiyarosano quiquiaari. Nojori sequequiaarijiaariuhuj taa Pueyaso jiitiaa na jiyanooshano pueyani. Naajuhuj, tariucuacaanu Moisés naajiotasano Jesujiniji niishitiojoquiaariiri, Pueyaso sequesano caminiujuniaa naajionuutasanonio. ²⁴Noojiaqueya nojorijinijinioori Pablo sequesano tojiquiaari cutara. Tamasacaari saaja na cuaracashitiquiaari saniniuujia. ²⁵Nojorijinijinio jaara Pablo niishitiojosano tojiquiaari cutara, tamasaari nojoritia juayonuutatu coteequiaari. Naa na juayonuutasacaritij, tohuareetaquiaariiri na quiojonuhua. Pabloori jiyacari nojori sequequiaari:

—Pueyaso Sohuanuquiiiri seetanujua-naa tariucuacaanu Pueyaso sequenu panishano caminiujunia Isafas pohuata-niquiaari parta Israel pueya niquiaara, jaara na sequequiaari:

²⁶“Quia quiaare cuno pueyacua. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niquiniutianijahuaj. Majaari quenaaja nia niishiniu quiniutianiya’. ²⁷Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijiaari mishiquiojosanojuhuaj, na niqititaa-quiniuucujaji, maja na numaata na tojitianura, noojiata na niishitiuya-quiniurianio. Naa jiyatecanu nojorinijia, maja na niishitiunioria janiya, mariqui cucua tacateturohuari, nojori cua naarajonura”.

²⁸Pueyanaa, nia niishiri. Naa jaara ruuretare cua pohuatasano Jesujiniji,

taucuacaari saniniuujia pohuatasaanuta-niyacujua, taa Pueyaso jiyanooniu paniya pueyani, maninia na jiitianura nojori. Taucuacaari na tojitianutaniya cutara.

²⁹Pablo jaara naa sequequiaari nojoritij, Judiocuacaari quiojiyarohua. Tama nojorijiaarijia juayonuutaarohua na quiojosacariuhua.

³⁰Caapiqui marijiaari Pablo shocojo-quiaari rupaquijia na masesano

tiajinia moronucua na quishacari Roma tiacajinia. Puetunu pueyajanaa jaara nocua niquiaari na niqiniuria, nojuajaari maninia na masequiaari na quijia tiajinia. ³¹Majaari jiyasohuaja na pohuatanu quijia taa Pueyaso jiitiaa na jiyanooshano pueyani. Jiyaniijia Jesujiniji niishitiojuajaa-riuhua. Majaari na sanaajasaanu quijia.